


USA KA TINUOD NGA ILHANAN NGA WALA MAKITA

 ...magakatigum karong buntaga sa Ngalan ni Ginoong Jesus, ug human sa hataas nga pag-ampo. Ug karong buntaga, wala ko mobangon og sayo. Medyo naatrasado ako, sa pagbangon, ug nagatoo ko nga ang tanan nahibalo kung ngano, karon lang kana.

² Miuli ko sa balay, niadtong miaging buntag, o niadtong miaging gabii diay, ug ang akong silingan nagtindog didto sa tugkaran, siya ug ang iyang gamay'ng anak nga babaye. Ang iyang asawa usa ka nars sa paanakan didto sa ospital. Ug siya may—may usa ka sungkod sa iyang kamot, nga ingon *niini* ang gitas-on, nga may—may gamay'ng kinutlo nga nakasulat niini, dunay laso, ug ingon niadtong gamay'ng kinutlo nga nakasulat niini, “Lolo Branham sugod sa mga, sa pagtoo ko, mga 3:43 o 4:43, sa ika-11 sa Oktubre.” Dayon, dihay daku kaayong parentesis sa ubos, miingon, “Mas tigulang ka na kaysa gihunahuna mo.” Busa duna na ko’y legal nga katungod karon aron makapahulay og gamay inig kabuntag. Husto ba kana, Igsoong Wright, kung ikaw—kung ikaw mahimong usa ka lolo na?

³ Ug busa tingali makapalingkawas na kanà kanako, kung mao man, Igsoong babayeng Kidd, karong buntaga, nga wala dayon ko nakabangon niadtong pag-anhi ninyo dinhi nga gikan pa sa Ohio. Gibati gyud nako nga mas mitigulang ko’g napulo ka tuig, sa tan-aw ko, nga, pagkahuman niana. Pero, sama sa nahibaloan ninyong tanan nga aduna ko’y gamay’ng apo didto, nga mga pito o walo ka libra ang timbang, mga ingon niana, ang pinakamaut nga bata nga akong nakita sukad. Miingon, “Liwat gyud siya sa iyang lolo.” Busa...Ug nakita nako niadtong hiyayona kung asa gyud siya naliwat, kung asa naliwat si Billy.

⁴ Busa, kagabii, sa pag-agi ko didto sa bilding, human sa akong mga pagbisita, nahimamat nako ang usa ka grupo sa matitud-anong mga higala gikan sa Georgia ug sa palibot dinhi, ug kaming tanan atua didto nga nagatan-aw sa gagmay’ng mga bata. Ug makalingaw gyud kaayo sila. Karon, mora gyud sila’g...Gibati ko pirmi nga mora’g, “Billy, basin mabalian nimo sila, kabalo ka. Kay gamay pa kaayo sila.” Ug nagatoo ko nga mao pud kadto ang giingon ni Igsoong babayeng Beeler... Mao kana sa hunahuna ko kaniadto...Ingon-ana pud ang hunahuna niya kaniadto, pero, sa kadugayan, nasayran niya nga dili man diay sila dali mabalian. Maong, sa hunahuna ko basin

tinuod pud kana.

⁵ Kagahapon sa hapon nagkaaduna ako og pribilihiyo nga makaadto sa usa sa mga balay sa atong igsoong babaye dinhi sa simbahan, panimalay sa iyang anak nga babaye; ug siguro ania usab siya karon sa simbahan, diin nagpahigayon sila og gamay'ng panihapon para sa adlaw'ng natawhan ni Igsoong Neville. Ug anaa usa na pud ka milyahan nga naabot niya kagahapon. Ug mao nga nagpadangat kita kang Igsoong Neville og, "Usa ka tinuod og malipayon nga adlaw'ng natawhan," ang matag usa kanato, tungod kay usa siya ka maayo kaayo nga igsoon. Ug, siyempre, milagpas na siya sa baynte- singko, gamay, parehas nako. Ug milagpas na gyud kami niini, sa ikaduhang higayon. Kana...Karon tigulang na gyud ka nga tawo, pagmolapas na ka nianang markaha sa ikaduhang higayon, kabalo na mo.

⁶ Nahinumdom ko niadtong buntaga nga mianhi si Frankie Weber dinhi. Ug silingan namo siya dinhi; ang anak na niya nga babaye ang nagpuyo didto karon. Anaa na siya sa Florida. Ug nagdungan mi'g eskwela ni Frankie kaniadto. Ug gihulog ni Frankie ang iyang halad nga pasabot sa iyang adlaw'ng natawhan. Ug nagawali na ako niadto mga tulo o upat na ka tuig. Nadala nako si Frankie ngadto kang Ginoong Jesus. Ug gihulog niya ang baynte-singko sentimos. Sa akong nadumduman baynte-dos anyos na ko niadtong higayona. Ug gihulog niya ang baynte-singko sentimos. Sa hunahuna ko, "Oh, grabe, ang buot mo bang ipasabot baynte-singko anyos na si Frankie Weber? Whew! Grabe, nahadlok gyud ko kaniadto pagmoabot na ko'g baynte-singko." Karon hapit na ko mamahimo og tulo niini, kana, dili na gyud madugay. Kana—paspas ra kana nga mahitabo.

⁷ Pagmotan-aw ako dinhi ug makita ko sila Igsoong lalaki ug Igsoong babayeng Kidd nga mga otsenta na ug kugsan pa gihapon, sa hunahuna ko, "Ginoong Jesus, pasayloa ako sa pagreklamo, sa edad nga singkwenta'y-dos pa gani." Ug sila... Otsenta na ka, ug si Igsoong Kidd otsenta'y-uno na. Husto ba kana? Otsenta'y-uno. Ug anaa gihapon sila sa ministerio. Ug sultihan ko kamo, nagahatag kana kanato og kadasig, dili ba? Tinuod gyud kana. Ang Ginoo maayo gayud kanato.

⁸ Karon, adunay usa lamang ka butang nga akong gikabalakhan, niining panagtigum dinhi karong buntaga, ug kana mao'y...Usa kini ka makalilisang, mora'g usa ka makauulaw nga butang nga isulti. Pero daghan kaayo ko'g mga higala nga nagaanhi, gikan pa sa halayo kaayo, aron—aron makatambong sa mga buluhaton.

Wala nako makita ang mga Evans dinhi, pero ania gyud karon sila sa usa ka dapit, sa hunahuna ko. Kay wala pa gyud sila sukad nakasal-ang bisan kausa. Ug kabalo ba mo kung pila ka

milya ang ginabiyahe nila matag Domingo aron makadungog sa pagwali? Trese ka gatus ka milya. Dili sila makapagbiyahe pag aduna ra sila'y ubos sa saisenta ngadto sa setenta ka dolyares sa usa ka semana, para makasimba, husto kana, dayon pag-abot nila dinhi uban sa ilang tibuok, pamilya, pag ania na sila, mogasto pa gyud sila.

⁹ Karon, dili lang kana, apan ania pa'y usa ka igsoon nga gikan pa sa Alabama, nagabiyahe pud og ingon niana ang gilay-on matag semana. Igsoon... Oh, grabe! Igsoong "Welt"? [Nagaingon ang usa ka igsoon, "West."—Ed.] West. Ako... Batan-on pa siya tan-awon, para nako. Siya—usa na siya ka amahan, adunay daghang mga anak. Pero pirmi ko mahinumtum niya, nga bata pa kaayo siya tan-awon, siya ug ang iyang asawa. Si Igsoong West.

¹⁰ Si Igsoong lalaki ug Igsoong babayeng Palmer nga nagalingkod dinha sa luyo, nga gikan pa sa Macon, Georgia.

Ug—ug si Igsoong babayeng Ungren, kasagaran nagaanhi pud sila, nga gikan pa sa Memphis, Tennessee. Ania ba sila karong buntaga? Ako—ako... Kasagaran anaa gyud sila. Si Igsoong babayeng Ungren ug—ug ang grupo gikan pa didto sa Memphis, Tennessee, nga anaa dinha, oo, nga anaa dinha sa luyo.

Ug naa pa'y uban. Ako lang... Daghan kaayo sila, para usa-usahon og tawag. Ang uban kanila, gikan pa sa habagatang bahin sa Kentucky. Ang uban, gikan sa palibot sa Chicago. Samtang ang uban gikan mismo sa Chicago, ug lagpas pa sa Chicago, sa palibot nga mga lugar niini.

¹¹ Niadtong Domingo, akong nasayran nga adunay usa ka tawo nga mianhi dinhi nga gikan pa sa California, ug dili ra gyud daw siya magdugay dinhi; gusto lang ko niya nga himamaton. Ang nahitabo, okupado kaayo ko, pagkahuman sa panagtigum. Ug ang maong tawo mipauli na lang, nga wala man lang ako mahimamat.

Adunay usa pa nga miabot gikan sa Illinois, sa kung asa man. Kung kana nga tawo ania karong buntaga, kadto gyud ang labing lamian nga niya mansanas nga akong nakaon sukad-sukad. Kay gidalhan ko niya'g usa ka bukag sa mansanas.

Ug usa sa mga igsoon nga gikan pa sa Georgia, sa pagtoo ko, o sa ubang dapit, nagdala'g usa ka dakung pakete sa mga pecan, nga mga *ingon niana* ka daku, nga may mga kabhang sa papel. Ug, oh, malingaw gyud ko sa pagkaon niana!

¹² Sa pagkakaran, ako, sa tinuod, pipila na ka mga adlaw nga wala ko'y gana'ng mokaon og lamian nga mga pagkaon, sukad sa pagkamatay sa akong inahan. Nagapangamuyo ako sa Ginoo alang sa usa—usa ka bag-ong panan-awon. Mga humok lang nga mga pagkaon akong ginakaon, ug naningkamot lang ko... kutob sa akong mahimo aron makalahutay; tungod niana nakuhaan og baynte libra ang akong timbang. Nga mao... Karon, wala ko

nagpuasa. Wala ko . . . dili. Nga, ang pagbuhat niana nga walay lawum nga tumong, dili kana pagtugyan sa Ginoo. Ang gusto nimong ihatag sa Ginoo mao ang pinakamaayo nga aduna ka. Dili ang . . .

¹³ Nakita pud nako si Igsoong Sumner ug sila didto sa luyo. Daghan kaayo. Ako . . .

Sama, niadtong miaging Domingo, gihinganlan nako ang mga tawo—nga nagbantay kang mama, ug ingon-anang mga butang. Ug atua pud didto ang usa ka maunongon kaayo nga igsoong babaye. Nakalimot ko’g tawag sa iyang ngalan. Karon, kung ania man siya karong buntaga, nagapangayo ko og pasaylo. Ang usa kanila mao si Igsoong babayeng Beeler, ug ang usa mao si Igsoong babaye ug Igsoong lalaking Steffy. Ug daghan pa! Ako . . .

¹⁴ Kamong tanan nakaila na gyud nako aron mahibaloan nga wala gyud nako tuyoa, inig naa ko’y malimtan nga ngalan o naa ko’y malimtan nga tawo. Pagkamaunongon nilang tanan! Ug usahay samtang naglingkod ko dinhi, mahisgotan ko ang usa ka tawo nga mosantop sa akong hunahuna. Apan ako . . . Tungod niana, ang tibuok grupo mismo, tanan sila, kita n’yo, mga maayo gyud kaayo. Ug dayon, ang tanan, makapahimuot, pagkabuotan gyud nila kanamo. Ug kami mapasalamaton gayud niana.

¹⁵ Ug karon, niining buntaga, atong sulayan pag-usab nga moduol sa Pulong sa Dios. Karon, gusto kong isulti kini, aron maklaro gayud, nga ako—ako wala nagatambong sa bisan unsang panagtigum para lang nga makita. Wala ko nagaadto aron isulti lang nga, “Bueno, gusto ko tingali’ng mangamuyo sa Ginoo nga hatagan ako’g usa—usa ka Mensahe nga makapalipay sa mga tawo ug makapasinggit kanila.” Daghan na kita’g nasinati nga ingon niana, ug, mapasalamaton kita niana. Maayo man kana. Kita n’yo? Nindot gyud kana. Kita n’yo? Pero ang butang nga gusto nakong masayran, mao’y, “Ginoo, pagatultolan Mo ang akong mga hunahuna ngadto sa usa ka butang nga makatabang sa mga tawo, nga makapaduol kanila sa Dios, nga—nga—nga adunay mahimo nga kaayohan sa ila, nga—nga, dili lamang sa pagpalig-on kanila sa espirituhanon, kondili pagpalig-on kanila diha sa kahibalo ug sa pahimangno sa Dios, aron makahibalo sila unsaon pagbarug kon moabot ang kaaway.”

¹⁶ Nakigsulti ko sa usa ka igsoong babaye nga mibisita dinhi niining semanaha, si Igsoong babayeng Palmer. Ang ingon niya, gusto niyang mahibaloan kung giunsa daw nako pagpakabuhi niini nga probinsya. Tungod kay, inig anhi nimo dinhi, ug, oo, sa matag higayon nga moabot ko dinhi nga walog masakit dayon ko inig abot nako. Dili gyud maayo sa panglawas kining walog dinhi. Nasayod kita niana. Apan ang Dios adunay daghang mga anak dinhi. Ug mao nga usa sa niining mga adlaw . . .

17 Nagapangamuyo ako sa Ginoo karon, aron makakaplag og usa ka tinuod nga direktang Mensahe gikan sa Dios. Kita n'yo? Ug ako, pinaagi sa tabang sa Dios, akong gitinguha nga makahulat pa hangtud nga moabot Siya, kanang hangtud nga mahatagan Niya ako og pipila ka mga igapahayag. Kay gibati nako nga kinahanglan gyud nga adunay. . . Aduna gyu'y butang nga hapit na mahitabo dinhi, ug ako naghinamhinam nga mahibaloan kung unsa kini. Gusto nakong mahibaloan kini direkta gikan sa Dios, aron makahimo ako sa pagsulti niini nga MAO KINI ANG GINAINGON SA GINOO. Kita n'yo? Ug dayon—dayon kamo, kamong, mga katawhan, maila ninyo nga kini—dili kini ako. Mao nga, ginapaningkamotan nako nga mamaingon niana kini, nga, o, makadungog una gikan Kaniya.

18 Tungod kay, kung Iyang ibutang ang Iyang mga Pulong sa—sa usa ka tawo, bueno, nan dili na kini ang maong tawo; Siya na kini. Kung ang maong tawo nagasulti lamang niini, sa iyang kinaugalingon, nan kini wala'y bisan unsang bili. Apan kung Siya, ang Pulong sa Ginoo, anaa sa maong tawo, nan maipahayag Kini, ug dayon kini—kini mamahimong eksakto gayud. Mao kana ang gisugo kanato diha sa Biblia, dinha sa ika-20 nga kapitulo sa Deuteronomio, sa akong pagtoo, Kini miingon, oo, “Pagbantay kamo, ug kon adunay magasulti sa Ngalan sa Ginoo, ug kini dili mahitabo, nan ayaw hatagi'g pagtagad kanang tawhana.” Kita n'yo? “Apan kung isulti nila kini ug kini mahitabo, nan mas maayo nga patalinghugan ninyo kini,” kita n'yo, “tungod kay kini gikan sa Dios.”

19 Ingon niana ang gibuhay sa Dios. Iya nang gipahiluna ang Iyang regular nga programa dinhi sa Biblia. Nahibalo kita kon unsaon kini pagbasa. Apan adunay pipila ka mga butang, nga—nga may kalabutan sa Iglesia ug sa panahon ug sa uban pang mga butang, nga wala Niya nahisulat dinhi sa Biblia, busa Iyang gibutang ang Iyang Tingog ngadto sa usa ka tawo ug ila Kining ginapahayag, kita n'yo, ginapahayag nila Kini. Busa, tungod niana, ang paagi sa paghukom sa maong tawo mao ang pagsuta kon nahitabo ba kini sumala mismo sa ilang pagkasulti niini. Dayon, kung nahitabo gyud, nga padayon nagakahitabo nga ingon niana, nan, atong mahibaloan nga kini gikan gayud sa Ginoo. Dayon kita'y—dayon kita'y adunay pagsalig, kung ingon—ana, aron makapangandam alang sa mga butang nga magaabot.

20 Gusto kong basahon ang duha o tulo ka mga bahin dinhi sa Kasulatan niining buntaga. Ug gusto kong basahon, usà, gikan sa Basahon sa Exodo, ug nagatoo ko nga anaa kini nga bahin sa ika-4 nga kapitulo sa—sa Exodo, aron sa pagsugod.

21 Ug karon akong ipahibalo samtang nag-andam pa kamo sa pagbasa niini nga mga Kasulatan, akong ipahibalo ang butang nga gusto nakong ipamulong kaninyo, ang butang nga gibutang sa Ginoo sa akong kasingkasing aron pagahisgotan, niining buntaga. Wala ko kahibalo kung unsay Iyang pagabuhaton niini,

ngadto sa mga tawo; mahimong idirekta kini ngadto sa usa lamang ka tawo dinhi, tingali dinha sa usa ka tawo nga naminaw sa teyp, dinha sa kung asa nga dapit. Apan gusto nakong ipahibalo, niining buntaga. . .

²² Mahinumduman ko, niadtong miaging Dominggo sa buntag, nagwali ko bahin sa *Usa Ka Tinuod Nga Saksi*. Ug karong Dominggo sa buntag, kon itugot sa Ginoo, gusto kong magwali mahitungod sa *Usa Ka Tinuod Nga Ilhanan Nga Wala Makita*.

²³ Ako. . . Gisultihan ko ni Igsoong Palmer, kagabii, nga niadtong miaging Dominggo sa buntag sa diha nga namulong ako sa hilisgotan. . . o miingon nga magwali ko, karong Dominggo, bahin sa “Ang upat ka kinasang-an sa Iglesia.” Ug sa akong pagsulod kagabii. . . Kasagaran akong ginasulat kini. Kana. . . Wala ko kabalo kung kinahanglan ba nimong buhaton kana o dili. Apan aduna ko’y daghang mga butang, nga kinahanglan mahinumduman. Kung aduna ma’y mosantop sa akong hunahuna, kinahanglan nakong isulat kini sa usa ka papel. Kita n’yo? Ug gisusi nako kini, ug ang ako diay buot ipasabot niana dili mao’y upat ka tagboanan. Gisulti ko kini nga ingon niana, tinuod man. Apan ang buot nakong ipasabot ato, mao, “Ang upat ka matang sa gobyerno sa Iglesia.” Ug aron mahimo kana, kinahanglan pa nakong magtigum og daghang kasayuran mahitungod sa kasaysayan. Ug tingali sa sunod nga higayon andam na kong mamulong bahin niana. Apan nagkinahanglan kini og daghang oras kay sa aduna ako karon, alang sa pagtuon, aron makuha kini, tungod kay kinahanglan pa nimong mobalik ug magkuha’g mga petsa, ug uban pa.

Tungod kay, kamong tanan, kamong tanan nakasabot, nga makita kini bisan asa. Aba, gusto gyud natong makasiguro mahitungod niining mga butanga sa dili pa nato kini isulti. Kinahanglan nga husto gyud kini. Tungod, ania kita nagbarug, nagkupot sa pinakataas nga katungdanan sa kalibutan: ang pagka-ministro. Isip usa ka ministro, ug kinahanglan pinakakasaligan ug husto, tukma, kinahanglan nga ingon niana kita. Kinahanglan nga nakadepende kita sa Dios aron mabuhat kana.

Karon, sa Basahon sa Exodo, ang ika-4 nga kapitulo:

Ug si Moises mitubag ug miingon, . . . ania karon, sila dili motoo kanako, dili usab magapatalinghug sa akong tingog: kay sila moingon, Ang GINOO wala mipakita nganha kanimo.

Ug ang GINOO miingon ngadto kaniya, Unsa kanang anaa sa imong kamot? Ug siya miingon, Usa ka sungkod.

Ug siya miingon, Iitsa kini sa yuta. Ug siya miitsa niini sa yuta, ug kini nahimong usa ka bitin; ug si Moises mikalagiw gikan sa atubangan niini.

Ug ang GINOO miingon ngadto ni Moises, Ituyhod ang imong kamot, ug kupti kini sa ikog. Ug siya mituyhod sa

iyang kamot, ug midakop niini, ug kini nahimong usa ka sungkod diha sa iyang kamot:

Aron sila makatoo nga ang GINOO nga Dios sa ilang mga amahan, ang Dios ni Abraham, ang Dios ni Isaac, ug ang Dios ni Jacob, nga mipakita nganha kanimo.

Ug ang GINOO sa dugang pa miingon ngadto kaniya, Ibutang karon ang imong kamot ngadto sa imong sabakan. Ug siya mibutang sa iyang kamot ngadto sa iyang sabakan: ug sa diha nga siya mipagawas niini, tan-awa, ang iyang kamot nahimong sanlahon ingon sa niebe.

Ug siya miingon, Ibutang ang imong kamot ngadto sa imong sabakan pag-usab. Ug siya mibutang sa iyang kamot ngadto sa iyang sabakan pag-usab; ug mibunlot niini gikan sa iyang sabakan, ug, tan-awa, kini naulian ingon sa iyang ubang unod.

Ug kini mahitabo, kon sila dili motoo kanimo, ni maminaw ngadto sa tingog sa unang ilhanan, nga sila motoo sa tingog sa ulahing ilhanan.

Matikdi ninyo ang duha ka mga ilhanan, ug ang...ang matag ilhanan adunay tingog. Tugoti ko nga basahon pag-usab ang ika-8 nga bersekulo:

Ug kini mahitabo, kon sila dili motoo kanimo, ni maminaw ngadto sa tingog sa unang ilhanan, nga sila motoo sa tingog sa ulahing ilhanan.

Ug kini mahitabo, kon sila dili motoo usab niining duha ka ilhanan, ni maminaw ngadto sa imong tingog, nga ikaw mokuha sa mga tubig sa suba, ug mobubo niini nganha...malang yuta: ug ang tubig nga imong gikuha gikan sa suba mahimong dugo nganha sa malang yuta.

²⁴ Ug karon sa San Juan, sa ika-1 nga kapitulo ug sa ika-6 nga bersekulo, atong mabasa ang mga bersekulo, o kini nga bersekulo. San Juan, ang ika-1 nga kapitulo ug ang ika-6 nga bersekulo. Ug...

Dihay usa ka tawo nga gipadala gikan sa Dios, kang kinsang ngalan mao si Juan.

...usa ka tawo nga gipadala gikan sa Dios, kang kinsang ngalan mao si Juan.

²⁵ Ug sa Ezekiel 24:24, gusto kong ibutang kini nga Kasulatan, aron masumpay gikan sa Daang Tugon, sa mga propeta, ngadto sa Bag-ong Tugon; aron masabtan ninyo ang kinatibuk-an niini, gikan sa Exodo, gikan sa sinugdanan hangtud sa katapusan.

Sa ingon si Ezekiel nganha kanimo usa ka ilhanan: sumala sa tanan nga iyang gibuhat kamo mobuhat: ug

sa diha nga kini nagaabot, kamo mahibalo nga ako mao ang GINOO nga DIOS.

Karon atong iduko ang atong mga ulo sa makadiyut samtang kita mapaubsanong moduol Kaniya karon pinaagi sa pag-ampo.

²⁶ Amahan nga Dios, nagaduol kami sa Ngalan sa Dios ni Abraham, Isaac, ug ni Jacob: si Jesus Cristo, ang matarung. Nagaduol kami, sa hingbaloan nga Siya magapatalinghug kanamo, kay kami nagaduol nga dili sama sa usa ka tawo nga bag-ohay lang misulod sa bilding, apan maisugon kaming nagaduol nga may pagtoo, nagatoo nga kung unsa ma'y Iyang gisaad, buhaton Niya kini. Busa kami nagahangyo, karon, Ginoo, nga Imong pagadawaton ang matag usa kanamo nga ania karon, gikan sa pulpito hangtud sa luyo sa bilding, sa tanang dapit, ug ablihi ang matag kasingkasing ug circuncidaha ang among igdulungog, aron ang Pulong sa buhi nga Dios mogula gikan sa Langit, niining buntaga, ug igabubo sa among mga kasingkasing, aron kami motoo, samtang ginapatalinghugan namo ang Pulong sa Ginoo ug ingon nga gibasa Kini nganhi kanamo diha sa among mga igdulungog niining buntaga. Ug nagapasalamat kami Kanimo tungod sa Imong Pulong. Ang Imong Pulong mao ang Kamatuoran.

²⁷ Ug karon, samtang among makita ang dautang mga takna nga nagasingabot na, nga ang tanang kaligutgut sa Dios nagkatipun-og na dinha sa kalangitan. Ug sa unsa mang oras karon mahimong adunay mahitabo niini nga nasud nga mibiya Kanimo, nga adunay usa ka dakung pagbuto nga mopapas sa niining nasud gikan sa mapa sa kalibutan, tungod sa mga hulga sa luyo niini, gikan sa usa ka dili-diosnon nga nasud nga naghinamhinam sa pagbuhat niana. Ug bisan nga nahibalo niana, imbis nga sila unta moduol sa Dios, samot pa hinoon sila nga mipahilayo. Ingon nga kami nahibalo nga ang Basahon sa Pinadayag ug ang tibuok Kasulatan nanagna na mahitungod niining adlaw, nan kinahanglan dawaton namo ang maong pasidaan, Ginoo, aron dili kami magmatapulan ug magaduka-duka lang, sama sa naandan na. Hinaut nga kami mangbangon ug magyugyog sa among kaugalingon.

²⁸ Hinaut nga makabaton kami og pagsabot, karon, nga wala pa namo mabatonan kaniadto. Hinaut nga ang among mga kasingkasing modilaab sa hilabihan, human niining adlaw, nga magkaadunay nagasilaub nga kalayo sulod sa among mga kalag nga mokaylap sa tibuok nasud, Ginoo, ug mamahimo kaming mga buhing saksi bisan asa man kami.

²⁹ Panalangini ang mga masakiton ug mga balatianon, kadtong mga nanginahanglan, nga mga anaa sa among taliwala ug kadtong mga wala sa among taliwala, Imong mga katawhan, sa tanang dapit.

³⁰ Panalangini ang Imong Pulong, Ginoo. Balaana ang Imong alagad, ug ang Imong mga alagad nga naminaw, aron, kaming tanan, makaabot sa usa ka mas lawum nga kaamgohan mahitungod sa Iyang pagpakita kay sa kaniadto. Dili lamang ako nagaampo alang niining mga ania karon, kondili alang usab niadtong magapaminaw sa teyp sa tibuok kalibutan, aron sila madala pasulod sa Iglesia sa buhi nga Dios. Kay nasayod kami nga adunay usa lamang ka paagi nga kami mamahimong miyembro niini nga Iglesia, ug kana pinaagi lamang sa pagkahimugso diha sa Espiritu, dayon kami pagabautismohan pinaagi sa Espiritu pasulod ngadto sa usa ka Lawas. Ako nagaampo, Dios, alang sa matag usa kanila sa tibuok kalibutan, nga moadto Kanimo ang tanang himaya alang sa Imong Kaugalingon. Ug hinaut nga among maandam ang among mga kalag, nga sa usa ka singgit sa tibuok kalibutan, kami makasinggit, “Bisan sa ingon, umari ka, Ginoong Jesus.” Gipangamuyo namo kini sa Ngalan ni Jesus Cristo. Amen.

³¹ *Usa Ka Tinuod Nga Ilhanan Nga Wala Makita.* Ang mga tawo nangita og mga ilhanan, sukad pa kang Faraon hangtud karon.

Ug si Jesus nagpahimangno na kanato bahin sa usa—usa ka panahon nga adunay mga nagapangita og mga ilhanan, ug miingon, nga, “Ang dautan, mananapaw nga kaliwatan magapangita og mga ilhanan. Apan, bisan pa niana, makadawat sila og usa ka ilhanan.” Ug kana nga kaliwatan makadawat og usa ka ilhanan sa pagkabanhaw; usa ka mahuyang, dautan, ug usa ka mapanapawon nga kaliwatan nga pagahatagan og usa ka ilhanan sa pagkabanhaw.

³² Apan sama niining Kasulatan nga anaa sa atong atubangan, sa Ezekiel sa ika-24 nga kapitulo ug ika-24 nga bersekulo, kini nga propeta gihimong ilhanan. Ug mao kana nga ilhanan ang gusto nakong pagahisgotan.

³³ Kining tawhana gihimong ilhanan ngadto sa Israel. Ug sa tibuok Kasulatan, gigamit sa Dios ang Iyang mga propeta ingon nga mga ilhanan. Ug kanunay silang wala naila. Mora’g dili gyud makita sa mga tawo ang maong ilhanan. Ang kanunay man gud nilang ginapangita mao’y ilhanan sa emosyon.

Bisan kadtong mga Fariseo sa mga adlaw ni Jesus, miingon, “Ipakita kanamo ang usa ka ilhanan gikan sa Langit.”

³⁴ Apan nagpasumbingay kanila si Jesus nga nakadawat na sila og usa ka ilhanan. “Aduna na kamo’y ilhanan.” Miingon, “Makamao kamong moila sa kalangitan. Mahimo ninyong tanawon kana nga ilhanan. Nagaingon kamo, ‘Kung mapula kini, may dag-um, dili maayo ang panahon ugma.’”

³⁵ Kung mitan-aw lang unta sila sa usa ka ilhanan, kung mitan-aw lang unta sila Kaniya, ug naila nga Siya mao ang ilhanan sa Dios alang kanila; tungod kay ang ilang mga propesiya

mahitungod Kaniya nangatuman na mismo sa atubangan sa ilang mga mata. Pero nangita pa gihapon sila og usa ka ilhanan.

³⁶ Katingad-an gayud nga buhaton kana sa mga tawo, nga magsige'g pangita og ilhanan bisan nga ang ilhanan anaa na mismo sa ilang atubangan, sa ilang taliwala. Karon, ang Israel napaingon ngadto nianang kahimtang.

³⁷ Ug usahay makapahingangha ang kasakit nga kinahanglan antuson sa maong ilhanan; ang kasakit nga giagian ni Jesus, aron pamatud-an ang ilhanan sa Dios, nga Siya mao ang Mesias.

³⁸ Atong makita dinhi, kining batan-ong propeta nga ginganla'g Ezekiel nahimong usa ka ilhanan sa kanunay, sa tanang panahon. Grabe ang pagpasakit nga gipahamtang niya sa iyang kaugalingon! Atong makita sa usa ka dapit dinhi kon diin siya naghigda sa iyang wala nga kilid sulod sa tulo ka gatus ug kasiyaman ka adlaw. Gisugo siya sa Dios sa pagkuha og mga batang ug magluto og sinabawan, nga isagol kining tanan, lutoon kini, ug ibutang kini sa iyang kiliran, ug mohigda sa usa ka tisa, ug mohigda sa iyang wala nga kilid, lamang, nga dili gayud moliso, sulod sa tulo ka gatus ug kasiyaman ka adlaw. Hunahunaa ninyo kana. Ug dayon miingon, “Liso ka sa tuo nga kilid ug higda pud didto sulod sa kap-atan ka adlaw.”

³⁹ Ug ang ingon Niya dinhi, “Kanang butang nga imong nakita, Ezekiel,” miingon, “tungod kay imong gipas-an ang kasal-anan sa mga tawo, nga sa matag adlaw pagaisipon Ko nga usa ka tuig alang kanila.” Ingon nga, kadto, sa matag adlaw nga siya naghigda didto, nagpasabot kadto og usa ka tuig nga ang katawhan mamahimong mga binihag, ug ang ilang pagkadautan pagahinumduman sa Dios, ug ang Dios dili na mamati sa ilang mga pag-ampo.

⁴⁰ Apan ang kasakit nga naagian sa maong tawo, nganong gikinahanglan man kadto? Daghan ang nahibulong, nganong gikinahanglan man nga buhaton sa usa ka tawo ang ingon niana nga butang. Kini tungod kay ang mga tawo ayaw nang mobasa sa Pulong, ug ayaw nilang mag-ampo. Busa, ang Dios ingon nga gamhanan, Iyang gipadala ang Iyang propeta aron mahimong usa ka ilhanan. Ang mga tawo ayaw nang mobasa. Dili na sila ganahan mobasa. Ug dili sila ganahan moampo, tungod kay sila daghan na kaayo'g. . . mga butang nga ginabuhat. Dili na sila makagahin og panahon alang sa pag-ampo. Ug ang Biblia makalaay na alang kanila. Wala na kono Kini'y igong mahimo alang niining moderno nga panahon, o sa bisan unsa nga panahon.

⁴¹ Kabalo mo, nagatoo ko nga gisulti kadto ni Pablo, “Kamo mao'y mga sinulat sa Dios, nga ginabasa sa tanang mga tawo.” Ang Dios nagagamit og mga tawo ingon nga mga ilhanan, aron ipakita ang Iyang mga ilhanan. Ug sa daghang mga higayon kana nga ilhanan, ug sa matag higayon, kasagaran, gawas kung kini

anaa sa taliwala sa mga pinili nga mga tawo, kana nga ilhanan ginabalewala ug ginasaway, ginabiaybiay, ginasalikway.

⁴² Ug ginaisip, bisan sa Daang Tugon, sa mga adlaw sa mga propeta, ginaisip sila nga mga tawong nawad-an og tarung nga pangutok. Abi nila nga kadtong mga propeta mga kulangkulang, nga adunay sayup sa ilang pangutok. Ug ilang makita sila nga nagagikan sa kamingawan ug—ug nagapamuhat og mga ilhanan, ug pagkahuman mobalik pag-usab ngadto sa kamingawan. Ug ilang gibiyabiay sila, tungod kay wala man sila nasayod sa Kasulatan.

⁴³ Gisultihan ni Jesus ang mga Fariseo, usa ka higayon kaniadto, mahitungod sa pagkabanhaw. Miingon sila, “Kami adunay usa ka . . . Ang balaod nagaingon nga kon ang usa ka igsoong lalaki mamatay ug mabiyaan ang usa ka asawa nga walay—walay anak sa iya, ang iyang igsoong lalaki mao’y mangasawa niana nga asawa ug magbaton og mga anak para sa iyaha, niadtong namatay.” Ug miingon pa, “Adunay usa ka tawo nga adunay pito ka mga igsoong lalaki. Ug ang nahauna nangasawa, ug namatay siya, nga walay anak. Ug pagkahuman ang igsoon niyang lalaki ang nangasawa sa balong babaye ug dayon namatay na usab ang maong lalaki; ug hangtud miabot sa ikapito. Ug sa katapusan namatay na ang maong babaye.” Miingon, “Karon, didto sa pagkabanhaw,” miingon, “karon, kang kinsa man siya asawa, niadtong pito?”

⁴⁴ Oh, ganahan gyud ko niana nga Pulong! Miingon si Jesus, “Kanunay kamong nangasayup, nga wala nasayod sa Kasulatan ni sa gahum sa Dios.” Oh, ingon niana gyud ka maisogon nga ipahayag Niya kana kung ania pa unta Siya karon! “Kanunay kamong nangasayup, nga wala nasayod sa Kasulatan ni sa gahum sa Dios.” Ang gahum sa Dios nalanggikit sa Kasulatan. “Sayup kaayo kamo.”

Dayon mipadayon Siya sa pag-ingon, “Didto sa pagkabanhaw sila dili makapangasawa ni makapamana, apan sila sama sa mga Manolunda.” Wala Siya nag-ingon nga sila mamahimong mga Manolunda, ha, apan sila mahimong sama sa mga Manolunda, wala na sila’y mga glandula sa pagpakighilawas. Dili na sila magminyo ni igahatag sa kaminyoon.

⁴⁵ Nagakinabuhi kita karon sa panahon sa moralidad, o, sa pagka-mortal, panahon sa gingharian sa pagka-mortal. Apan adunay adlaw nga nagasingabot nga adunay Ginghamarian nga iya sa mga imortal, ug kanang imortal nga Ginghamarian mao ang dapit diin magpuyo ang mga tinubos. Kadtong mga tinubos, ug adunay . . . Ang kinabuhi nga mobiya niini nga lawas, aron mobalik sa Dios nga naghatag niini, mobalik pag-usab gikan sa Kahoy sa Kinabuhi, sa umalabot nga adlaw, aron magahari hangtud sa kahangturan.

⁴⁶ Kining batan-ong lalaki, batan-ong propeta, grabe ang iyang pagsakripisyo ug paghalad sa iyang tibuok kinabuhi aron mahimong ilhanan sa iyang katawhan, aron ipakita kanila ang silot nga ilang pagadawat, tungod kay sila nahimo nang kanang ginatawag nato nga “walay pagpakabana.” Dili nila gustong magkaaduna og unsa man nga kahilambigitan sa Dios. Wala na sila nagatoo sa mga propeta, ug ginabiaybiay lang nila ang mga propeta. Ug, apan, bisan pa, ug bisan unsaon pa nila ang pagdumili nga toohan kini, gisiguro sa Dios nga kini moabot gayud kanila, sa gihapon.

⁴⁷ Nagdumili kaniadto si Jezebel sa pag-ila kang Ahab ingon nga iyang pastor, apan siya mao gayud ang iyang pastor. Gisiguro gayud sa Dios nga moabot kaniya ang ilhanan, bisan og nagdumili siya.

Mao usab kini nga nasud karon. Ang matarung ug matinud-anon nga Dios, pinaagi sa Iyang Pulong, dili mapahanugotan ang bisan unsa man, kanang makita natong andam nang mahitabo, nga walay bisan usa man lang ka ilhanan sa kung asa man. Kanunay Siyang aduna og ingon niana. Karon, kinahanglan natong pangitaon kini. Ug sigurado ako nga ang mga tawo nga adunay maayong pagsabot sa Kasulatan nasayod kung unsaon pagpangita niana.

⁴⁸ Si Noe mao ang ilhanan ngadto sa mga tawo, sa iyang panahon, mahitungod sa moabotay nga paghukom. Si Noe sa iyang panahon giisip nga usa ka panatiko. Usa siya ka propeta. Giisip siya nga usa ka tawong walay maayong pangisip. Ug ang maong tawo nagsige’g pangdukduk, sa daghang katuigan, aron matukod ang arka, bisan og wala gayu’y tubig ibabaw sa yuta gawas niadtong anaa sa mga tuboran lamang. Ug iyang gitagna ang usa ka butang nga kataw-anan, para sa karnal nga panghunahuna. Ang ingon niya, “Adunay tubig nga igabubo gikan sa kalangitan.”

⁴⁹ Sigurado, daghan gyud ang moingon kaniya, “Ipakita kanako kung asa kana.” Moingon ang siyensiya, “Akong mapamatud-an nga wala gayu’y tubig didto.”

Apan, bisan pa niana, kung gisultihan siya sa Dios nga kini magagikan sa langit, siguraduhon gayud sa Dios nga matuman ang Iyang Pulong.

⁵⁰ Ug samtang wala pa’y tubig nga makita, samtang wala pa’y ni usa ka panganod sa kalangitan, walay bisan usa ka tulo sa ulan, wala pa sukad og ingon niana nga butang kaniadto nga gitawag og ulan, apan, sa tanang panahon, si Noe nag-andam og arka alang sa maong ulan. Usa kadto ka buhing ebidensiya nga kadto nga propeta nagatoo gayud kung unsa ang iyang ginapamulong, tungod kay siya nangandam man alang niini.

⁵¹ Ug ang si kinsa man nga tinuod gayud nga nagatoo sa imong ginasulti, mangandam mismo alang niini.

⁵² Mohunong ko dinhi, sa makadiyut lang. “Kung unsa ang panahon ni Noe kaniadto,” sama sa giingon ni Jesus, “mao usab ang mahitabo sa pag-abot sa Anak sa tawo.” Kung ang mga iglesia, niining panahona, nagatoo gayud sa mga butang nga ilang ginapamulong, ila untang gikinabuhi ang ilang ginasulti.

⁵³ Naunsa nga nagapatukod na man hinoon ta og dagkung mga bilding ug migasto og minilyon ka dolyares sa mga bilding, ug dagkung mga pagpakaylap sa mga organisasyon ug mga butang nga sama niana, ug ginasangyaw man kaha nato nga moabot na si Cristo sa bisan unsang orasa? Unsaon man nato pagpadayon, nga sa pagtan-aw sa atong kongregasyon ug makita mismo silang nangahimulag na gikan sa gahum sa Dios ug paingon na sa pagka-kalibutanon, ug dad-on pa gyud kini sulod sa iglesia ug isagol kini, ug ginatugotan lang nato kini? Tungod sa popularidad, ug tungod sa popular nga mga opinyon ug mga pang-denominasyon nga panagkalahi, nagapaninguha nga labwan ang ubang organisasyon, giunsa man nato pagkinabuhi sa atong ginawali? Ug makita kana sa kalibutan, nasayod sila niana, hangtud nga ang relihiyon nahimong usa na lang ka pagpamiyembro sa kung unsa nga organisasyon, o pagpasakop sa usa ka katilingban sa kung unsa. Relihiyon . . .

⁵⁴ Ang kaluwasan nga iya ni Cristo dili usa ka katilingban. Dili kini pagpamiyembro sa kung unsa nga butang. Kini usa ka buhi nga kasinatian.

⁵⁵ Karon, gikinabuhi ni Noe kung unsa ang iyang ginawali. Ingon niya, “Adunay magaabot nga usa ka baha sa paghukom sa niining dili-matarung nga kaliwatan. Ug ang Dios magabubo gikan sa kalangitan, og ulan, ug Iyang pagabahaon ang tibuk kalibutan.” Ug dili lang nga ginabuhat niya kana, apan nagbuhat siya og paagi sa paglingkawas ug ginahangyo ang mga tawo nga mosulod gayud sila niini. Apan ayaw nilang mamati kaniya.

⁵⁶ Apan, si Noe, ingon nga usa ka propeta, mao’y usa ka ilhanan niadtong kaliwatan, usa ka ilhanan nga ginasultihan og dautan, usa ka tawo nga giisip nga usa ka tawong buang; nga nagapangandam alang sa usa ka butang, bisan og walay—walay ebidensiya bisan asa, o sa nangagi mang panahon, nga kini aduna og unsa man nga kapuslanan.

Apan mora’g ingon niana ang panghunahuna sa mga tawo karon. Mahimong maghunahuna sila’g tukod og mga silongan nga makapanalipod kanila sa mga bomba-nukleyar. Unsa ma’y kapuslanan sa usa ka silongan alang kanimo kung wala man gani og bisan usa ka kahoy o bato ang mahabilin sa yuta?

⁵⁷ Aduna kita’y usa ka Silonganan batok sa bomba-nukleyar, ang Cristohanon adunay ingon niana. Sama sa akong giingon, pipila na ka Dominggo ang milabay, o kalit lang kini nga misantop sa akong hunahuna, “Kini dili usa ka Silonganan nga

batok nianang usa ka *nukleyar nga paghulog-sa-gawas*, Kini usa ka Silonganan para *sa-sulod*, diin kita nagasulod mismo Niini, ulo una, uban sa tibuok natong kasingkasing, ug tibuok natong kalag, ug uban sa tibuok natong hunahuna, pasulod kang Cristo, ang Arka sa kaluwasan sa Dios.”

⁵⁸ Apan, si Noe, giisip, nga usa ka kulangkulang niadtong panahona, tungod sa kabuangan sa pagwali, ug tungod sa pagpakita’g ilhanan sa atubangan sa mga tawo, nga nagapasidaan kanila, ug ginakondena ang kalibutan. “Gikondena ang kalibutan, pinaagi sa pagtukod og arka,” bisan og wala gayu’y tubig aron mopalutaw niini. “Iyang gikondena ang kalibutan,” ang ingon sa Biblia, sa Mga Hebreohanon, ika-11 nga kapitulo. “Iyang gikondena ang kalibutan ug giluwat ang iyang kaugalingong panimalay, pinaagi sa pagpangandam,” ug ingon nga usa ka ilhanan gikan sa Dios, mahitungod sa umaabot nga mga paghukom niadtong panahona. Pagkamahimayaon nga butang!

⁵⁹ Daghang mga katuigan human niadto, dihay laing ilhanan nga miabot. Mao kadto si Moises, usa ka propeta. Siya kadtong ilhanan sa Dios para sa Israel. Anaa sila sa pagkaulipon kaniadto sulod sa upat ka gatus ka tuig. Ug ang Dios nag-andam og usa ka ilhanan alang kanila, sa wala pa ang maong kaluwasan. Ug siya’y usa ka ilhanan sa kaluwasan para sa Israel, ug usa ka ilhanan sa paghukom para sa Egipto.

⁶⁰ Si Noe usa ka ilhanan sa kaluwasan para sa iyang katawhan, ug ilhanan sa paghukom para sa nahisalaag nga kalibutan, ang dili-magtotoo. Ang mismong mga tubig nga nagpakgang sa kalibutan ug naglumos sa kalibutan mao ang bugtong paagi sa pagluwas kang Noe. Ang bugtong butang nga makaluwas kaniya kaniadto mao ang paghukom.

Ang bugtong butang nga makaluwas sa Iglesia sa karon nga panahon mao mismo ang paghukom, ang Dios nagatunton na panaug sa Iyang paghukom.

Apan nagwali sa gihapon si Noe. Nahimo siyang usa ka ilhanan.

⁶¹ Ug karon ang Israel, human sa upat ka gatus ka tuig, misugod sila sa pagtuaw alang sa kaluwasan. Ug ang Dios wala gayud magpadayag sa Iyang Kaugalingon ug magpakita sa Iyang Kaugalingon hangtud nga ang Iyang mga katawhan andam na sa pagdawat kung unsa man ang Iyang igapahayag.

⁶² Karon, oh, pagkadaghan pa unta ang mahimong isulti niana, kung duna pa’y higayon, kung unsa nga gibiyahan sa Dios nga hubo kini nga nasud! Mas nahibalo gani sila. Balik-balik, nga gimantala kini sa mga mantalaan. Naipakita na ang mga ilhanan sa Iyang Pag-abot. Ug nagapadayon gihapon sila nga daw wala lang gipanumbaling kini. Wala sila’y ikapangulipas. Ania na kita sa katapusan.

⁶³ Ang Dios nagapadala lamang sa Iyang mga propeta sa dihang ang mga tawo nagatinguha'g propeta. Ang Dios nagapadala sa Iyang ilhanan sa dihang ang mga tawo andam na alang sa usa ka ilhanan. Apan, ang problema lang, ang mga tawo panagsa ra . . . Anaa na sila sa punto diin emosyon ang gitinguha nila, o gusto sila'g sama niini, "Ipakita kanamo ang ilhanan nga gikan sa Langit." Apan sa diha nga ang Dios nagapadala na og usa ka ilhanan, dili na nila gustong tan-awon kini. "Tungod kay gitago kini gikan sa mga mata sa maalamon ug masinaboton, para ipadayag sa mga bata aron makakat-on." Wala nila kini makita, ang ilhanan.

⁶⁴ Nahibalo gyud unta ang Israel, sa dihang nahimugso kadtong matahum nga bata, sa dihang gitan-aw nila didto ug nakita kadtong—kadtong gidugayon sa panahon nga sila nagpuyo didto, "Ang imong katawhan mamahimong dumuloong sulod sa upat ka gatus ka tuig, sa usa ka langyaw nga yuta, apan pagawason Ko sila." Nasayod unta sila nga ang panahon haduol na, ug sa diha nga ilang nakita nga nahimugso kadtong matahum nga bata. Nga, bisan ang inahan ug amahan, nga si Amram ug Jochebed, wala mahadlok sa mga sugo sa hari, ug ilang gipalutaw kadto nga bata didto sa suba diin adunay mga buaya; walay bisan usa niadtong mga buaya ang mitukob sa bata. Nakita nila nga adunay ilhanan, apan wala nila kadto panumbalinga. Dili sila andam alang niadto.

Gipasulod siya mismo sa Dios ug gibutang siya mismo sa palasyo ni Faraon, ug gitugotan nga si Faraon ang magpadaku kaniya ug hatagan siya og tanang edukasyon nga iyang makat-onan, aron maipakita (ang Dios) kung giunsa Niya pagpamuhat sa mga butang, ug pagkahuman gidala siya ngadto sa luyo nga bahin sa kamingawan, gipahikalimtan kaniya ang tanan mahitungod niini.

⁶⁵ Gibansay siya ni Faraon kaniadto. Gibansay pud siya sa Dios. Si Faraon adunay kuwarenta ka tuig sa pagbansay kaniya, dayon ang Dios migugol usab og kuwarenta ka tuig sa pagbansay kaniya, gipahikalimtan kaniya ang tanan mahitungod niini. Pagbansay sa tawo; ug pagbansay sa Dios.

Nagbansay si Faraon og usa ka anak nga lalaki aron mamahimong pangulo, diplomata, aron mamahimong sundalo, manggugubat, nga mamahimong sunod nga Faraon aron maipadayon ang Egipto sa hataas nga gikahimutangan niini, nga buntogon ang tanang uban pang mga nasud ug ipabayad sila og buhis ngadto kang Faraon. Apan gidala siya sa Dios ngadto sa luyo nga bahin sa kamingawan, gitangtang kadtong tanan gikan kaniya. Ug gipakita kaniya, sulod ra sa lima ka minuto, pinaagi sa nagdilaab nga sapinit, nga Siya usa ka buhi nga Dios. Ug gitantang ang tanang kahadlok gikan kaniya; giandam siya. Siya usa ka ilhanan.

⁶⁶ Gusto sa Dios nga mag-ampo ang Iyang katawhan. Ug sa dihang gipabug-atan ang Israel sa hilabihan, sa ingon nga kahimtang, nga dili na nila maagwanta, nga ang gitagnang panahon alang kanila natuman na, ug ang ilang mga palasanon misobra pa sa ilang gidahum, didto na sila nagsugod sa pag-ampo. Ug sa dihang ang mga tawo nagsugod sa pag-ampo, nagsugod na pud og pagpatalinghug ang Dios. Panahon na kadto nga matuman ang Pulong sa Diyos.

⁶⁷ Ug busa, sa dihang nakita ni Amram ug Jochebed nga panahon na kadto nga matuman ang Pulong, nag-ampo sila, ngadto sa Dios. Ug kasagaran kadtong nagaampo mao kadtong adunay kabug-aton, siya ra pud ang makadawat. Kadtong mga nagaampo, mao kadtong mga gigahin na sa Dios sa pagbuhat niana.

⁶⁸ Nag-istoryahanay mi karong buntag didto sa lamesa nga namahaw samtang nagdalidali mi og pangaon sa tostado nga tinapay ug uban pa, aron makaadto na dayon sa simbahan. Adunay nakaistorya bahin sa usa ka tawo, nga mibiya na dinhi, nga mibalik sa pagpanigarilyo human siya nga naayo sa kanser. Miingon ko, “Pagkamakaluluoy.”

⁶⁹ Dayon adunay misulti ug miingon, “Kana gyud ang pinakalisud undangon nga bisyo, sa tanan, kanang pagpanigarilyo.”

⁷⁰ Miingon ko, “Nasayod ko niana. Kay, yawa kana.” Ug ingon ko, “Kana’y—yawa kana.” Ug ingon ko, “Ug dili ka makahimo sa pag-undang niini gawas kon ang gahum sa Dios anaa kanimo.”

Duna ko’y naila nga duha ka tawo niadtong batan-on pa ko, pareho silang nagtinguha nga mamahimong mga alagad sa Dios.

Ang usa kanila, dihadiha nga human ko siyang giagak ngadto kang Cristo, nagdagkot dayon siya og sigarilyo. Nagapanigarilyo siya’g lima o unom ka pakete kada adlaw, molingkod ug modagkot og usa ka sigarilyo ug dayon wala na’y hunong ang pagpanigarilyo niya, sa tibuok adlaw. Ug misulay unta siya sa pagdagkot og usa pa ka sigarilyo, ug Adunay wala nagtugot kaniya sa pagbuhat niadto. Milakaw siya paingon sa sug-anan, nga wala mahibalo nga ginakondena sa mga Kasulatan ang niana nga mga butang, ug gidagkotan ang sug-angan ug gisugnod na kadtong pakete diha sa sug-anan. Ug mao na kadto.

⁷¹ Samtang, kadtong usa ka tawo nga gusto mahimong Cristohanon, nga naninguha sa labing maayo niya nga mahimo. Nagtuaw siya sa Ginoo. Mihunong siya sa pagpanigarilyo, sulod sa duha o tulo ka semana. Ug sa dihang nakaamgo siya sa iyang kaugalingon, sa mao nga kahimtang, nawad-an siya og maayong pangisip. Ug nakaamgo siya sa iyang kaugalingon, ug nakaplagan niya ang iyang kaugalingon didto sa luyo nga nataran, nga ginabunalan ang usa ka lata, nga wala na sa

tarung nga panimuut. Nagdalidali siya'g dagan, pasulod sa iyang balay, ug gikuha ang iyang sigarilyo, ug nanigarilyo og usa ka pakete sa wala pa siya mobiya sa iyang balay niadtong gabhiona, sunodsunod na siya nga nagapanigarilyo. Kita n'yo?

⁷² Gitawag man gud kadtong usa. “Walay tawong makahimo sa pag-ari Kanako gawas kon pagadanihon siya sa Akong Amahan, ug ang tanan nga gikahatag Kanako sa Amahan magaari Kanako.” Unsa may pasabot niana nga pahimangno? Kinabuhi kadto, ang atua sa usa. Iyang nakita Kini. Dili nimo Kini makita gawas kung ipadayag Kini sa Dios. “Kini gitago gikan sa mga mata, sa mga makiadmanon ug mga masinabuton, ug gipadayag kini ngadto sa mga bata nga makakat-on.” Husto kana.

⁷³ Nasayod sila Amram ug Jocabed nga miabot na ang panahon. Haduol na ang takna.

⁷⁴ Ug gusto kong isulti kini samtang nagahisgot pa ko bahin niini. “Dili kini tungod kaniya nga nagabuot, ni tungod kaniya nga nagadagan; kondili tungod sa Dios nga nagapakita og kalooy.” Husto kana. Tungod ra gyud kini sa Dios.

⁷⁵ Busa, karong adlawa . . . Oh, motuhop gyud unta kini nga halawum! Kung, karon, ang Dios nagtawag kanimo, ug ikaw nagpahimulag sa imong kaugalingon gikan sa mga butang sa kalibutan, ug gilimpyohan ka na sa mahimayaong gahum sa Dios gikan nianang mga butanga, angay gayud nga ikaw ang pinakamalipayong tawo sa kalibutan. Minilyon ang gustong mobuhat niana kung mahimo lang unta nila, apan dili nila mahimo. Tungod kay dili alang kanila nga makabaton niini. Kini ang adlaw nga ang Iglesia gitawag pagawas, gipahimulag. Nalahi na kini, kung unsa kini kaniadto. Oo.

⁷⁶ Sa dihang ang mga tawo nagsugod na sa pag-ampo, niadtong ang Israel nagsugod na sa pag-ampo alang sa usa ka propeta, ang Dios aduna na'y giandam nga propeta. Ang Dios aduna na'y giandam nga propeta, sa tanang panahon, tungod kay kanunay'ng ginaunahan na sa Dios ang mga tawo. Aduna na Siya'y tawo nga giandam, pero nagahulat lang Siya sa mga tawo nga manggiampo, nga tinguhaon kini sa mga tawo.

⁷⁷ Makaingon ko nga eksaktong ingon niana na ang kahimtang nato karon! Ang atong gikinahanglan karon dili usa ka rebaybalista, dili usa na usab ka tawo para sa kung unsang daku nga organisasyon, nga aghaton ang tanang mga pundok aron organisahon ang tanan. Ang atong gikinahanglan karon mao'y usa ka propeta nga pinadala gikan sa Dios, nga may dalang Mensahe nga maghukom sa kalibutan. Tingali ang Dios aduna na'y ingon niana nga tawo, kung ang mga tawo andam lamang para niini. Nasayod na kamo sa akong ginapasabot. Siya aduna na'y, malagmit, giandam nga tawo sa kung asa nga dapit sa kalibutan, apan gikinahanglan usa nga tinguhaon kini sa mga

tawo. Ang Dios dili basta-basta nga nagapugos og mga butang nganha kaninyo. Kinahanglan nga tinguhaon usa ninyo kini. “Bulahan sila nga gigutom ug giuhaw sa pagkamatarung, kay sila pagabusgon.” Husto kana.

⁷⁸ Human nga naila si Moises. . . Human nga ang mga tawo, ang buut kong ipasabot, nakaamgo na nga nagkinahanglan diay sila og usa ka lider, nagsugod na sila sa pag-ampo. Nagsugod sila sa pag-ampo nga ang Dios magpadala kanila og usa ka lider, o usa ka tawo nga magpagawas kanila. Ug Siya nagpadala kanila og usa ka tawo, usa ka propeta. Mao kadto ang Iyang ilhanan. Karon, kon kini nga tawo dili usa ka propeta, kung siya mitungha didto, nga miingon, “Usa ako ka maalamon nga sundalo,” adunay katungod ang Israel nga dili motoo niana nga tawo. Tungod kay, ang Dios, sa matag panahon, sa walay kapakyasan, nagapadala og usa ka propeta. Sultihi ko’g usa ka higayon diha sa Biblia kung duna man. Kanunay gayud nga usa ka propeta ang Iyang ginapadala nga adunay MAO KINI ANG GINAINGON SA GINOO.

⁷⁹ Bisan si David, siya mismo, ang pinakabantogang maalamon nga sundalo nga nagkaaduna ang Israel, ug, bisan pa niana, si David usa ka propeta. Tinuod, ingon-ana gayud siya. Siya usa ka propeta, si David.

⁸⁰ Ginahulat Niya ang mga tawo nga magkaaduna og pagkamatinguhaon sa ilang kasingkasing nga maminaw niining propeta nga Iyang ipadala.

Siyempre, adunay usa ka pundok nga nag-ingon nga gitinguha kono nila, apan wala diay. Napamatud-an sa ulahi nga sayup sila. Nangadala ra diay sila sa ilang emosyon. Ug ang ingon sa Biblia, “Mipanaw usab uban kanila ang nagakasagol nga panon sa mga tawo.” Unsa ma’y gibuhat niadto? Nagdala kadto og kasamok didto sa kamingawan. Ug sa matag higayon, nagakahitabo gyud kana nga kasamok. Oh, nanghinaut ko nga mapatuhop gyud nako kini, pag-ayo. Sa matag higayon nga ang Dios magpadala og usa ka butang, aduna gyu’y pipila ka mga bastos, karnal nga pagsundog-sundog niini, nga modungan niini. Sa matag higayon, aduna kanunay og usa ka butang, nga magsundog-sundog niini; nga mauyonan sa mga tawo.

Pero ang usa ka tinuod nga propeta sa Dios nagapabilin gayud sa MAO KINI ANG GINAINGON SA GINOO. Dili gayud siya motipas niana nga Kasulatan kung ang Dios ang nagpadala kaniya.

⁸¹ Si Moises nagpabilin ra gyud diha sa Kasulatan. Ang ingon sa Dios, “pagawason Ko sila.” Siya miingon kang Moises, “Gipadala Ko ikaw aron himoon kana nga buluhaton.” Ug si Moises adunay kasinatian. Natagbo niya ang Dios. Anaa kaniya ang Pulong sa Ginoo.

⁸² Ang rason nga ang Dios nagapadala og mga propeta tungod kay anaa man kanila ang Pulong sa Ginoo. Ang Pulong sa Ginoo nagaabot ngadto sa mga propeta. Ug kung wala kaniya ang Pulong sa Ginoo, nan dili siya usa ka propeta.

⁸³ Adunay daghang mga karnal nga pagsundog-sundog nga nagasulay sa pag-ingon nga sila kono mga propeta, sa tanan nga mga kapanahonan, apan kanunay silang nagapalayo sa Pulong sa Ginoo. Apan ang usa ka tinuod nga propeta nagapabilin nga eksakto sa Pulong. Karon, ayaw kana kalimti nga pahayag. Ang tinuod nga propeta nagapabilin gayud sa MAO KINI ANG GINAINGON SA GINOO.

⁸⁴ Si Jesus nagpasidaan na kanato kung unsay mahitabo sa katapusang mga adlaw. Apan ang usa—usa ka tinuod nga alagad, ang tinuod nga propeta, dili gayud mapakyas sa pagpabilin lang diha mismo sa MAO KINI ANG GINAINGON SA GINOO.

⁸⁵ Si Moises nagpabilin uban sa Ginoo. Usa siya ka ilhanan. Siya’y usa ka ilhanan sa Israel nga haduol na ang adlaw sa ilang kagawasan, ug siya usab ang ilhanan sa Egipto, nga ang adlaw sa ilang katapusan haduol na. Tungod, human niadto, nangalunod sila didto sa Dead Sea, ang tibuok kasundalohan ni Faraon. Miabot na sa ila ang katapusan sa ilang puwersa pangmilitar, ug ang usa ka propeta mao’y ilhanan sa katapusan sa maong nasud.

⁸⁶ Pamalandungi n’yo kana, kung unsa kahalangdon ang Dios, ug kung unsa ka yano ra ang Iyang mga pagpamuhat. Sigurado, kung masabtan man gani kini sa mga dili-edukado, kinahanglan nga masabtan usab kini sa mga edukado. Amen. Kung ang maong mga ulipon didto sa lapok nga mga gahong sa Egipto nakasabot nga mao na kadto ang propeta gikan sa Dios, ug ang takna haduol na, unsa pa kaha ang palasyo ni Faraon nga angay unta mahibalo niadto? Apan mao man kadto ang matang sa mga tawo nga dili mahibalo niini, ang matang nga kanunay’ng dili gyud makakita, niini.

⁸⁷ Niadtong mitindog si Moises, naglantaw didto sa mga tamboanan, didto sa mga anak sa Israel nga nagaagi, para sa Israel. . . alang kang Faraon, sila mga ulipon ug mga iro, alang kang Moises, sila mao ang mga pinili sa Dios. Ang Biblia nag-ingon, nga, “Gipili ni Moises,” gipili niya sa iyang kaugalingon, “nga antuson ang pagkatalamayan ni Cristo, nga ginaila kini nga labi pang dakung bahandi kay sa mga kalipayan sa sala, kay siya nagpaabot man sa balus sa katumbasan.” Nasayod si Moises nga sila dili lamang mga manglalapok; sila mao ang mga tawong nagbaton og saad.

⁸⁸ Sa iyang kaugalingon, hingsayran niya kung kinsa siya. Apan dili niya masulti kini sa ila. Kinahanglan nila kining maila, sila mismo. Nasayod siya, mismo, kung unsay iyang buluhaton, ang—ang kinahanglan niyang buhaton. Nahibalo siya nga gipabarug siya sa Dios alang niini nga katuyoan, apan

dili niya kini mahimong isulti kanila. Ug hangtud nga buta pa sila niini, wala gayud niya gipadayag ang iyang kaugalingon sa dayag, hangtud nga naila nila kini. Dayon, nakita na nila kadto nga ilhanan, ila kadtong naila.

⁸⁹ Miingon Siya, “Hatagan Ko ang Israel og usa ka ilhanan. Kuhaa kini nga sungkod; himoa kini nga usa ka bitin. Kung dili sila mamati niana, nan isulod ang imong kamot sa imong dughan, kuhaa kini, ayoha imong kaugalingon sa sakit nga sanla, dayon motoo na sila niini. Ug dayon, kung dili gihapon sila magapatalinghug niini, magkuha ka og tubig gikan didto sa Nile, og ibubo kini sa mala nga yuta, ug ang tanang tubig mamahimong dugo.” Usa kadto ka nasudnong ilhanan. Toohan na kini sa mga tawo. Sa dihang, sila nga andam nang modawat niadto motoo gayud sa dihang ilang makita nga nagapamuhat na ang ilhanan sa Dios, apan nagkinahanglan ang maong nasud og usa ka butang nga lahi. Busa, ang Dios naghatag og ilhanan alang sa tanan.

⁹⁰ Naggamit ang Dios og usa ka tawo, usa ka mapaubsanon nga tawo, usa ka propeta, aron mahimong usa ka ilhanan sa katapusan niadtong nasudnong kahimtang didto. Dios, padadi kami’g usa pa. Pagpatungha’g usa pa alang kanamo. Kung ang katawhan sa Dios magampo alang niini, magpabarug gayud Siya og ingon niana. Kini, kinahanglan gayud nga ang katawhan aduna og ingon niana nga gibug-aton. Kinahanglan nilang magmata. Kinahanglan nilang maamgo. Kinahanglan nilang maila ang adlaw nga ilang ginapuy-an, ug ang kahimtang sa atong palibot, ayha pa sila makamata.

Kay kon dili magpadayon gihapon kamo sa pagkinabuhi sama sa inyong naandan na. “Kinahanglan kong magtukod og bag-ong balay karong tuiga. Kinahanglan nakong makakuha og mas nindot nga sakyanan kay sa mga Jones. Kinahanglan nakong buhaton ang *ingon niini*.” Oh, sobra na ang *ingon niana*! Pagmaamgo n’yo, nga bisas unsa pa og . . . Maayo man kana. Apan kinahanglan nimong mahibaloan, igsoon, nga kining tanang mga butang mahanaw ra.

Gisulti ni Jesus, “Ayaw kahadloki siya nga makapatay og lawas,” ang bomba atomika sa Rusya. Ayaw kahadloki siya nga makapahimong abog sa bulkan kining lawasa, sulod ra sa pipila ka minuto, “apan kahadloki Siya nga makapahimo sa lawas og ingon niana ug itambog ang kalag ngadto sa impiyerno.” Mao lang kana.

⁹¹ Samtang nakig-istorya ko sa usa ka doktor, didto sa ospital niadtong naospital ang akong inahan, naghigot siya kung unsa gayud ka maayo ang siyensiya, sa pagsuhid sa lainlaing mga aspeto sa lawas, ug pagbutang og tambal niini, ug makita kon nganong patyon niini ang usa ka partikular nga kagaw, ug luwason ang binhi sa kinabuhi. Miingon ko, “Nindot kana.

Maayo kana.” Naminaw ko sa iya sa makadiyut. Pero miingon ko, “Doktor, maayo man kana. Ginapasalamatan ko kana. Maayo gayud kana. Ako—ako nagpasalamat gayud sa Dios tungod niana. Pero, tan-awa, imong gigugol ang tibuok mong kinabuhi sa pagpaningkamot nga makakaplag og butang mahitungod sa usa ka binuhat. Pero nganong dili mo hinuktukan og usa ka higayon ang mahitungod Kaniya nga mao’y naglalang niini, Kaniya nga nagbuhat niini, Kaniya nga mao’y Nagdisenyo niini? Ang Dios mao ang Nagdisenyo niini.”

Grabe ka mas gamhanan ang Magbubuhat kay sa linalang nga Iyang gibuhat! Nganong ginahatagan man nato og mas dakung pagtagad ang linalang, samtang wala nato nahunahunaan ang Magbubuhat nga naghimo sa langit ug yuta, ug nagbuhat sa lawas ug kinabuhi? Mahimo Niya kining gub-on bisan kanus-a Niyang gusto, tungod kay Iyaha man kini.

⁹² Makapahibulong gayud kini nga butang, ang mahimo niini sa lawas sa tawo. Ginapasalamatan nato kana. Mahimo nilang ibalhin ang usa ka mata, gikan sa usa ka tawo ngadto sa lain; kuhaon kanang gagmay kaayo nga mga ugat, ug tangtangon ang usa ka mata sa tawo gikan sa bangag niini ug ibalhin ngadto sa bangag sa mata sa laing tawo, ug kanang tawhana makakita na pinaagi niana nga mata. Nindot gayud kana nga butang.

⁹³ Kaniadto, kung ang usa ka inahan, sa dihang manganak na siya, ug ang—ang bata dili mahimugso, ug pag ingon niana ang iyang—iyang kahintang, nga ang bata dili mahimugso: ang inahan ug ang bata, silang duha, mamatay. Husto kana. Apan usahay na lang nimo kini madungog, lahi na karon, tingali wala na gani mo’y madungog. Mao nga karon mahimo na nilang dad-on ang inahan pag anaa na siya nianang kahintang nga hapit nang manganak, ug kung ang . . . sa dihang ang inahan hapit na gyud ang—ang takna sa iyang pagpanganak, siya . . . mahimo nilang dad-on ang maong inahan ngadto sa usa ka lawak ug hatagan siya og gamay nga anestisya, ug kuhaon kanang bataa, sama ra sa ordinaryo nga pagpanganak, makuha na ang bata. Ginapasalamatan nato kana.

⁹⁴ Sultih ko’g usa ka sistema. Pananglitan imong sampungan ang usa ka balbula dinhi sa kung asa, diha nianang sistema sa patubig sa siyudad, ug tan-awa kung unsay mahitabo sa kinadak-ang balbula. Mobuto gyud kini.

Apan, bisan pa niana, mahimo na natong putlon ang usa ka bitiis, putlon ang usa ka bukton, ug, pinaagi sa milagro sa Dios, Iyang ibalhin ang pag-agas sa dugo ngadto sa laing agianan, sulod sa usa ra ka gutlo, ug paagihon kini sa ubang agianan aron maluwas ang kinabuhi sa tawo. Kinsa ma’y makahimo niana? Sultih ko.

⁹⁵ Putla kanang tubo, putla kanang kinadak-ang linya sa tubig diha sa kung asa man, samtang kini nagapaagas gikan sa usa

ka balbula. Unsa kahay sangpotan niini? Sulayi kini kausa ug tan-awa kung unsa ang mahitabo. Wala na'y laing agianan aron mabalhin ang agas. Siguradong mobalik kini sa balbula.

Kung ang Dios wala maghimo og paagi nga kini nga dugo makapangita og laing agianan sa iyang kaugalingon, dihadiha dayon, usa lang ka agas balik sa kasingkasing ikamatay na dayon nimo. Sa matag higayon nga maipit imong tudlo, kamatayon kini, dihadiha dayon. Sa matag higayon nga masamdan ka sa bisan asa nga bahin, nga mahiwa ang usa ka dakung ugat o unsa man, mahimong kamatayon kini, dihadiha dayon. Maputol lang ang imong tudlo, mamatay ka na. Ingon niana lang. Ang dugo moagos man gud balik sa imong kasingkasing. Kini mopatay kanimo. Apan ang Dios. . .

⁹⁶ Karon, giisip nato nga talagsaon kini. Atong giisip nga kahibulongan kini. Ug mapasalamaton kita kung giunsa sa siyensiya, nga mahimo nilang isumpay ang mga ugat ug mapugngan ang pagdugo niini. Maayo gyud kana. Apan Kinsa ang Usa Nga nagdisenyo niana? Kita n'yo? Nagatan-aw kita sa tibuok kabuhatan apan nahikalimtan nato ang Magbubuhat niini. Kita n'yo? Nagalantaw kita sa pisikal nga mga butang, ug nakalimtan nato ang tanan—ang espirituhanong butang. Mao kana ang atong ginabuhat.

⁹⁷ Karon, ang mga propeta sa Dios, sila. . . anaa kanila ang Iyang Pulong. Mao kana ang hinungdan nga ang mga tawo nagatoo kanila.

Mao kana ang hinungdan kung nganong gisulti sa Dios kang Moises, gisulti Niya dinha sa Genesis, sa makadaghan, sa Exodo, og sa tibuok misunod nga mga basahon, “Kung adunay moanha kaninyo nga espirituhanon, o, propeta. . .” “Karon unsaon nato pag-ila niining mga butanga?” Ang ingon Niya, “Kung aduna siya'y isulti ug kini mahitabo, mosulti og uban pang mga butang, og kini mahitabo, nan toohi ninyo kini.” Kita n'yo? Mao kana ang ilhanan.

⁹⁸ Busa ginahatag Niya ang Iyang Pulong, dili sa mga lider, dili sa mga diktador, kondili sa mga propeta. Si Khrushchev dili usa ka ilhanan ngadto sa kalibutan. Dili, sir. Si Hitler dili usa ka ilhanan sa kalibutan. Apan sa kung asa man, sa usa ka dapit, ang Dios adunay usa ka mapaubsanong propeta nga nagahulat lang sa tukmang panahon. Siya ang ilhanan. Siya ang ilhanan nga mohukom sa kalibutan ug moluwas sa Iglesia. Ang propeta!

⁹⁹ Si Elias mao'y ilhanan sa iyang panahon, ang propetang si Elias. Ngadto sa. . .

Siya usa ka pro- . . . siya'y usa ka ilhanan sa Pulong sa Dios, paghukom sa Egipto ug kaluwasan sa Israel, kung toohan nila siya.

¹⁰⁰ Kadtong makasasalang kapanahonan ni Elias, niadtong gitalikdan sa tibuok Israel ang Dios, nga nangbalik sila sa

pagpakasala. Nakalimot sila sa kahan-ayan. Nakalimtan nila ang mahitungod sa paggiya sa Dios kanila paggawas, ug ang mahitungod sa halangdon nga Jehova nga nagpabuka sa Dagat nga Mapula, ug nagdala kanila pagawas sa Egipto, ug usa ka gamhanang propeta sama kang Moises sa ilang taliwala. Nakalimtan na nila kini.

Nakalimtan nato kini. Kamong mga Methodist nakalimtan n'yo si John Wesley. Kamo nga mga Lutheran nakalimtan n'yo si Martin Luther. Kamo nga mga Baptist nakalimtan n'yo si John Smith. Daghan kanato ang nakalimot na kang Charles Finney, ang pinakabantugan sa ilang tanan.

¹⁰¹ Giingon nga nobentay-siete porsyento sa mga kinabig ni Finney ang nagpadayon. Setenta'y-singko porsyento sa kang Moody mitalikod na sa pagtoo sulod sa usa ra ka tuig. Ug sa kang Wesley, ang holiness nga grupo, nagkaanam na og pagkunhod. Pero si Finney aduna pa'y nobenta'y-siete porsyento. Usa ka gamay, mubo, niwang, upaw nga tawo nga mosaka sa pulpito ug motan-aw sa mga mananambong, nga sama *niana*, ug makuyapan ang mga tawo, tungod kay mipabilin siya didto sa kasagbutan usa ka adlaw hangtud nga ang Espiritu Santo mikunsad kaniya. Iya kanang gibuhat. Siya'y usa ka ilhanan, nga duha ka gatus ka tuig na ang milabay, niadtong ulahing dakung rebaybal nga gipahigayon nila ug ni Wesley kaniadto, ug sa umaabot nga paghukom.

¹⁰² Siya'y usa ka ilhanan, niadtong makasasala nga kaliwatan. Ug kung unsa nga si Elias makabarug didto, maisog ug estrikto, nga nag-inusara lamang, wala siya'y kauban, apan siya ang ilhanan sa Dios.

Ang tanang uban pang mga ministro miuban na kang Ahab, diha sa dalan sa modernismo. Nahimo na silang moderno niadto nga henerasyon. Apan kung unsa nga ang tigulang nga si Ahab, o, ang tigulang nga si Ahab, ug ang tanan niyang dakung bahandi, ug naghatud kadto sa tibuok iglesia ngadto sa Katoli-. . . , o, dili sa Katolisismo, apan mga sumasama ra nga butang, ngadto sa pagsimba sa mga diosdios. Gidala sila sa usa ka kahimtang diin nahimo na silang paling-paling. Ang uban puedeng mosimba sa *niining* paagiha, ug gawasnon sa ilang kaugalingon, "Mahimo man nimo ang bisan unsa nga gusto nimo." Ug napaingon sila sa ingon-ana nga kahimtang.

¹⁰³ Ug kung unsa nga si Elias mibarug didto, maisugon, dala ang MAO KINI ANG GINAINGON SA GINOO. Oh Dios, hatagi kami og mga kalalakin-an nga sama niana. Wala siya nahadlok nga sultihan si Jezebel bahin sa kahimtang niini. Wala siya nahadlok kang Ahab. Wala siya nahadlok nga basin masayup siya. Siya mibarug nga maisugon, ug miduol kang Ahab, ug miingon: "Wala gayu'y bisan yamog ang mahulog hangtud nga moingon ko niini." Amen.

104 Unsa man siya? Usa ka ilhanan alang niadtong makasasala nga henerasyon. Nakita ba kadto sa Israel? Wala. Gikataw-an lamang nila siya, og gibiyabiayan.

Gitagna niya nga magkaaduna og hulaw, nga magkaadunay—adunay kasamok, kagutom, tumang kagutom. Ug maisugon niyang gipropesiya, mibarug nga nag-inusara, nga dala ang MAO KINI ANG GINAINGON SA GINOO. Miingon, “Ginoo, ilang gipamatay ang tanan nga mga tinuod. Ilang gipatay silang tanan. Ako na lang ang nahibilin, nga nagabarug uban sa Imong Pulong.” Mahitungod ba diay sa unsa ang problema? Sa Pulong sa Dios. Gusto ni Elias nga magpabilin gayud sa Pulong. Usa siya ka tinuod nga propeta.

105 Ang ubang mga propeta miingon, “Bueno, wala man kana nagahatag og dakung kalainan. Kabalo ka, wala ma’y kaikag si Jehova niana.”

May kaikag si Jehova. Kinahanglan Iyaha kining Pulong. Ug si Elias maisugon nga mibarug niana nga Pulong, uban sa MAO KINI ANG GINAINGON SA GINOO. Gipadayag kaniya sa Dios ang usa ka gamay’ng tinago, usa ka adlaw. Siya miingon, “Ako adunay pito pa ka libo, Elias, nga ikaw mismo saksi, dinhi. Wala lang sila’y igong kaisog nga mogawas ug ipahayag kini. Nanagtago sila didto sa mga kakahoyan. Apan, bisan pa niana, sa ilang mga kasingkasing, sila’y Akong mga alagad. Wala sila moluhod kang Baalim. Nahadlok sila sa pagbuhat niini. Apan, ginahatagan Ko ikaw og usa ka ilhanan, ug ikaw usa ka ilhanan. Magtindog ka didto, ug barugan mo ang Akong Pulong. Ako ang bahala kanimo. Hatagi sila og ilhanan.” Alleluyah!

Dios, padalhi kami og susama niana, nga mamahimong usa ka ilhanan sa Pulong sa Dios. Ug ang matag saad nga gihimo sa Dios magapaluyo nianang tawhana, tungod kay siya usa ka ilhanan, usa ka nahikalimtan nga ilhanan.

106 Oh, nanagdahum sila, tungod kay si Ahab usa ka bantugan nga hari ug gikahadlok siya sa tanang kanasuran, igo na kadto. Apan si Elias usa ka ilhanan sa Pulong. Ingon niana ang usa ka tinuod nga propeta, usa ka ilhanan sa Pulong. Busa bisan og siya usa ka ilhanan sa Pulong, wala nila siya gitoohan. Wala siya’y bili alang kanila.

107 Usa siya ka ilhanan sa balo, niadtong gipadala siya sa Dios ngadto sa Bukid sa Carmel, didto sa...sa ibabaw sa sapa sa Cherith. Gipaadto siya didto, human nga ang mga uwak nagpakaon kaniya, ug nahubas ang sapa. Miadto siya sa balay sa balo. Pagkatalagsaon nga dapit aron adtoan sa usa ka magwawali! Apan miadto siya didto tungod kay gisultihan siya sa Dios nga moadto.

Apan miadto na diay ang Dios didto, miingon, “Gisugo Ko siya nga pakan-on ka.”

108 Ang balo unta ang mahimong ilhanan. Ang propeta angay lamang nga mahimong ilhanan. Sa dihang, atua sa gawas ang balo, nga adunay igo lang nga harina aron makahimo og usa ka tinapay, ug aron nga makaon niya kini ug sa iyang anak nga lalaki. Igo lang nga tibud. . . Ug igo lang nga lana sa tibud, aron makahimo og gamay'ng mantekilya, aron maluto kini. Miingon ang balo, "Naa ko dinhi sa gawas nanguha og duha ka kahoy."

109 Niadtong makalilisang, mainit, maalimuut nga buntag sa dihang ang usa ka bungoton og tigulang nga lalaki, nga may ubanon nga buhod nga nagdunghay sa iyang likod, ang miduol didto, ug nagasidlak ang iyang upaw nga ulo, nga misandig sa ganghaan, miingon, "Dad-i ko og gamay'ng tubig nga mainom," ug miingon pa, "dugang pa, dad-i ko og usa ka makaon diha sa imong kamot, usa ka tinapay."

110 Miingon ang balo, "Wala baya ko'y igong pagkaon. Ania ako karon, nanguha og duha ka kahoy, aron makahimo'g gamay'ng tinapay alang sa akong anak nga lalaki. Igo na lang kini aron makahimo ko'g usa alang kaniya og alang sa ako. Kaonon namo kini ug mamatay."

111 Ang ingon niya, "Ayaw kahadlok, kay, MAO KINI ANG GINAINGON SA GINOO." Mao kana ang tawo nga atong gikinahanglan. Dili nga, "Karon, *mahimong* mahitabo kini, igsoong babae. *Mahimong* mahitabo kini. Wala ko kabalo." Dili, dili. Sigurado gayud si Elias. "MAO KINI ANG GINAINGON SA GINOO. Kanang tadyaw dili mahutdan, ni mahubsan kanang tibud sa lana, hangtud sa adlaw nga ang Dios magpadala og ulan sa yuta." Amen. Mao kana. Igo na kadto nga ilhanan alang sa maong balo.

112 Siya nagrepresentar sa iglesia karon. Human si Elias nakig-uban kaniya sa makadiyut. . . Siya aduna kaniadto og usa ka gamay'ng anak nga lalaki. Kini nga bata nagmasakiton. Ang iyang sakit hilabihan ka grabe nga wala na'y nahibilin nga gininhawa kaniya. Namatay siya. Dayon unsa ma'y gibuhat sa balo? Nakita na sa iglesia ang maong mga ilhanan. Apan, naunsa, nga sa dihang miabot ang usa ka gamay'ng kalisdanan, gusto dayon niyang basolon ang iglesia tungod niini. Gusto niyang basolon si Elias. Siya miingon, "Ikaw nga tawo sa Dios, karon mianhi ka aron sa pagpahinumtum sa akong mga sala ug sa pagkuha sa kinabuhi sa akong lalaking anak."

113 Gikuha ni Elias ang maong bata, ug gidala kini pasaka ngadto sa lawak diin siya nagatulog, ug gipahigda kini nganha sa iyang kaugalingong higdaanan, gituyhod ang iyang kaugalingon nganha sa bata, miingon, "Ginoong Dios!" Alleluyah! "Ibalik ang kalag niining bataa." Ug nakamata ang bata.

114 Gidala niya kini balik sa ubos. Ang maong babaye mitan-aw sa bata, ug dayon mitan-aw kang Elias, nahibalo na dayon siya nga aduna gyu'y usa ka butang didto. Miingon ang balo,

“Tungod niini nahibaloan ko nga ang Pulong sa Dios anaa sa imong baba.” Amen. Usa siya ka ilhanan para niadtong balo. Sa dihang nakita niya ang gahum sa Dios, Kinsang makapabuhi o makapatay, nagbanhaw sa iyang patay nga anak, miingon siya, “Tungod niini ako nahibalo nga ikaw usa ka tawo sa Dios.” Naila niya kini mismo.

Ang mga kanasuran karon kataw-an lang kini, sama sa ilang gibuhad kaniadto. Dili sila motoo niini. Apan lahi ang nahibaloan niadtong maong babaye. Usa kini ka ilhanan kaniadto, ingon nga siya usa ka ilhanan, sa pagpabangon sa patay nga anak sa bala ngadto sa kinabuhi. Sila nga mga propeta kanunay’ng mga ilhanan sa Dios.

¹¹⁵ Sa dihang si Elias kaniadto nagpatawag og usa ka pagpakigsangka, miingon, “Kung Dios ang Dios, alagara Siya. Kung si Baal dios man, alagara siya.”

Dili ba kana mahimong maanindot nga adlaw alang kang Elias karong panahona? Kung dios ang pulitika, alagara kini. Unsa ma’y atong nakuha sa pulitika? Unsa ma’y atong nabuhad? Wala ta’y nakuha gawas sa daghang kadautan. Wala na’y lain pa.

Tungod niana nawala ang tanan, halos tanan nga mga higala nga aduna kita, sa mga nasud. Dinhi, niadtong miaging semana, nawad-an kita og duha o tulo ka nasud ngadto sa komunismo. Ginapabayad nato og buhis ang mga tawo dinhi ug ginakuha ang ilang salapi, dayon ipadala kini didto aron suportahan kadtong mga tawo nianang mga nasud nga modawat sa komunismo sa higayon nga sila mauswagon na. Kini usa ka pagpakaaron-ingnon. Husto kana.

¹¹⁶ Nagaangkon kita nga mga Cristohanon. Nan kinahanglan manglihok kita ingon nga mga Cristohanon, kung ingon-ana, dili nga suportahan ang ingon-anang mga butang nga sama niana. Aduna og gamay ra kaayo kana—kana . . . Bisan ang ordinaryong tawo nga may-malumong-kasingkasing makahimo niana. Mao kana ang relihiyon. Dili kana kaluwasan.

Daghang mga tawo ang nangalibog sa relihiyon ug kaluwasan. Ang relihiyon mao ang pagpakaon sa mga balo ug mga kabus, ug uban pa. Mao kana ang relihiyon. Apan ang kaluwasan mao ang bag-ong Pagkahimugso, ang mahimugso pag-usab. Lahi ra kana. Relihiyon, ang Mohammedan usa ka relihiyon. Adunay daghang mga relihiyon.

¹¹⁷ Karon, didto sa Bukid sa Carmel, kadtong adlaw sa dihang nagpahigayon siya og pagpakigsangka, ug iyang gitawag si Ahab ug ang linibo nga mga saserdote nga mga sakop sa templo sa ilang mga denominasyon, iyang gitawag sila ngadto sa Bukid sa Carmel, miingon, “Umari kamo dinhi. Atubanga n’yo ako dinhi. Atubangon ko ang tibuok n’yong pundok.” Unsa ma’y iyang gibuhad? Aduna siya’y MAO KINI ANG GINAINGON SA

GINOO. Wala siya mahadlok. Miingon siya, “Paghalad kamo og usa ka baka. Tawga n’yo si Baalim. Ang Dios nga magatubag pinaagi sa kalayo mao ang Dios.”

¹¹⁸ Busa, tibuok adlaw, hangtud . . . gikan sa buntag hangtud pagkahuman sa panihapon, nanaglukso-lukso sila didto sa ilang halaran. Ilang gisamaran ang ilang mga kaugalingon. Nanagtiyabaw sila. Nanagsinggit sila. Si Elias naglakaw pabalik-balik, miingon, “Singgit pa mo og mas kusog pa. Basin nangisda pa siya, o unsa man. Tingali atus siya nga nangayam pa, o unsa man.”

Tungod kay, siya adunay MAO KINI ANG GINAINGON SA GINOO. May kumpiyansa siya. Anaa man kaniya ang Pulong sa Dios.

Igsoong lalaki, igsoong babaye, unsa pa man diay ang gikinahanglan sa tawo gawas sa saad sa Dios? Ang Dios miingon nga Iyang buhaton kini. Si Abraham kadto. Nagsalig siya nga arang buhaton sa Dios kung unsay Iyang gisulti. Nasayod siya nga mahimo gyud kini sa Dios, tungod kay ingon niana man ang gisulti sa Dios.

¹¹⁹ Busa iyang—busa iyang gitawag sila nga motungas didto. Ug mao nga ilang gisamaran ang ilang mga kaugalingon, ug nanagtiyabaw ug nanagsinggit sa tibuok adlaw, hangtud sa panggabiing halad. Dayon, si Elias, tan-awa kung giunsa niya kadto pagbuhat. Ang unang butang nga gibuhay niya mao’y magpaligid didto og dose ka mga bato sa usa ka pagkamada.

Ang Dios wala nagabahinbahin. Ginabahinbahin sa denominasyon ang mga iglesia, pero dili ang Dios.

Ang usa moingon, “Cristohanon ka ba?”

¹²⁰ “Usa ako ka Baptist.” Sama ra kana nga moingon ka nga baboy ka.

¹²¹ Moingon, “Ako—usa ako ka Methodist.” Bueno, mora ra gihapon ka og baboy, usab, ngadto sa Dios.

¹²² Moingon ko, “Cristohanon ka ba?” Aron nga mamahimo kang Cristohanon, gikinahanglan nga ikaw mahimong pareho—ni-Cristo, nga ang Dios nagapuyo diha kaniya, lakip ang Espiritu Santo, pareho niadtong mikunsad niadtong Adlaw sa Pentecostes. Dili kung unsa lang nga emosyon, pero ang buot kong ipasabot kadtong usa ka tinuod nga Pentecostes. Kita n’yo? Husto.

¹²³ “Usa ako ka Pentecostal. Usa ako ka Oneness. Ako’y—ako’y trinidad. Ako’y . . .” Oh, grabe! Pareho lang kana nga nagaingon ka nga ubang butang ka. Wala kana’y kahilambigitan para sa Dios. Nagapabahinbahin ra kana.

¹²⁴ Mao kana ang nahitabo kaniadto taliwala kanila nga mga ministro. Apan gipangkamada ni Elias kadtong dose ka mga

bato, aron ipakita nga ang Dios mao'y usa ka Dios nga labaw kanilang tanan, gipangkamada niya kadtong tanan.

¹²⁵ Busa, sa dihang napangkamada na niya kadto nga sama niana, iyang gipatay ang baka ug gibutang kini sa ibabaw sa halaran, ibabaw sa sugnod. Miingon siya, “Karon, aron masiguro nga walay limbong niini, dal-i ko og dose ka baril sa tubig.” Ug gibasa gyud niya'g tubig ang maong sugnod. Oh, Alleluyah! Gusto niyang ipakita nga Dios ang Dios. Kay, ngano? Siya adunay MAO KINI ANG GINAINGON SA GINOO. Usa siya ka propeta. Anaa kaniya ang Pulong sa Dios.

¹²⁶ Ingon-ana usab ilang—ilang gibuhat niadtong adlawa, kung moingon sila nga papahawaon ka nila sa simbahan, buhaton nila *kini*, o ang *uban pa*, kung nabautismohan ka sa Ngalan ni Jesus, ug tanan nang mga butang nga lahi sama nianang: wala kono'y pulos. Apan MAO KINI ANG GINAINGON SA GINOO.

¹²⁷ Dunay buutan nga tawo, niadtong miaging gabii, ang nakig-istorya kanako, migakos kanako, ug miingon, “Igsoong Branham,” miingon, “Naa ko'y ihangyo nimo.” Miingon, “Kung mahimo unta nga mokompromiso ka'g gamay, niining butang nga imong ginahisgotan.”

Ingon ko, “Unsa man?”

Miingon, “Kining mahitungod sa bautismo.” Miingon pa, “Ang mga kasimbahanan sa Chicago ug sa tibuok palibot niini ganahan kaayo nimo, apan nahadlok sila nga basin hisgotan nimo kana.”

¹²⁸ Ingon ko, “Oo, hisgotan gyud nako kana. Sigurado, mahisgotan ko kana.”

Miingon, “Bueno, mao ra kana ang ilang supak sa imoha.”

¹²⁹ Miingon ko, “Nan dili sila kontra kanako. Tungod kay dili man ako Ang nagsulti Niini. Ang Dios man ang nagsulti Niini. Ginahagit ko ang si bisan kinsa nila nga moari aron pamatud-an nga sayup Kini.” Kita n'yo?

¹³⁰ Miingon, “Bueno, nakita nimo, ikaw—makig-uyon na lang unta ka ug makighiusa.”

Mao usab kana ang ilang gusto kaniadto nga buhaton ni Elias. Amen. Ang Dios wala nagapakig-kompromiso. Wala, sir. Dili siya makig-kompromiso.

Ingon niya—ingon niya, “Karon, Igsoong Branham, gusto kong mangutana kanimo og usa ka butang. Ang Anghel ba sa Ginoo. . .” Miingon, “Kaming tanan nagatoo man sa Anghel sa Ginoo. Ang Anghel ba sa Ginoo ang nagsulti kanimo Niini?”

¹³¹ Ingon nako, “Wala ko'y labot kung unsa ang isulti sa Anghel sa Ginoo. Kung Kini, ang Anghel sa Ginoo, isulti gyud Niya Kana. Apan kung may gisulti Siya nga supak, nan dili Siya ang Anghel sa Ginoo.” Ingon ko, “Bisan unsa pa ang isulti sa

Anghel, o isulti ni bisan kinsa, si Pablo miingon, ‘Bisan pa ang usa ka Anghel gikan sa Langit mowali og bisan unsa nga lahi nga maayong balita nganha kaninyo, ipatunglo siya.’”

¹³² Mga manulonda man ug tanan na, mga tawong karnal ug mapahitas-on, nagahisgot bahin sa mga Anghel. Sila Joseph Smith, Brigham Young, ug tanan nang nagkalainlaing mga kulto, mga Adventista ug tanan nang uban pa, nakita na kono sila ang tanang matang sa mga butang nga sama niana, apan kini kanunay nga supak sa Pulong.

¹³³ Apan, ginapaluyohan sa Dios ang Iyang Pulong. Iya kining Pulong. Miingon ko, “Pulong Kini sa Ginoo. Sigurado kana. Ang tanan kong nahibaloan Siya ang nagtudlo niini kanako. Wala gyud ko nakaeskwela og seminaryo o tulonghaan. Gikan kini Kaniya.” Apan miingon ko, “Kung kini sukwahi. . . Kung kini sukwahi Niana, dili nako Siya toohan. Tungod kay, ang Pulong sa Dios, mao ang una. Bakak ang tanang uban pa.” Sa Pulong sa Dios, Dinha kamo magpabilin.

¹³⁴ Busa, si Elias, pagkahuman niya nga, gihumod ang mga troso sa tubig, og dose ka baril sa tubig. Gibubo niya kini didto. Milakaw siya didto, nga kalmado kaayo. Ngano man? Ang Dios dili man mahimong mamakak. Gisultihan na daan siya sa Dios. Ingon niya, “Ginoong Dios ni Abraham, Isaac, ug ni Israel, itugot nga mapahibalo gyud niining adlaw nga Ikaw ang Dios, ug ako Imong alagad. Ug gibuhat ko kini sumala sa Imong sugo, tungod kay MAO KINI ANG GINAINGON SA GINOO. Gibuhat ko kini tungod kay gisugo Mo ako sa pagbuhat niini, tungod kay kini sumala sa Imong Pulong. Itugot kini nga mahibaloan karon nga Ikaw ang Dios.”

Ug miabot ang Kalayo sa Ginoo, nga giugdaw ang halad, lakip ang mga troso nga gihumod sa tubig, gisunog ang mga bato, ug tanang uban pa, ug giugdaw ang tanan-tanan. Dayon ang Israel misinggit, ang pito ka libo, “Itugot nga ang Dios mailang Dios.”

¹³⁵ Si Elias, pagkaanindot tan-awon kadtong gamayon, tigulang nga tawong huayang kon tan-awon, niwang og nangunot na, naggunit og gamay’ng sungkod sa iyang kamot, gamay’ng tibud sa lana ang nagbitay sa iyang kilid, nakasul-ob og usa ka panit sa karnero. Aba, ila gyud siguro siyang ibutang sa prisohan karong panahona kon maglakaw-lakaw siya sa dalan; pero ginatugotan nila magsul-ob og mga short ang mga kababayen-an; apan siguradong dili na nila tugotan kana, kita n’yo, nga *ingon niana*, pagmogawas.

¹³⁶ Busa, dayon, apan ania sila mi-. . . ania siya nga paadto na didto, patungas niadtong, niadtong bungtod, nga naghawid sa iyang sungkod. Karon, ang Bukid sa Carmel dili kini gamay—gamay’ng bakanteng luna nga nahimutang sa tunga sa disyerto. Kini usa ka daku nga bukid. Ang bakilid niini,

medyo nakaanggulo nga mora'g *ingon niini*, hangtud sa ibabaw, ug makita na didto ang dagat. Ug sila ni Elias ug Gehazi mitungas paingon sa itaas, sa ibabaw. Ug si Elias mihapa didto, ug misugod sa pagtuaw ngadto sa Dios, nga nakatalikod sa Kasadpan, paingon sa adlaw. Tulo na ka tuig ug unom ka bulan niadto, nga walay bisan usa ka tulo sa yamog. Miingon siya kang Gehazi, "Lakaw ug tan-awa kung may nakita ka, og usa ka panganod ibabaw didto sa dagat."

Mitindog si Gehazi niadto nga bukid, mitan-aw *didtong* dapita, miingon, "Wala ko'y nakita og bisan unsa."

¹³⁷ Nagpabilin siya gihapon didto. "Oh Dios, kung kining katawhan naghinulsol na, kung kini sila nangbalik na kanimo, kung andam na sila nga mopahilayo niining tanang mga kabuang ug mobalik sa Imong Pulong, nan Ikaw ang Dios, nga nagatuman sa Imong Pulong."

¹³⁸ Tugoti ako sa pagsulti sa samang butang karon. Kuhaa kining mga denominasyon ug bungkaga kini, ihiklin kining mga pang-denominasyon nga paglahi-lahi, ug ipahibalik ang mga tawo sa Pulong sa Dios, ngadto sa sapsapanan. Akong pamatud-an kaninyo nga adunay Dios nga makatubag sa gihapon pinaagi'g Kalayo.

¹³⁹ Tugoti ang mga katawhan nga motawag sa Dios. Tugoti...?..nga motawag og usa ka tawo. Tugoti ang mga katawhan nga motawag og usa ka propeta. Ipatungha siya sa Dios diha sa esena. Ginahagit ko ang mga kanasuran sa pagbuhat niana. Pagyukbo ug pagtawag sa Dios, para magpadala Siya og usa ka manluluwas, ug tan-awa kung unsay mahitabo. Buhata kini kausa, ang Dios motubag gayud. Ang Dios kanunay gyud nga nagatubag.

¹⁴⁰ Miyukbo ug miingon, "Dios, tugoti kini karong adlaw. Kining mga tawhana batok Kanimo kaniadto. Kining mga tawhana nagkabahin-bahin na ngadto sa tanang matang sa denominasyon. Apan, karong adlaw, Imong gipamatud-an ang Imong Kaugalingon. Ikaw ang Dios. Ug ang mga tawo miingon, 'Isalikway si Baalim.' Ug gipamatay ko ang linibo sa ilang mga pari. Wala na sila nakaali karon, Ginoo. Ang tanan nga mga nagababag wala na, ang gagmay'ng mga ali nga nagpahimulag kanamo."

Gusto sa Methodist nga mosimba na kauban ang Baptist; ang Baptist gusto nang makig-uban sa mga Pentecostal; ang mga matinuuron didto, kadtong pito ka libo nga matinumanon. Apan dili nila kini mahimo. Kung buhaton man gud nila, papahawaon sila sa ilang mga iglesia. Apan wala nabalaka ang uban kanila. Mitambong sila, sa gihapon. Husto kana.

¹⁴¹ Apan tugoti silang tanan nga bungkagon kanang pagpihig ug makighiusa na lang, ug moingon, "Ato nang kalimtan kining tanan dinhi nga mga kredo ug mga katekismo, ug tanan natong

ginabasa. Mobalik kita sa Pulong sa Ginoo.” Bantayi kung unsay sunod mahitabo. Ang Dios magapatindog og usa ka propeta alang kanila, siguradong buhaton Niya kana, nga magahatud Niini mismo ngadto kanila, kung andam sila nga dawaton Kini. Una, kinahanglan nilang mag-ampo. Ang Dios nagahulat.

¹⁴² Dili ba katingad-an nga gusto sa Dios nga ang mga tawo adunay bahin niini? Kaniadtong mitan-aw si Jesus sa mga alanihon, Siya miingon, “Hinog na ang alanihon. Diyutay ra ang mga mamumuo. Pag-ampo kamo sa Ginoo sa alanihon,” nga mao Siya mismo. “Pag-ampo kamo Kanako, nga Ako magpadala og mga mamumuo ngadto sa Akong alanihon.” Aduna gyud ka’y bahin nga kinahanglan mong buhaton. Ang Dios nagahulat sa Iyang Iglesia nga motawag Kaniya. Kanunay na Niyang ginabuhat kini. Ang Dios nagahulat karon sa mga tawo nga motawag sa Iyang alagad nga kini mamuhat na. Ug ang maong alagad dili pa makapamuhat gawas kon mangamuyo ang mga tawo alang niini.

¹⁴³ Ang Israel dili makapamuhat didto, nga inubanan og mga ilhanan ug mga katingalahan, hangtud nga sila miyukbo ug nag-ampo alang sa usa ka manluluwas. Aduna na ang Dios og Iyahang manluluwas. Ang Dios aduna na’y propeta nga nagahulat na lang didto sa kamingawan, gitago siya didto sulod sa kwarenta ka tuig, na naghulat nga sila matul-id, ug mag-ampo. Ug sa dihang sila nangatul-id na ug misugod sa pag-ampo, gipadala dayon sa Dios ang maong manluluwas.

Pagabuhaton pud sa Dios ang samang butang karong adlawa, kung magkahiusa lamang ang mga tawo, mag-ampo. Husto kana.

¹⁴⁴ Usa siya usa ka ilhanan para niadtong mini nga mga propeta ug kang Ahab, ingon nga siya alagad sa Dios. Usa siya ka propeta sa Dios. Dayon, usa usab siya ka ilhanan ngadto sa Israel, nga mahimo niyang isira ang mga langit o ablihan ang mga langit, pag-gusto niya. Siguradong mabuhat niya.

Sultih ko’g usa ka tawo nga makasira sa mga langit, ipakita kanako ang usa ka tawo nga makaabli sa mga langit, gawas sa Dios. Ug ang Pulong sa Dios, o, ang Pulong sa Dios nagauban sa mga propeta.

¹⁴⁵ Si Micheas, usa ka ilhanan ngadto kang Josaphat. Si Micheas mao’y usa ka ilhanan kang Josaphat, nga ang Dios aduna kanunay’ng giandam nga usa ka tinuod nga propeta.

¹⁴⁶ Karon matikdi. Siya adunay upat ka gatus ka mga propeta, si Ahab, ug iyang gipatawag kadtong upat ka gatus ka mga propeta. Ug nagkahiusa sila nga nag-ingon kaniya. Ug bisan pa niana, sa kinasuloran sa kasingkasing ni Josaphat, nga usa ka tawo sa Dios, nasayod siya nga aduna gyu’y sayup. Nasayod siya nga aduna gyu’y sayup. Miingon siya, “Wala ka na ba’y usa pa?”

¹⁴⁷ “Human nianang upat ka gatus nga nagatindog dinha?” Ingon niya, “Mga propeta man kining tanan, mga propeta ni Jehova.” Anaa dinha ang—ang mga Methodist, ang mga Baptist, ang mga Presbyterian, ang Unitarian, oh, grabe, grabe, mga Trinitarian, ug tanan nang nagkalainlaing matang. “Napaanhi nato silang tanan dinhi, ug ingon nga nagkahiusa nagaingon sila nga kini mao ang pinakagamhanang nasud nga nagalungtad karon. Wala kita’y angay kahadlokan.” Sama sa usa ka gamay’ng bata nga nagataghoy-tagho sa sementeryo, kabalo na mo, bisan nga siya nahadlok. Ayaw kabalaka niana.

Miingon, “Apan wala ka na ba’y usa pa?”

Miingon, “Oh, oo, aduna pa’y laing usa dinhi, apan,” miingon, “Akong gikaligutgotan siya.” Kita n’yo? Miingon, “Kanunay’ng dautan ang ginasulti niya mahitungod niining nasura. Kanunay niyang ginasulti nga adunay dautan nga mahitabo kanamo.”

¹⁴⁸ Si Josaphat miingon, “Gusto ko—gusto ko siyang patalinghugan.” Oh, oo!

Unsa man siya? Usa ka ilhanan. Bisana pa kadaghang organisasyon o denominasyon, ang Dios aduna gihapo’y propeta nga nagapabilin sa Pulong.

¹⁴⁹ Nasayod si Josaphat nga si Ahab paingon na sa kalaglagan, tungod kay kadtong tinuod nga propeta, si Elias, nga usa kaniadto ka ilhanan sa mga kanasuran, nag-ingon, “Ang mga iro motilap sa imong dugo, pagmoanhi ka.” Husto kana. Siya nasayod nga moabot gyud kana kang Jezebel ug Ahab. Nahibalo siya nga sigurado gyud kini. Kita n’yo?

¹⁵⁰ Ug si Micheas, si Micheas miingon. . . Sila—sila miduol kaniya ug miingon, “Karon, sultihan ta ka, kung gusto nimong maapil sa sunod nga asosasyon, sultihan ta ka kung unsay imong buhaton. Mouyon ka lang nga husto kining tanan nga mga magwawali. Kita n’yo? Isulti mo lang sa hari, “Tumungas ka.”” Ug miingon pa, “Uyonan mo lang.” Miingon, “Isulti ko kanimo kung unsa ang among buhaton. Buhaton namo. . . Sigurohon gyud namo nga makasulod ka sa among organisasyon, kung buhaton mo lang kana, kita n’yo, kung makipagkompromiso ka lang sa pipila ka mga butang dinhi nga imong gihisgotan. Magpakita ka lang didto, moadto, makig-uyon kanila, makig-uban kanila.” Huh-huh! Mahunahuna ba diay n’yo ang usa ka tinuod nga propeta sa Dios nga mopahilayo sa Pulong sa Dios? Mahunahuna ba ninyo?

“Bueno,” kadtong mga tawo miingon, “apan, nakakita kami’g usa ka panan-awon,” kadtong upat ka gatus ka mga propeta. “Nasayod kami. Kami mga propeta. Nasayod kami, kay propeta man kami.”

¹⁵¹ Miingon si Micheas, “Wala ako nagduhaduha nga nakakita mo’g usa ka panan-awon. Wala gyud ko nagduhaduha niana

bisan gamay, nga ang inyong nakita, usa ka panan-awon, apan wala kini nahiuyon nianang Pulong.” Amen. Miingon, “Nakakita ko’g usa ka panan-awon, usab.” Amen. Oh, kaloy-i! Usa siya ka ilhanan. Usa siya ka ilhanan. Miingon siya, “Nakita ko ang usa ka panan-awon, ug nakita ko ang Israel, nga sama sa mga karnero, nga nagkatibulaag didto sa kabungturan, nga walay magbalantay.”

Ug kining daku-daku nga tigdumala, ang obispo, miduol ug gisagpa siya sa baba. Miingon, “Diin man mipaingon ang Espiritu sa Dios sa dihang migula Kini gikan kanako?”

¹⁵² Ingon niya, “Makita ra nimo kung naa ka na sa bilangoan. Makita ra nimo.”

Siya, si Ahab miingon, “Ibalhog kanang tawhana sa bilangoan. Pakan-a siya niining tinapay sa kasakit, ug hatagi siya og tubig sa kasakit, nga mainom.” Miingon pa, “Sa diha nga ako makabalik sa pakigdait,” miingon, “nan ako na ang bahala kaniya.”

¹⁵³ Mibarug didto ang tigulang nga si Micheas nga dala ang MAO KINI ANG GINAINGON SA GINOO. Miingon siya, “Kung makabalik ka pa, ang Dios wala magsulti kanako.” Hum! Mao kana. Unsa man siya? Usa siya ka ilhanan, nga ang mga propeta ni Jehova, ang mga propeta sa Dios, nagapabilin gayud sa Pulong sa Dios.

¹⁵⁴ Kung aduna kamo’y propeta nga nagaingon nga kinahanglan kamong magpabautismo sa mga titulo nga “Amahan, Anak, Espiritu Santo,” usa gayud kana ka mini nga propeta. Kung moingon kamo nga adunay usa ka propeta sa taliwala ninyo, nga nagaingon, “Tulo ang Dios,” usa gayud kana ka mini nga propeta. Walay bisan unsa nga Kasulatan alang niana. Mao gyud. Pero ang tinuod nga propeta sa Dios magapabilin gayud niana nga Pulong. Ug kung ang panan-awon niya mosukwahi niana nga Pulong, dili gayud siya tinuod nga propeta nga gikan sa Dios.

¹⁵⁵ Wala gayud, diha sa Biblia, nga nabautismohan sa titulo nga “Amahan, Anak, Espiritu Santo.”

¹⁵⁶ Tan-awa si Pablo, didto sa bilangoan, usa ka gamay’ng Judio, nga mora’g sungo sa agila ang ilong, upaw, nga nagahigda didto, nabalhog sulod sa baynte ka tuig, sa usa ka Romanhong bilangoan. Iyang gisulat kining mga sinulat. Karon, unsa ma’y hunahuna ninyo nga ginahunahuna sa mga babayeng magwawali mahitungod kang Pablo, niadtong miingon siya, “Pahiloma silang mga babaye sulod sa mga iglesia. Wala ko sila ginapahanugotan sa pagsulti”? Siguro nakiglantugiyay gyud sila kaniya.

Unsa ma’y hunahuna n’yo ang ginahunahuna sa mga obispo, silang mga obispo, sa dihang gisulti niya kadtong tanang nagkalainlaing nga butang, “Hunonga *kini* dinhi, ug *kini* dinhi,

tanang nga *ingon niini, ingon niana,*” nga mga gipangsulti ni Pablo kanila? “Kinsa man gyud diay, kanang tawhana, kanang tawong nabalhog sa bilanggoan?” Pero natagbo niya si Jesus. Nasayod gyud siya sa iyang ginasulti.

Ug gikan sa mao ra nga pundok, human sa kamatayon ni Pablo, sila human niadtong nagtukod, gikan niadtong pundok sa mga obispo ug mga kadagkoan, paingon ngadto sa Konseho sa Nicaea, ug mao kadto ang nagtukod sa iglesiang Katoliko, nga mipahilayo gikan sa Pulong sa Dios. Dinha naggikan ang inyong “Amahan, Anak, Espiritu Santo.” Ginahagit ko ang si kinsa man, sa bisan asa, sa bisan unsang nasud, nga ipanghimakak kini.

¹⁵⁷ MAO KINI ANG GINAINGON SA GINOO. Ang pagbautismo sa titulo nga “Amahan, Anak, Espiritu Santo” bakak. MAO KINI ANG GINAINGON SA GINOO. Ginamandoan ko ang matag usa kaninyo, nga mga anaa dinhi o dinha sa teyp, nga wala pa mabautismohi sa Ngalan ni “Jesus Cristo,” magpabautismo kamo pag-usab sa Ngalan ni Jesus Cristo.

¹⁵⁸ Si Pablo, diha sa Mga Buhat, 5:9, o, 19:5, miingon, “Nadawat na ba ninyo ang Balaang Espiritu Santo sukad kamo mitoo?”

Miingon sila, “Wala kami mahibalo kon aduna ba diay Balaang Espiritu.”

Miingon, “Ngadto sa unsa man diay kamo nabautismohan?”

¹⁵⁹ Miingon sila, “Kami nabautismohan na,” apan dili sa Cristohanong bautismo.

“Amahan, Anak, ug Espiritu Santo” dili kana Cristohanong bautismo. Wala gyu’y Cristohanon nga nabautismohan sukad nga sama niana, diha sa Biblia o sulod sa mga gatusan ka tuig pagkahuman sa Biblia. Usa kini ka kredo sa Katoliko, ug dili usa ka Doktrinang Cristohanon. Ipakita kanako diha sa Biblia. Kini usa ka—kini usa ka pagpanglimbong. Pagpamuhat kini sa mga yawa.

Wala ko magpasabot nga ingon niana na ang mga tawo nga nabautismohan sa ingon nianang paagi. Daghan pa’y mga tawo ang Dios dinhang dapita karon nga wala lamang nasayod kung unsay mas maayo.

¹⁶⁰ Pero, miabot na ang takna, nga kinahanglan natong mobalik sa Pulong kung nagalaum kita nga ang Dios magapamuhat niining panahona sama sa Iyang pagpamuhat kaniadto.

¹⁶¹ Gisultihan ko ang akong inahan niadtong himalatyon na siya, sa wala pa siya namatay. Ingon ko, “Ma, niadtong nahimo na kong usa ka Cristohanon, ingon nga batan-on pa, nagsugod ko sa pagpangita ug nakaplagan nako. Nasayod ko nga adunay Dios, gikan sa mga panan-awon nga nahibaloan na nimo, ug sa mga butang nga nahitabo sa akong tibuok kinabuhi.” Ingon ko, “Dayon akong nasayran nga ang simbahang Katoliko miingon,

‘Kami ang iglesia. Dili igsapayan kung unsay ginaingon sa Biblia. Nagatoo man mi nga maayo pud Kana, apan, kami ang iglesia. Kung unsay among isulti, aprobado sa Dios didto sa Langit.’ Ug busa, kaniadto, ginabuhat nila kini sa *ingon niining* paagi. Usa kana ka pundok. Ang mga Lutheran miingon, ‘Sayup sila. Ingon *niini* ang among pagtoo niini.’ Ang mga Baptist moingon, ‘Sayup silang tanan. Ingon *niini* ang among pagtoo niini.’ Ug adunay gatusan ka ingon niana nga mga pundok.”

Aba, unsaon man nimo pagbaton og pagtoo? Kinsa man sa ila ang eksakto? Adunay usa lamang ka Butang nga husto. Wala pa ko nasayod Niini kaniadto.

¹⁶² Ingon ko, “Ma, gibalikan nako ang Biblia ug nasayran nako kung unsa ang pamaagi niadtong unang mga apostoles, kung unsa nga matang sa iglesia aduna sila kaniadto, kung giunsa nila pagpanudlo, ug ang mga butang nga ilang gibuhat. Gibuhat nako kini sa eksaktong paagi nga ilang gibuhat kini kaniadto, sa paagi nga giingon sa Biblia, ug naangkon nako ang pareho ra nga mga resulta.” Amen. Pasayloa ko sa maong panultihon, apan ang—ang pamatuod sa puding anaa sa pagkaon niini. Tinuod kana. Nakab-ot ko ang mao ra nga mga resulta nga ilang nakab-ot kaniadto. Oo.

¹⁶³ Busa, dili gyud modaku ang inyong pagsalig sa usa ka butang nga adunay siyam ka gatus ka nagkalainlaing mga paagi, sa pagpaingon *niini* nga direksyon ug *niana* nga direksyon.

Dayon akong nasayran, diha sa Biblia, nga si Jesus miingon, Mismo, “Kung adunay tawo nga motaktak og usa ka Pulong, o usbon Kini, sa niini nga Basahon; si bisan kinsa nga magdugang og bisan unsa Niini, o motaktak og bisan unsa gikan Niini; siya usab pagataktakon, ang iyang bahin sa Basahon sa Kinabuhi.” Nga nagapakita nga nakasulat diay ang iyang ngalan dinha, oo, apan pagatangtangan kini. Oh!

¹⁶⁴ Kinahanglan nga mobalik kita niini nga Pulong. “Ang mga langit ug yuta mangahanaw, apan ang Akong Pulong dili gayud mapakyas.” Oo, sir. “Ang pulong sa tanang tawo bakak. Ang Akoa ra’y tinuod,” ang ingon ni Jesus. Magpabilin kita sa Pulong. Oo. Oh, grabe! Oo.

¹⁶⁵ Nasayod si Josaphat nga ginatipigan sa Dios ang usa ka tinuod, matuod nga propeta nga nagapabilin sa Iyang Pulong ug dili Kini ikompromiso. Dili, sir.

¹⁶⁶ Nagpabilin siya mismo Niini. Bisan pa’g upat ka gatus ang batok kaniya, sa ilang mga panagna, usab. Apan ang iyaha mao ang Pulong sa Diyos, nga inubanan og samang mga ilhanan ug ingon nianang mga butang.

Ug ako moingon, karon, ang atong gikinahanglan karon mao’y usa ka tawo, usa ka propeta, nga motungha sa atong taliwala, nga magapabilin sa Pulong sa Dios bisan unsa pa ang isulti sa uban, o bisan unsa pa ang gisulti sa denominasyon.

¹⁶⁷ Walay nakigtimbayayong kaniadto kang Micheas. Walay nakigtimbayayong kang Moises. Walay nakigtimbayayong kang Noe. Wala man lang, ni usa kanila kaniadto, ang nakabaton og pagpakigtimbayayong. Ang tanan batok kanila. Apan mga ilhanan sila para niadtong dautan nga mga panahon sa dili pa ang Dios mopadala og paghukom. Ug ginatuman sa Dios ang Iyang Pulong ug gusto nga ang Iyang Pulong pagatumanon usab sa Iyang mga katawhan. Dalaygon ang Ginoo.

Karon, paingon na kita sa paghinapos, sulod sa pipila na lang ka minuto. Karon paminaw pag-ayo.

¹⁶⁸ “Aduna kaniadto og usa ka tawo nga gipadala gikan sa Dios nga ang ngalan mao si Juan,” usa ka ilhanang-propeta. Sa wala pa si Jesus mianhi sa yuta, aron ipahayag ang Iyang kaugalingon, nagpadala Siya og usa ka propeta una Kaniya. Gibuhat ba Niya kana kaniadto? Siya nagpadala na kaniadto og usa ka propeta, si Elias sa Daang Tugon, kini usab siya gipropesiya nga moabot diha sa gahum ni Elias sa Daang Tugon. Siya mamahimong usa ka ilhanang-propeta nga si Jesus moabot na, nga adunay magaabot nga usa ka Mesias.

¹⁶⁹ Ug si Juan mitungha gikan sa kamingawan, siya usa ka ilhanan kaniadto nga moabotay na ang Mesias. Sa dihang mitungha na si Juan, angay nga maila unta sa Israel, ang ilang mga propeta.

Dinha nagakapakyas ang mga tawo. Wala sila nagatoo sa ilang mga propeta. Wala sila nagatoo. “Wala kami nagatoo nga husto ang gisulti ni Pedro, niadtong Adlaw sa Pentecostes.” Wala sila nagatoo nga husto kadto. Wala sila mitoo kung unsa ang gisulti ni Pablo, sa samang butang nga gisulti ni Pedro. Miingon, “Kung ang usa ka Anghel gikan sa Langit magwali og bisan unsa nga lahi nga pulong, ipatunglo siya.” Dili sila motoo niana. Kita n’yo? Dili sila motoo niana.

Ug wala sila nagatoo sa ilang mga propeta. Kung nasayod pa sila, nasabtan unta nila nga si Isaias miingon, “Adunay tingog sa usa ka tawo nga nagasinggit diha sa kamingawan, nga magaadam sa dalan atubangan sa Ginoo.” Nasayod unta sila niini. Usa siya ka propeta, usa ka prinsipe sa mga propeta. Gisultihan niya sila, apan wala sila mitoo niini. Wala, wala. Miingon siya, “Adunay moabot nga Mesias.”

¹⁷⁰ Kining tawhana usa ka tawo nga gipadala gikan sa Dios. Oh, mga igsoon! Wala siya’y sumusunod. Gihatagan siya sa Dios ug mga sumusunod, usa ka gamay’ng panon, sama sa Iyang gibuhat kang Elias kaniadto. Gihatagan siya sa Dios og iyahang mga sumusunod. Wala niya kini nakuha gikan sa kung unsang pulitikanhong organisasyon. Iyang giwali ang Pulong, nagpabilin sa Pulong sa Dios, ug gihatagan siya sa Dios og gamay’ng panon. Si Elias nagpabilin sa Pulong sa Dios. Gihatagan siya sa Dios og gamay’ng panon.

171 Kining tawhana walay mga tigpaluyo. Wala siya'y mga sumusunod, walay mga tigpaluyo, dili miyembro sa bisan unsa mang denominasyon, wala mangayo ug walay gikahadlok. Ingon niana si Juan. Ngano man? Siya usa ka tawo nga gipadala gikan sa Dios. Mao kana ang hinungdan nga milahutay siya. Siya ang Elias nga nagatindog didto, aron pamatud-an sa mga tawo nga moabot na ang Mesias. Siya miingon, "Ako mao ang tingog niya nga nagasinggit diha sa kamingawan, ingon sa gisulti ni propetang Isaias. Pangandam alang sa pagsugat sa Ginoo."

172 Silang mga Fariseo ug mga Saduceo nanagtindog didto ug nanaglalisyah bahin sa ilang mga bisti ug uban pang mga butang. Samtang sila naglalisyah ug nagkasamok mahitungod niini, diha mismo sa ilang taliwala miabot ang Mesias, nga naglakaw.

173 Miingon si Juan, "Tan-awa, ania Siya." Alleluyah! Tan-awa ninyo si Juan. Iyang gipaila Siya. "Ania Siya. Nagatindog Siya sa inyong taliwala karon."

Niadtong tungora, midahunog ang kalangitan. Si Jesus milakaw paingon sa tubig. Ug si Juan nagpamatuod, nga iyang nakita ang Espiritu sa Dios, sama sa usa ka salampati, nga mikunsad. Dihay usa ka Tingog nga nagadahunog, "Kini ang Akong pinalangga nga Anak kang kinsang gikahimut-an Ko nga puy-an." Oh, grabe, grabe!

174 Miingon si Juan, "Karon kinahanglan ko nang mokunhod. Siya ang kinahanglan mopataas." Oh, grabe nga propeta, usa ka ilhanan sa Israel! Oo, sir.

175 Siya usa ka tawo nga gipadala gikan sa Dios, bisan nga ang iyang amahan usa ka sacerdote. Oh, oo. Ang iyang amahan, nga si Zacarias, usa ka pari. Apan namatikdan ba ninyo? Dili motugot ang Dios nga ang maong propeta mahilambigit sa ilang mga organisasyon. Mahimo man unta siyang ipadala sa iyang amahan ngadto sa eskwelahan sa teolohiya, ngadto sa bantugang *Ingon niini-ug-ingon niana* nga denominasyon, aron himoon siyang usa ka maayong ministro, kabalo mo, ug bansayon siya pag-ayo, ug hatagan siya og daghang ingon nianang mga butang nga dili siya angay'ng magkaaduna. Apan wala itugot sa Dios nga mahugawan ang iyang kalag. Nasabtan ba ninyo? Dili Niya mapahanugotan ang iyang alagad nga mahilambigit sa mga organisasyon. Dili siya miyembro sa bisan unsa niadtong, sekta, Fariseo, Saduceo, o mga maka-Herodes, o bisan unsa man niadto. Dili motugot niini ang Dios.

176 Natawo siya sa usa ka talagsaon nga pagkahimugso. Siya usa ka talagsaon nga bata. Usa siya ka propeta. Ang iyang amahan usa ka pari, apan ang Dios wala magtugot kaniya nga malambigit sa tanan nilang mga minaut, nga mga Fariseong relihiyon ug uban pang mga butang. Unsa man ang gibuhay sa Dios? Iyang gidala siya ngadto sa kamingawan ug gibansay siya didto.

¹⁷⁷ Grabe kadto nga pagbansay! Amen. Gibansay Niya siya pinaagi sa kasinatian. Mao kana ang pinakamaayong paagi, sa pag-ila sa Dios. Pagkagawas niya didto, nasayod gayud siya kung unsa ang gisugo kaniya. Gipanghimatud-an sa Dios kadto nga sugo.

Asa man kadto gipanghimatud-an sa Dios? Didto sa suba. Karon, kung maikonekta nimo ang kahulugan sa mga panghitabo. Kita n'yo? Didto sa suba!

Miingon, "Ako mao ang tingog sa usa nga nagasinggit sa kamingawan, 'Andama ang dalan sa Ginoo, himoang tul-id ang Iyang dalan.'"

¹⁷⁸ Si Juan, usa ka tawo nga gipadala gikan sa Dios. Dili motugot ang Dios nga siya mahugawan niadto. Iyang gibansay siya didto sa kamingawan, ang Dios mismo. Iya siyang gibansay dili pinaagi sa ilang mga tulonghaan, dili pinaagi sa ilang teolohiya. Kung Iyang gitugotan siya, nadoktrinahan na unta si Juan sa mga pagtulon-an sama sa inyong nakat-onan gikan sa maong mga tulonghaan karon, sa tanang nagkalainlaing tulonghaan. Dili lamang ang mga Presbyterian, Baptist ug Methodist, kondili bisan ang Pentecostal nga mga tulonghaan, sama ra ka ngil-ad, bisan unsa kanila nga mga eskwelahan sa teolohiya, ipagawas gyud sila dinha. Oh!

¹⁷⁹ Ang Iyang pag-abot, gisulti na sa Espiritu, pinaagi ni Isaias. Ang Iyang pag-abot, ang pag-abot ni Juan, gitagna na diha sa Kasulatan. Ang Isaias 40:3 nag-ingon, "Ako mopadala sa Akong mensahero una Kanako, moandam sa dalan," o, Malaquias 3 kana. Miingon. . . Ang Malaquias 3 miingon nga Iyang ipadala ang Iyang mensahero una Kaniya. Ang propeta, ang katapusang propeta, naghigot bahin kaniya. Ang katapusang Basahon naghigot pud bahin kaniya. Hinumdumi, ang katapusang Basahon sa Daang Tugon nag-ingon nga si Elias moabot ngadto sa mga anak sa Israel sa dili pa ang pagpakita sa Mesias.

¹⁸⁰ Andam na ba mo? Ang katapusang Basahon sa Biblia, ang Pinadayag, nagapakita kanato nga adunay pagbalik niya sa katapusang adlaw, ngadto sa Gentil nga iglesia, usa ka ilhanan. Naunsa nga nasaylo-an nila kini! Siya gitagna na nga moanhi pag-usab, sa dili pa ang makalilisang ug ang ikaduhang Pagbalik sa Ginoo. Sa Mal-. . . Sa Malaquias sa ika-4 nga kapitulo, sa Pinadayag usab, sa ika-3 nga kapitulo, nagasulti kanato nga siya moanhi sa katapusang mga adlaw. Kanang mao ra nga tawo, nga mobarug diha sa kal-ang alang sa katawhan, uban ang gamay'ng panon nga ihatag sa Dios kaniya, moabot siya sa katapusang mga adlaw. Mao'y giingon sa Dios. Siya mahimong usa ka ilhanan niining Gentil nga nasud, nga ang iyang panahon nahuman na.

¹⁸¹ Ug, hinumdumi, sa dihang magpakita na siya sa esena, haduol na gyud ang panahon. Mag-ampo kita aron ipadala na siya sa Dios. Haduol na ang panahon.

¹⁸² Sa dihadiha nga natapos ang ministerio ni Juan kaniadto, mipakita dayon ang Mesias Mismo. Ug sa dihadiha nga kining usa nga halangdon moabot sa katapusang mga adlaw, inig kahuman sa iyang ministerio, igapadayag dayon sa Mesias ang Iyang Kaugalingon. Ingon niana gyud ang mahitabo. Haduol na ang panahon, busa mag-ampo kita pag-ayo. Kinahanglan magsugod na kamo sa pag-ampo.

¹⁸³ Ang iyang hinatag-sa-Dios nga ilhanan niining panahona mao'y magpamatuod kung unsa siya. Ang tanan mahibalo niini. Ang Dios magapamatuod niini. Magapakita siya og mga ilhanan ug mga katingalahan nga wala pa mahitabo sa kalibutan, pinaagi niini. Wala ko nagtumong niadtong pag-ulpot ulpot, pagkurog-kurog, ug pagsulti og laing mga pinulongan. Siya pagapaluyohan sa Pulong sa Dios, sama niadtong tawhana. Ngano man? Siya gitagna man nga moabot, diha sa Malaquias 4 ug Pinadayag 3, mao nga siya moabot gayud. Walay makapugong kaniya; moabot gyud siya. Amen. Moanhi gyud siya dinhi. Amen. Payukboa lang ang mga tawo ug magsugod og sangpit sa Dios, ug matikdi kung unsay mahitabo. Masaksihan n'yo siya nga magpakita nga inubanan sa gahum. Oo, sir.

¹⁸⁴ Sumala sa Kasulatan, ang iyang ilhanang-Mensahe mao'y "ang pagpasig-uli." Unsa ang iyang... Unsa ma'y atong timailhan nga mao na kana siya? Unsaon nato pagkahibalo nga kini mao na'y matuod?

¹⁸⁵ Kabalo mo, gipangutana pud kana sa Israel usa ka higayon kaniadto, diha sa Deuteronomio, ika-20 nga kapitulo... Ika-20 nga bersekulo, nagatoo ako nga mao kana. Miingon siya, "Unsaon nato pagkahibalo nga kini mao na'y usa nga matuod?"

Unsaon nato pagkahibalo? Ang Dios nagaingon kanato nga mailhan ra nato siya. Unsa diay iyang buhaton? "Iyang ibalik ang mga kasingkasing sa mga anak ngadto sa orihinal nga pentecostes nga Mensahe niadtong sinugdanan." Oh, grabe!

¹⁸⁶ Usa ka ilhanan nga wala panumbalinga, ang tinuod nga ilhanan, ug wala nila kini makita. Kanunay nilang dili makita.

¹⁸⁷ Balik sa tinuod nga Iglesia, sa tinuod nga Mensahe! Siya mobarug nga mag-inusara batok sa denominasyon, maisugon ug walay kahadlok, nga dala ang MAO KINI ANG GINAINGON SA GINOO. Dili siya makipag-kompromiso sa bisan unsang denominasyon. Dili siya makiglanggikit ni bisan unsa kanila; dili mogamit og impluwensya sa wala'y hinungdan nga katuyoan. Siya'y diretso mismo sa Pulong, sa MAO KINI ANG GINAINGON SA GINOO. Panghimatud-an sa Dios ang iyang ministerio pinaagi sa mga ilhanan ug mga katingalahan, gamhanang mga pagpadayag sa Pulong, ug igahatud kini ngadto sa mga tawo. Pagkahaduol na kaayo kana nga adlaw! Sama sa... Mobarug Siya sama sa pagbarug nila Pedro ug Juan, ingon, niadtong Adlaw sa Pentecostes.

Human sa Pentecostes, niadtong napuno sila sa Espiritu Santo, nga nabautismohan na didto, mibarug sila didto sa hukmanan sa Sanhedrin. Mibarug sila didto uban ang tanang kaisog sa pagbarug. Kaniadtong, miingon ang mga tawo, “Ginadid-an kamo namo sa pagpanudlo sa Ngalan ni Jesus, dili na puede.”

¹⁸⁸ Miingon siya, “Husto ba nga kami mamati kaninyo, o sa Dios? Kamo mismo ang maghukom.” Mga wala’y igong himbanganaagan, mga wala gani’y edukasyon. Amen. Mga propeta sila. Sila mga propeta nga gidihogan sa Dios. Mga ilhanan sila sa Balaang Espiritu. Mga propeta sila. Nasayod gyud sila.

¹⁸⁹ Sama sila ni Juan. Atua sila didto niadtong Pentecostes ug aduna sila’y nakaplagan.

Dili sila sama sa kadaghanan sa atong mga magwawali karon, mga nagpakaingon, nagpasigarbo kung unsa ka daku ang atong organisasyon, kung unsa na kita kadaghan diha sa atong dagkung mga pundok. “Nagpadayon kami isip usa ka daku nga organisasyon. Nagapahigayon kami og dagkung pangmisionaryong buluhaton.” Oh, kaluoy! “Oh, aduna kami’y mas daghang mananambong kay sa tanang uban pa kanila.” Unsa man kini? Usa kana ka pulitikanhong pagpangdani. Gusto ko nga maminaw kamo pag-ayo, sa sunod nga duha, tulo ka minuto. Usa ka pulitikanhong pagpangdani.

¹⁹⁰ Sigurado aduna ko’y nasulti, pipila ka minuto ang milabay, kabalo na mo kung unsay akong ginahisgotan. Usa ka ilhanan nga gitagna na. Gibiyaan ko kini, anaa na kini sa inyong sabakan. Kita n’yo? Bueno, dili lang kaninyo nga ania karon, kondili niadtong magapaminaw pa lang niini. Anaa na kini sa inyong sabakan. Buhata ang bisan unsa nga gusto ninyo niini. Pag-ampo kamo, ug tan-awa ang Dios nga nagalihok sa esena. Tan-awa Siya nga nagatuman sa Iyang Pulong. Nagahulat siya.

¹⁹¹ Paghisgotan ang bomba atomika, malisang ang mga tawo; ug sa Pentagon, wala sila mahibalo kung unsay buhaton; ug dihay mga misteryosong ilhanan diha sa kalangitan, mga flying saucers, ug tanan nga gitagna na sa Dios: Panahon na para nianang si Elias, (anaa ra siya sa kung asa nga dapit), nga motungha sa esena.

¹⁹² Itugot nga ang mga tawo, itugot nga kanang gamay nga panon, kanang gamay nga mga salin nga igahatag sa Dios kaniya, tugoti kanang gamay nga salin nga motawag sa Dios, ug matikdi kung unsay mahitabo. Magkaaduna’y nasudnong pagpakigsangka. Magkaadunay gahum nga wala pa gayud nila masaksihan sukad. Ang problema niini, nianang higayona, ulahi na kaayo alang kanila. Ang mga pultahan pagasirhan na. Busa, hinumdumi, ania na kita sa katapusan nga panahon. Pag-ampo.

193 Tan-awa karon ang gitawag nato nga ministerio. Unsa ma'y atong nakab-ot? Karon, sa paghinapos, gusto kong isulti kini. Unsa ma'y nakab-ot nato? Wala ta'y nakab-ot. Pipila sa atong labing bantugan nga mga lider, ang atong labing bantugan nga mga ebanghelista; usa sa atong bantugan nga mga ebanghelista miingon, "Kung makakita ko og napulo ka porsyento niadtong akong mga kinabig nga magpabilin, sa usa ka tuig, mapasalamaton na kaayo ko niana." Apan, sa panahon ni Finney bisan tuod dili pa kaayo kadto dugay, aduna siya'y nobentay-siete porsyento sa mga kinabig niya ang milahutay.

Si Pablo kaniadto adunay gatus og kapin ka gatasan, gatus og kapin ka gatasan ka mga kinabig. Pag may usa nga maluwas, ug, napuno gyud siya, igsoon, molakaw siya ug isangyaw kini sa usa pa; dayon kanang usa pa isangyaw pud niya kini sa laing usa pa; ug kining laing usa pa isangyaw na pud kini sa uban; hangtud moabot kini og minilyon. Ngano man? Aduna gyud sila'y nabatonan. Anaa sila sa Pulong.

194 Karon, ang ato lang ginahunahuna mao'y mahitungod sa daghang mananambong. Unsa man kini? Usa kini ka pulitikanhong organisasyon. Kon motambong kita, pagmay moduaw nga bantugang ebanghelista sa usa ka siyudad, unsa ma'y kasagarang mauna? Usa ka pundok sa mga inila nga kalalakin-an. Kung ang tanang Methodist, Baptist, Presbyterian, silang tanan, maghimo sila og gamay'ng listahan nga, sila, "Kini ra sila ang puedeng magwali og *ingon niini*, ug siya dili puedeng magwali og *ingon niana*, ug dili niya puedeng iwali ang *ingon niini*, pero makawali siya og *ingon niana*," unsa na lang ang makuha ninyo?

195 Ug miduol sila didto, ang mga kababayen-an. Mga Pentecostal ang akong ginahisgotan dinhi. Miduol didto ang mga kababayen-an, ngadto sa altar, magsige sila'g pangamuyo.

196 Sa una pa dili ako pabor niining pagtawag paadto sa altar. Mas maayong isulti ko na lang kini. Wala ako nagatoo sa mga ingon niana. Walay ingon niana sa Biblia. Sa unsang paagi diay makaduol ang usa tawo gawas kon tawgon siya sa Dios? Dili nimo siya mapugngan. Dili na ninyo kinahanglan nga magtawag pa og kung unsa man. Gitawag na siya sa Dios. Ang pagtawag paadto sa altar usa lamang ka ideya sa Methodist. Husto kana. Ang mga pagtawag paadto sa altar, mora'g ginaaghat lang sila, moingon, "John, abi nimo, dugay nang namatay ang imong inahan."

197 "Ooh-ooh-ooh, oo, igsoon, ooh-ooh!" Dili kana pagkakabig.

198 Dinhi, mga pipila ka gabii ang milabay, aduna kita'y nasaksihan nga usa ka pasundayag didto sa Louisville, mahitungod sa usa ka babaye nga gidala didto sa usa ka lungon, gibutang kini sa usa ka entablado nga tipiganan sa mga hinagiban. "Gatasan ka mga tawo," ang giingon nga,

“midagan paingon sa altar.” Ang Maayong Balita dili usa ka pagpanghadlok. Dili kini usa ka simpatiya nga pagbati. Usa kini ka kausaban sa kombiksyon.

¹⁹⁹ Matikdi n’yo kining mga panagtigum, sa niining bantugan nga mga ebanghelista, ug bisan sa akong ubos ug gamay’ng ministerio, apil ko niini. Usahay maulaw ko, mogawas. Husto kana. Unsa ma’y atong ginabuhat? Motindog ug maghimo’g pagtawag paadto sa altar ug pang-aghaton sila. Mangduol didto ang mga batan-ong babaye, ug nanggi-usap-usap og chewing-gum, moingon, “Tan-awa ninyo? Tan-awa ninyo? Moduol pud ko didto. Uh-huh.” Diha pu’y mga kababayan-an nga mangduol didto, nga mugbo ang buhok ug pinintalan pa ang mga nawong, mga Pentecostal, ug moduol, ug paggawas, ug manag-ingon nga sila nanagsulti kono sa laing pinulongan. Ug wala man lang gipataas ang ilang buhok, ug nagabuhat gihapon sa ilang mga naandan nga mga butang. Ang ginasulti n’yo ba kanako nga pagkabag-o kana? Usa kana ka pagbiaybiay sa Dios. Ang Biblia nag-ingon, “Sala ug kaulawan alang sa mga babaye ang pagputol sa ilang buhok.” Unsaon pagkondena sa usa ka babaye nga pinutlan ang buhok ngadto sa usa ka babaye nga pinintalan ang nawong? Mas maayo nga madungog na kini. Nagaabot na ang takna, nga ang wasay gikataon na ngadto sa gamot sa kahoy. Ug ang matag kahoy nga wala nagapamunga og maayong bunga pagaputlon.

²⁰⁰ Unsay problema? Sayup kana, tungod man gud kini sa atong modernong, mga magwawaling sa tawag lang, tuod og dinagku ang panon pero mga mahabugon, mga organisasyon nga wala gyu’y nahibalo mahitungod sa Dios sama sa usa ka Hottentot nga wala nahibalo mahitungod sa mga lumad sa Aprika, inig abot na niini. Miadto sila didto. . .

²⁰¹ Unsa kaha kung kadtong mga tawo niadtong Pentecostes miadto didto ug miingon, “Karon, si Jesus nagsugo kanato nga kita mosaka dinhi ug kinahanglan magpabilin hangtud nga kita makadawat og gahum gikan sa Kahitas-an. Karon, mga kaigsoonan, siyam ka adlaw na kita dinhi, nga nagpaabot. Ato na lang kining dawaton, pinaagi sa pagtoo. Karon, nabatonan na nato ang Espiritu Santo. Manggawas na kita, kay dugay na gyud ta dinhi. Gibuhat na nato ang giingon ni Jesus nga atong buhaton”? Wala gyud unta’y mahitabo nga kasinatian.

²⁰² Sultihan ko kamo og usa ka butang. Nasayod ko nga kini nakarekord sa teyp, apan ania na kini, total man. Paminaw mo. Aduna ko’y isulti kaninyo. Makauulaw gayud. Nga ang mga tawo nagasulay sa. . . Wala gyud ko nagatoo nga ang Espiritu Santo mao ang “pagkurog-kurog.” Wala gyud ko nagatoo nga ang Espiritu Santo “mapanghimatud-an pinaagi sa pagsulti og laing mga pinulongan, o paghilak, o pagsinggit.” Mga emosyonal nga pagbati lamang kana. Nagatoo man pud ko nga ang Balaang Espiritu makahimo niana. Apan ang Espiritu Santo mao kanang

Dios nga nagapuyo sulod kanato. Nagatoo ko nga daghang mga tawo nga nag-angkon nga aduna kono sila'y Espiritu Santo, pero wala'y nahibaloan og bisan usa mahitungod sa Espiritu Santo. Makighimamat kamo sa Dios.

²⁰³ Giunsa, nga niadtong Adlaw sa Pentecostes, miingon sila . . . Karon, sama sa mga Baptist karon, ang Presbyterian ug Methodist, akong pangutan-on, "Nagatoo ba kamo nga nadawat na ninyo ang . . .?"

²⁰⁴ "Oh, oo, gidawat namo Kini, pinaagi og pagtoo." Pinaagi og pagtoo, wala na'y lain. Dili Kini ingon niana.

²⁰⁵ Usa ra na ka sensasyon, sama nianang gusto nimong makita ang pagsalop sa adlaw, motindog ka ug motan-aw sa pagsalop sa adlaw, ug makahilak ka, ug motulo ang imong mga luha, dili kana ang Dios, emosyon ra kana, gikan sa usa ka butang nga anaa kanimo. Pagmay nabalitaan ka nga adunay nagmasakiton, o adunay naghimalatyon na, mosiyagit ka ug mohilak. Dili kana ang Dios. Emosyon lang kana sa tawo. Kung unsa nga ang Dios . . .

²⁰⁶ Nakasaksi na ko'g mga tawo diha sa dula sa baseball, nagbungabunga sila sa kalipay, ug tanan na. Ayaw ko'g ingna.

Nagkinahanglan kita og rebaybal, usa ka kaluwasan. Ug mangabot ang mga Pentecostal, himoong emosyonal ang mga tawo, ug sultihan sila, "Inig makasulti na sila og laing pinulongan, nadawat na nila ang Espiritu Santo." Ug ang uban sa ila magkinabuhi gihapon og tanan nang matang sa pagkinabuhi, pagkahuman niana.

Paminaw, igsoon. Niadtong Adlaw sa Pentecostes, dili ingon niana. Wala gayud sila nagsalig sa bisan unsang pagsulti og laing pinulongan o unsa man. Samtang naa sila didto, nanagtindog sa usa ka dapit, nanagkahiusa, literal, nga mikanaog ang Dios, sa ilang taliwala. Ilang nakita, sa matag usa kanila, ang mga dila sa Kalayo, nga ingon *niana*, nga nagpa-ibabaw sa ilang mga ulo. Atua mismo ang Dios. Dili kadto, "Dawata kini pinaagi sa pagtoo, o kung unsa man nga emosyon." Napuno sila sa Espiritu Santo, ug pagkahuman nanggula sila ug nagsugod sa pagsulti og laing pinulongan. Apan, una, nahimamat usà nila ang Dios.

Mao kana ang problema karon. Ang mga tawo nagakawhag, nagakaukyab, nahimong emosyonal, ug dili man kana ang Espiritu Santo. Ang Espiritu Santo mao ang Dios nga nagapuyo sa sulod nimo. Ang imong mga pulong mao'y Iyang mga Pulong. Sultihan ko kamo, ang atong gikinahanglan karon, mao ang usa ka pagtawag.

²⁰⁷ Ang mga tawo mosulod, mga kababayen-an nga ingon niana, mosulod, nanagsulti kono og laing mga pinulongan, dayon mogawas. Ug inig adto nimo sa ilang mga dapit diin atua didto ilang mga kasimbahanan . . .

208 Ania unta naglingkod si Billy karon. Bag-o lang ko nakadawat og sulat gikan didto sa kung asa nga dapit, niadtong miaging adlaw lang, diin ang usa ka babaye miingon, “Miyembro ako sa usa ka, dakung. . .” pinakadaku nga organisasyon sa mga Pentecostal, dakung Trinitarian nga organisasyon. Ang ingon nila, “Tanan namong mga kababayen-an, Igsoong Branham, tanan nagaputol sa ilang buhok. Duna ko’y taas nga itum nga buhok kaniadto.” Ingon niya, “Ganahan gyud ko niini, kay nagtoo man ko nga kini iya sa Ginoo.” Miingon, “Wala gyud ko nagapangmeyk-ap sukadsukad. Hinoon ginatudlo sa among simbahan kinaraan na kono kana.” Miingon, “Giingnan ko nila, sa dihang ginabugkos ko kini ang akong buhok, sa luyo sa ulo, moingon, ‘Pagbantay, anaa baya ka’y nihiyos nga ligid sa luyo,’ ug tanan nang ingon niana. Miingon pa, ‘Nagdala-dala lagi ka’g hiyos—hiyos nga ligid sa luyo sa imong ulo.’” Ug miingon, “Maong, miingon na lang hinoon ang akong bana, ‘Nganong dili na lang ka magpaputol sa imong buhok ug maparehas sa ilang tanan?’”

Karon gibalusan nako siya’g sulat.

Ingon niya, “Mao ba? Nadungog ko ang usa sa imong mga teyp, nga ang bautismo nga Cristohanon anaa sa Ngalan ni Jesus Cristo.” Karon, kabalo na mo kung unsa ang madawat niyang tubag. Dili ba? Ingon niya, “Sultihi ako, Igsoong Branham. Naghinamhinam ako. Gusto kong mahibaloan kung unsa ang akong nahimo.”

209 Moingon ko, “Makauulaw kanang imong backslider nga bana. Ug kanang walay Dios nga kauban mong pundok sa pagsimba, gumula ka gikan kanila.” Husto. Ang Dios dili mausab. Pag adunay gisulti ang Dios nga bisan unsa, mao gyud kana ang buot Niyang ipasabot. Wala ko’y labot kung pila pa kanang mga backslider nga magwawali nga gustong makipag-kompromiso, aron magkaaduna lang og usa ka dakung organisasyon o usa ka grupo. Ang gikinahanglan nato mao’y mga mang-aagak ngadto kaluwasan. Mga kalalakin-an nga mobarug ug nagatugot sa ilang mga asawa nga magbarug usab, kay dili gyud ko mosalig sa imong kasinatian isip usa ka Cristohanon. Husto. Paghinulsol, o mangalaglag kamo! My, grabe!

210 Mosulod sila nga sama niana, magpamiyembro sa mga simbahan, sa mga simbhang Pentecostal, mogawas ug wala gayud nausab bisan gamay; nagpabilin nga mao ra, wala gyu’y pagkabag-o bisan gamay. Oh, kaluoy! Unsa man kana? Modernong mga Jezebel. Adunay usa lamang ka babaye sa Biblia nga nagpintal sa iyang nawong, ug gipakaon siya sa Dios sa mga iro. Mga modernong Jezebel nga ginaguyod ang ilang mga Ahab sa kuwelyo, mga bayutong lalaki nga nagatugot sa iyang asawa nga buhaton kana, nga magsul-ob og mga short ug uban pa, ug pasagdan lang sila nga mogawas didto sa dalan ug magsul-ob og mga bistida nga huut kaayo sa lawas sama sa usa ka longganisa

nga giputos nga sama niana. Ug mogawas. . . Wala ko ginasulti kana para magpakatawa. Dili kini lugar para sa pagpakatawa. Pulong Kini sa Dios. Tinuod Kini. Oo. Maglakaw didto sa dalan, nga magsul-ob og bistida nga huot kaayo, nga halos dili na siya makalakaw. Dayon, dunay usa ka lalaki nga naay isulti bahin kaniya, ug gusto nimong makig-away sa iya. Angayan kang sagpaon sa imong apapangig, husto kana, kay gitugotan lang nimo ang imong asawa nga buhaton kana. Nagapakita lang kana kung unsa gyud ka. Eksakto gyud kana.

²¹¹ Ang atong gikinahanglan mao ang Maayong Balita. Dios, magpabarug Ka og usa ka tawo diha sa esena nga magpabalik gayud sa Pulong. Ang Dios miingon nga dili angay para sa usa ka babaye bisan ang pag-adto lang sa simbahan ug magampo nga pinutlan ang iyang buhok. Ug ang usa ka babaye nga nagapaputol sa iyang buhok, mao'y. . . adunay hingpit nga katungod ang bana sa pagpakigbulag kaniya. Usa siya ka babayeng wala'y dungog. Mao'y giingon sa Biblia. Makauulaw siya sa iyang bana. Tingali wala siya mahibalo niana. Wala'y dungog ang bisan kinsang babaye nga magsul-ob og mga short. Tingali wala siya mahibalo niini. Babaye, dili ko gustong pasakitan ka. Gipaninguhaan ko lang nga maluwas ka gikan sa linaw nga kalayo, ug impiyerno. Paghinulsol!

²¹² “Bueno,” moingon ka, “Aduna ko’y Espiritu Santo.” Nan pagpanggawi nga aduna ka, kung nagpuyo man kaha ang Dios sa imong sulod, ang mao mismong Dios nga nag-ingon nga dili nimo buhaton kana?

²¹³ “Bueno,” moingon ka, “Nagsulti ko’g laing mga pinulongan.” Nakakita na ko’g mga yawa nga nagsulti pud og laing mga pinulongan. Nakakita ko, didto sa Africa, nga nag-inom og dugo gikan sa bagolbagol sa tawo, ug nagsulti og laing pinulongan ug nagtawag sa yawa. Nakaadto na ko sa mga kampo sa mga balbal ug mga salamangkero, diin nagsulti pud sila’g ubang mga pinulongan ug gihubad kini. Nakakita na ko’g lapis nga gibutang sa lamesa ug misulat lang og iyaha diha sa wala mailhi nga mga pinulongan, ug dunay tawo nga miduol, og gihubad kini. Tinuod kana. Mao nga ayaw ko’g hisgoti mahitungod sa pagsulti og laing mga pinulongan. Kay daghan na kaayo ta og ingon-ana karon.

Bisan pa niana, ako nagatoo gihapon nga ang Dios aduna gayu’y pagsulti og dili-mailhan nga pinulongan. Nagatoo ako nga ang Dios nagasulti og dili-mailhan nga mga pinulongan, apan ayaw pagsalig sa ingon niana. Ang ingon ni Pablo, “Bisan ako magsulti pa og mga pinulongan nga iya sa tawo ug iya sa mga Anghel, ug walay Espiritu Santo, ako walay kapuslanan. Bisa’g makapabalhin ko og mga bukid. . .”

²¹⁴ Daghang mga tawo ang nagaingon, “Oh, *kini* usa ka halangdong tawo sa Dios. Kinahanglan gyud ninyong makita

ang mga dagkung milagro.” Aba, ang mga yawa makahimo pud sa pagpang-ayo. . .

Ang mga yawa nagapamuhat pud ug mga butang nga sama niana. Duna ko’y nahibaluan nga mga balbal nga moadto didto, ug mga butang nga ingon niana, nga dunay tapis nga nakasab-it kaniya nga ingon *niana*. Didto nila ginabutang ang ilang kwarta. Nag-ibot siya’g buhok sa likod sa iyang ulo, gibulibod kini sa dugo ug gisaliyab kini. Ug silang mga tawong matinud-anon, nagatoo gayud sila. Dili kadto tungod sa balbal. Tungod kadto sa maong mga tawo nga nagatoo nga ang ilang giduol mao ang Dios, pinaagi sa balbal.

²¹⁵ Dili ba nag-ingon si Jesus, “Daghan ang moduol Kanako nianang adlaw, ug moingon, ‘Aduna ko’y dagkung mga buluhaton sa pagpang-ayo’”? Dili kana usa ka ilhanan. Apan ilhanan kana nga haduol na gyud kita sa katapusan. Dili ba si Jesus nag-ingon, sa Mateo sa ika-24 nga kapitulo, diha dapit sa ika-24 nga bersekulo, pud, 24:24? Ug Siya miingon, “Ang mini nga mga propeta motungha sa katapusang mga adlaw ug mopakita og dagkung mga ilhanan nga sa ingon ilang limbongan bisan ang mga Pinili kon mahimo.” Apan ang Pinili nagabarug sa Pulong. Nasayod sila kung unsa gyud ang tinuod nga ilhanan.

²¹⁶ Unsaon kaha sa usa ka tawo, nga nagabuhat niining mga butanga, nga nagalimud sa Pagtoo sa Dios, dayon moingon nga siya usa ka propeta gikan sa Ginoo? Sa unsang paagi nga mahimo kana sa usa ka tawo?

Mahimong usa siya ka propeta, sama niadtong didto sa panahon nila Ahab ug Josaphat, niadtong mibarug si Micheas. Apan aduna sila’y usa didto nga mibarug diha sa Pulong, si Elias. Nahisulat na ang Pulong sa Ginoo, nga si Ahab moabot sa iyang katapusan, ug nagasubay niini ang panan-awon ni Elias.

²¹⁷ Ug si kinsa man nga tawo, bisan kinsa pa siya nga nagapatawag sa iyang kaugalingon nga espirituhanon o usa ka propeta, kinahanglan ilhon niya nga ang matag Pulong *Niini* tinuod. Unsaon pa niya pagkahimong usa ka Trinitarian? Unsaon pa niya pagbautismo sa ngalan sa “Amahan, Anak, ug Espiritu Santo,” ug dayon moingon nga siya gidihogan sa Espiritu? Unsaon pa niya pagpanudlo sa mga tawo niana nga sayup, ug sa gihapon dinihogan kono sa Espiritu? Dili kana mahimo. Imposible gyud kana.

²¹⁸ Nasayod ko nga dili kana popular. Apan ayaw man nato nga mamahimong popular. Ang gusto n’yo’y magmatinud-anon.

Karon, si Jezebel ug si Ahab. Oo, sir.

²¹⁹ Ngano, nganong ila kadto ginabuhat? Nganong sila nga mga kababayan-an, nagapaputol pirmi sa ilang mga buhok, ug nagapangmeyk-ap, ug mogawas ug magsul-ob og mga short pag adunay nagaagi nga mga kalalakin-an ug mga butang nga sama niana, nga ilang bana nagatugot niana? Tungod kay wala

sila'y tinuod nga propeta sa ilang pulpito, aron isulti sa ila ang Kamatuoran. Ang ginaingon nila sa ila, "Bueno, wala man kana'y kalainan. Okey ra kana. Dili nimo kinahanglan buhaton ang *ingon niana*." Ikaw!

²²⁰ Pulong Kini sa Ginoo. Ang ingon sa Biblia, "Ang si kinsa man nga babaye nga magsul-ob og bisti nga iya sa lalaki usa ka dulumtanan sa atubangan sa Dios." Ang Dios wala nagausab. Sa unsang paagi Siya mausab ug mahimong Dios? Siya walay-kinutoban.

²²¹ Nagakinahanglan sila og usa ka tinuod nga propeta nga magsulti sa ila nga kana usa ka ilhanan sa katapusan. Giingon sa Biblia nga buhaton nila kana. Sa Isaias, ang ika-5 nga kapitulo, nag-ingon nga buhaton kana sa mga kababayen-an sa katapusang mga adlaw. Sakto gyud. Busa, tan-awa sila.

²²² Apan moingon sila nga aduna kono sila'y propeta sa pulpito, nga nahadlok sa Pulong sa Dios. Dili... Nahadlok siya sa kongregasyon.

Mag-ampo kita aron ipadala sa Dios kanato kanang ulahing Kahayag, kanang panggabiing Kahayag, nga ipadala kanato ang usa nga Iyang gisaad nga ipadala, ngadto sa pinili nga Iglesia, nga mosulti kanila kung unsa ang Kamatuoran, mobarug sa Pulong sa Dios. Pasagdi lang silang mga Jezebel ug mga Ahab, igahimulang nila sila nianang panahona. Eksaktong ingon niana.

²²³ Hinumdumi niadtong nagsugod ang mga kababayen-an nga manggawi og ingon niana. Karon balikan usà nato og gamay, niadtong nagsugod na sila sa pagpamutol sa ilang buhok ug nagapanglihok nga ingon niana. Sa dihang ang mga kababayen-an magsugod na gani sa pagpanglihok nga ingon niana, mao na kana ang takna ug panahon nga si Elias sa katapusang mga adlaw magpakita sa esena uban ang pangkaulahiang-panahon nga ilhanan, uban ang pangkaulahiang-panahon nga ilhanan sama sa nahitabo kaniadto sa mga adlaw ni Lot. Kita n'yo? Ang pangkaulahiang-panahon nga ilhanan; sa dihang ang mga kababayen-an magsugod na sa pagpanglihok nga ingon niana. Nagapanglihok na sila nga ingon niana karon. Mao na kana nga panahona nga motungha ang Elias diha sa esena, nga mangsaway ug magatawag, mangbadlong ug manglumpag, husto, nga ginapaluyohan sa ilhanan sa Dios, nagapadayon. Wala siya'y dakung pundok nga pagatawgon karon. Ang Biblia nag-ingon, "Ayaw kahadlok, gamay nga panon, kini ang maayong kabubut-on sa inyong Amahan ang paghatag kaninyo sa Gingharian." Husto kana. Eksakto gyud kana.

²²⁴ Siya siguradong isalikway sa tanan gawas sa maong gamay'ng panon, kay siya sama man kang Elias uban sa iyang pito ka gatus, ug kang Juan uban sa gamay'ng panon niini. Oo.

225 Nakita ba ninyo kung hain na kita karon? Kinahanglan na natong mobalik sa orihinal nga Pentecostes. Kinahanglan natong mobalik ngadto sa mga butang sa Dios. Kinahanglan na gyud kitang mobalik. Igsoong lalake, igsoong babaye, ayaw pagpalimbong sa imong kasinatian. Kita—kita nagahulat na lang nianang taknaa.

226 Ayaw kamo pagdawat nianang, “Hinaut—hinaut unta. Nagatoo ako, pinaagi sa pagtoo ginadawat ko Kini.” Ayaw gyud kana buhata. Pakighimamat gayud sa Dios, nawong sa nawong, ug magpapuno sa Espiritu, ug dayon inyong makita kung unsa’y mahitabo. Ug kung kana nga espiritu nga anaa kaninyo supak niining Pulonga, nan biyai kanang maong espiritu. Lakaw og magkuha og. . . Mag-ampo kamo sa Dios nga ihatag sa inyo ang Iyang Espiritu, kung ingon niana.

227 Sa diha nga motungha kining Espiritu sa katapusang adlaw, Kini mamahimong usa ka pasidaan batok kanila, ngadto kanila nga mga mini. Kita n’yo? Kay, si Juan miingon, “Ayaw paghunahuna sa pag-ingon sulod sa atong kaugalingon nga kita. . . nga kamo ‘adunay Abraham nga among amahan.’” Aduna kita’y. . . Kita’y. . .

“Kami, ang among mga amahan mga Methodist, Baptist, Presbyterian, o Pentecostal.” Ayaw’g hunahunaa nga, kamo, “Dios,” ug kamo mga anak ni Abraham, kay ang Dios makahimo niining mga bato sa pagpatungha og mga anak ngadto ni Abraham. Ayaw’g hunahunaa nga tungod kay Pentecostal kamo, mapalingkawas na kamo niini. Dili gyud. Ang Dios makahimo niining mga bato sa pagpatungha’g mga anak ngadto ni Abraham. Eksakto gyud kana. Oo, sir.

228 Isulti lamang ang Pulong sa Dios, diha sa kamatuoran sa katapusang adlaw. Ang iyang propesiya mao’y. . .

229 Kung mapahanugotan n’yo, tugoti ko sa pag-abli dinhi sa makadiyut lamang, tugoti ko nga ipakita kaninyo kung unsaon nato paghibalo. Daghan ko’y mga Kasulatan nga nahisulat dinhi. Kaganina ko pa ginakutlo ang mga Niini. Gusto kong basahon ang usa niini kaninyo. Gikan, atong, una, ablihan nato. . . Ablihan nato ang Deuteronomio, ang ika-18 nga kapitulo, ug atong hibaloon, sa makadiyut. Sa makadiyut lang, sa dili pa kita matapos dinhi, aron mabasa ko kini nga Kasulatan nganha kaninyo. Sa Deuteronomio, sa ika-18 nga kapitulo, sige, ug atong tan-awon karon. Ang ika-20 nga bersekulo sa ika-18 nga kapitulo, Deuteronomio, 20:

Apan ang propeta, nga mangahas sa pagsulti og usa ka pulong diha sa akong ngalan, nga wala nako isugo kaniya sa pagsulti, o kadtong mosulti diha sa ngalan sa laing mga dios (pang-dinaghan), bisan kana nga propeta mamatay.

Husto kana. Patay na sa espirituwal. Bueno. “Ang kalag nga nagapakasala, kini mamatay.” Aduna kita’y usa ra ka Dios, dili “mga Dios.”

*Ug kon ikaw magaingon diha sa imong kasingkasing,
Unsaon nga kami mahibalo sa pulong nga . . . wala
gisulti sa GINOO?*

“Unsaon man nato pagkahibalo? Nga daghan man kaayo kini, unsaon nato pagkahibalo? Kining usa moingon og *ingon niana*, ang usa moingon pud og *mora’g-ingon niini*. Bueno, ang usa moingon og *ingon niini*, ug ang usa moingon og *ingon niana*, ug kung unsa pa man.” Karon tan-awa. Mahibaloan nato.

*Sa diha nga ang usa ka propeta nagasulti diha sa
ngalan sa GINOO, kon ang butang dili matuman, ni
mahitabo, kana mao ang butang nga wala gisulti
sa GINOO, apan ang propeta misulti niini nga
mapangahason: ikaw dili mahadlok kaniya.*

²³⁰ Kung wala kini gipamulong sa Dios, nan ayaw kini kahadloki. Okey—okey ra kana, padayon lang ug kalimti kana. Kita n’yo?

²³¹ Karon tan-awa kung unsa ang mga ginapatalinghugan nato karon. Kredo sa mga Apostoles, kredo sa Methodist, kredo sa Baptist, kredo sa mga Pentecostal, kredo, kredo, kredo. Unsa man kanang kredo? Hain man ninyo kana nakuha? Gihagit nako ang si bisan kinsa nga ipakita kanako kanang Kredo sa mga Apostoles diha sa Biblia. Nagatoo ko nga wala gyu’y ingon niana.

Kung duna ma’y kredo ang mga apostoles nga ilang gihuptan kaniadto, mao kini: “Paghinulsol ang matag-usa kaninyo, ug pagpabautismo sa Ngalan ni Jesus Cristo alang sa kapasayloan sa inyong mga sala, ug kamo makadawat sa gasa sa Balaang Espiritu. Kay ang saad alang kaninyo.”

Wala ba ninyo makita kung asa na kita, mga higala? Anaa na kita sa usa ka makalilisang nga kahimtang. Unsa man kini? Usa ka tinuod nga ilhanan nga wala makita.

²³² Karon, kamong mga kalalakin-an ug mga kababayan-an, kadaghanan kaninyo, ug mga anak kamo sa Dios. Ayaw ninyo sayloi kini. Hinumdumi nga angay na unta natong nabatonan kining mga butanga. Angay na unta kini nga mahitabo niining adlaw, niining takna nga atong gikinabuhian karon. Mao na kini ang takna, sa dili pa ang Pag-abot sa Mesias, maong aduna gayu’y pagpahibalo nga gikan sa Dios.

Tugoti ko nga basahon kana kaninyo. Balikan nato si Malaquias. Kini ang kinaulahian sa Daang Tugon, ug paminawa kung unsa ang Iyang gisulti dinhi sa Malaquias. Dayon kita . . . Paminawa kini sa makadiyut.

Karon, kung inyong namatikdan, ang Malaquias 3, naghigot kini kang Jesus nga miingon mahitungod sa pag-abot ni Juan:

Tan-awa, ako mopadala sa akong mensahero, ug siya moandam sa dalan una kanako: ug ang Ginoo, nga inyong gipangita, kalit lang motungha diha sa iyang templo, bisan ang mensahero sa iyang kasabutan, kinsa inyong gikalipayan: tan-awa, siya moabot, nagaingon ang GINOO sa mga panon.

²³³ iS Juan kana, nga ginamantala ang pag-abot ni Jesus. Ug mitungha Siya sa templo, nga eksakto gayud kung unsa ang Iyang gisulti, ang Mensahero sa kasabutan, ug ang maong Manolunda nga kauban sa . . . didto sa kamingawan uban sa—uban sa mga tinun-an, o uban sa Israel. Nagatoo ba kamo nga Siya mao kadtong Mensahero? Bueno Siya miingon, “Ako mianhi gikan sa Dios, ug ako moadto sa Dios.”

²³⁴ Karon, nganong gihatagan man og sakit si Pablo? Aron magpaubos siya.

Human nga si Jesus namatay, ug gilubong, ug nabanhaw; human sa dugay nga panahon, nahimamat Siya ni Pablo, nawong sa nawong, didto sa dalan paingon sa Damascus. (Siya miingon, “Ako’y gikan sa Dios, ug ako mobalik sa Dios.”) Mihangad si Paul. Adunay usa ka daku nga Kahayag didto, kanang mao rang Haligi nga Kalayo. Nasabtan ba ninyo ang akong ginahisgotan? Ang mao rang Haligi nga Kalayo. Ug nakigsulti si Pablo Kaniya, ug nagpakigsulti pud Siya kang Pablo. Ang mga tawo wala makadungog Kaniya. Wala sila makadungog Kaniya. Apan si Pablo nakadungog Kaniya. Ingon Niya, “Saulo, Saulo, nganong ginalutos Mo ako?”

Miingon siya, “Kinsa man Ikaw, Ginoo?”

²³⁵ Ingon Niya, “Ako si Jesus. Karon tindog ka ug adto ngadto sa dalan nga gitawag og Matul-id. Igasulti kini kanimo gikan didto. Aduna Ko’y propeta nga moadto didto ug isulti kanimo kung unsa ang buhaton, kita mo. Ug unsaon ang . . .”

²³⁶ Miadto si Pablo, nagpabautismo, ug misangpit ngadto sa Ginoo, gidawat ang Espiritu Santo.

Ug si Pablo miingon, “Aduna ko’y sakit sa unod, nga gihatag kanako, usa ka yawa, usa ka mensahero gikan sa yawa, nga *nagadagmal* kanako,” mora kana og, “matag unya nga pagsumbag.” Moarang-arang man siya, ug pagkahuman magkasakit na pud, dagmalan na pud siya. Miingon, “Nagpakigsayod ako sa Ginoo sa makatulo nga higayon, aron tangtangon kini unta kanako, pero ang ingon sa Ginoo, ‘Pablo, ang Akong grasya igo alang kanimo.’” Dayon miingon, “Aron nga dili ako igatuboy sa hilabihan . . . tungod sa kadagaya sa mga kapadayagan.”

Aduna siya’y mas daghan, nga kapadayagan, kay sa ila ni Pedro, Santiago, Juan, o kang bisan kinsa kanila. Nakita niya si Jesus human nga Siya mikayab og mga duha na ka tuig, o sobra pa, nga atua sa usa ka Haligi nga Kalayo, nagapakigsulti kaniya.

Daw unsa Siya karon ka mas kahibulongan pa, nga duha ka libo na ka tuig, ug Siya buhi sa gihapon! Amen.

²³⁷ Miingon, “Dunay gihatag kanako, aron ako’y dili maituboy, ug magaingon, ‘Karon, igsoon, labaw ako kaninyong tanan. Kita n’yo? Nakita ko—Nakita ko gyud Siya human nga Siya nabanhaw gikan sa mga patay, ug nakigsulti ako mismo Kaniya. Ako. . .’ Aron dili ako makapasigarbo tungod niana, adunay gihatag kanako, aron ako magpabilin nga mapaubsanon.” Oo.

²³⁸ Siya kadtong nagsulti kanila nga magpabautismo, pag-usab, sa Ngalan ni Jesus. Miingon, “Kung ang Manulonda nga gikan sa Langit. . .”

²³⁹ Miingon siya, “Wala ko moeskwela sa ilang mga tulonghaan, kung asa sila nag-eskuwela.” miingon, “Wala ako miadto dayon sa Jerusalem, ug wala hangtud milabay ang katorse ka tuig.” miingon, “Miadto ako sa Egipto, didto sa Asia.” Ug nakipagsayod siya sa Ginoo, migahin og mga tulo ka tuig didto, sa pagtuon sa Daang Tugon, gisusi kung nagkatakdo kini tanan. Sa iyang pagbalik, pagkahuman sa katorse ka tuig, iyang nahimamat si Pedro ug sila, ug hingsayran nga nagbaton sila og mao rang Maayong Balita, nagapangbautismo sa samang paagi, ug namuhat sa samang butang. Amen. Nasayod siya nga husto gyud kadto. Oo, sir.

²⁴⁰ Paminawa ninyo sa Malaquias karon, dinhi sa, Malaquias 3. Karon, kung mapahanugotan ninyo, akong klarohon kini alang kaninyo. Nagatoo ko. . .sige mag-abli kita karon sa Mateo sa ika-11 nga kapitulo, ug tan-awon n’yo kung akong. . .mora’g dili mao ang akong naablihan, ania husto man diay, tingali kinahanglan kong tan-awon usà aron makita kini. Mateo 11. Atong tan-awon. Magsugod kita sa:

Ug nahanabo, nga sa nagakahuman si Jesus sa paghatag sa iyang mga sugo sa iyang napulo og duha ka mga tinun-an, migikan siya didto sa pagtudlo ug pagmantala sa mga lungsod nila.

Ug. . .Karon sa diha nga si Juan. . .nakadungog nga siya. . .sa bilangoan sa mga buhat ni Cristo, mao. . .sa bilangoan sa mga buhat ni Cristo, nagsugo siya og duha sa iyang mga tinun-an,

Ug pag-ingon kaniya, Ikaw ba kadtong moanhi, o magapaabut pa ba kami’g lain?

Nagakahalap na ang matang-agila ni Juan, didto sa bilangoan. Kita n’yo?

Mitubag si Jesus ug miingon kaniya, Pangadto. . . ipakita ninyo kang Juan pag-usab kining mga butang nga inyong. . .nadungog ug nakita:

“Si Juan usa ka propeta. Ug kung iyang—iyang madungog kini, kung unsa ang nagakahitabo, makaila gayud siya kung Kinsa Ako.” Kita n’yo? Ang ingon Niya:

Ang mga buta nanagpakakita, . . . ang mga bakol nanagpakalakaw, ang mga sanlahon nahinloan, . . . ang mga bungol nakadungog na, ug ang mga patay nangabanhaw, . . .

“Ug ang tanang mga denominasyon nagkahiusa na”? Dili ingon niana ang pagkasulti Niini, dili ba? Dili. Dili gayud. Ang ingon Niini:

. . . ang mga bakol nanagpakalakaw, ang mga sanlahon nahinloan, . . . ang mga bungol nakadungog na, ug ang mga patay nangabanhaw, ug ang mga kabus gikawalihan sa maayong balita ngadto kanila.

Kana ang ilhanan. Tan-awa:

Ug sa paglakaw na nila . . .

Ug bulahan siya, ang kinsa man nga dili . . . makakaplag kanako og kahigayonan sa pagkapangdol.

Karon tan-awa: “Bulahan siya ang kinsa man nga dili makakaplag Kanako og kahigayonan sa *pagkapangdol*,” sa ubang pagkasulti, o, “*gikaulaw* Ako. Bulahan siya nga wala Ako *gikaulaw*.” Kita n’yo?

. . . sa paglakaw na nila, si Jesus misugod sa pagsulti ngadto sa kadaghanan mahitungod kang Juan, Unsa ang giadto ninyo sa pagtan-aw sa kamingawan?

Matikdi ninyo kini nga propeta karon:

. . . Unsa ang giadto ninyo diha sa pagtan-aw sa kamingawan? Usa ba ka bagakay nga ginakusokuso sa hangin?

Dili si Juan. Oh, dili. “Kamong kaliwatan sa mga bitin sa balili,” ang giingon ni Juan ngadto sa mga denominasyon, “kinsa’y nagpasidaan kaninyo sa paglikay gikan sa kapungot nga umaabot? Ayaw pag-ingon, ‘Kami miyembro *niini* ug *niana*, kay ang Dios makahimo *niini* nga mga bato sa pagpatungha og mga anak.’” Oh, igsoon, dili kadto usa ka tigbaw nga giuyog sa hangin, si Juan.

. . . Usa ka bagakay nga ginakusokuso sa hangin?

O unsa ba ang giadto ninyo sa pagtan-aw? Usa ba ka tawo nga nagasul-ob og mga panapton nga hamili? (Nga kinahanglan pa mag-ilis og sinina duha o tulo ka higayon samtang siya nagawali?) ania karon, ang mga nagagamit og mga bisti nga hamili, ang mga nagagamit og mga panapton nga hamili anaa sa mga balay sa mga hari.

Sila kadtong mga ministro nga mogawas didto ug mohalok sa mga bata, kabalo na mo, ug—ug mokasal sa mga batan-on, ug—ug moadto sa eskwelahan ug maghimo'g intelektuwal nga mga pakigpulong, ug, kabalo na mo, tanan na niining medyo binayot nga mga butang. Kita n'yo? Kita n'yo? Wala siya nagahawid og duha-ka-pulohan nga espada didto sa unahan sa panggubatan. “Unsa man ang inyong giadto aron tan-awon, usa ba ka lalaki nga ingon niana?” Siya . . . Siya nangutana kanila.

Pero unsa ba ang giadto ninyo . . . sa pagtan-aw? Usa ba ka manalagna? (Paminawa.) oo, ug nagaingon ako kaninyo, ug labaw pa kaysa usa ka manalagna.

Oo, sir. Unsa diay si Juan? Ang ingon, “Labaw pa siya kaysa usa ka propeta?” Usa siya ka manalagna, *labaw pa*. Siya ang mensahero niadtong kapanahonan.

. . . unsa ba ang giadto ninyo . . . sa pagtan-aw? Usa ba ka manalagna? oo, nagaingon ako kaninyo, ug labaw pa kaysa usa ka propeta.

Kay kini mao siya, . . . ang hingtungdan sa nahasulat, Ania karon, ako nagapadala sa akong mensahero sa akong atubangan, . . . nga nagaandam sa dalan sa atubangan kanako.

Tan-awa dinhi sa Malaquias 3. “Ania karon, ako nagapadala sa Akong mensahero sa Akong atubangan.”

²⁴¹ Bantayi. Karon, Malaquias 4, tugoti ako sa pagbasa niini. Moanhi Siya pag-usab.

. . . ania karon, ang adlaw moabot na, nga nagasunog daw hudno; ug ang tanang mga palabilabihon, oo, . . .

²⁴² Mao na ang panahona karon. Naglakaw ko sa dalan ug nakita nako ang ingon niining mga tawo. Makig-istorya ka nila, ug kataw-an lang ka nila, biaybiayon ka nila. Sa akong hunahuna, “Unsa ni?”

Niadtong miaging adlaw, naglakaw ko, didto, kilid sa plasa dinhi. Nakig-istorya ko sa pipila ka mga tawo, ug miingon lang sila og, “Oh,” dayon milakaw na.

May sa kung Unsa nga miingon kanako, “Sila mga bahog lamang sa atomika, sa dili madugay sila mamahimong abo nga makay-ag sa yuta. Pasagdi sila. Gisulti na nimo ang imong panan-aw. Pangandam ug pahawa na diha.” Alleluyah! Wala na lang unta nako kana gisulti, siguro. “Andama ang imong kaugalingon. Baksi ang imong hawak. Gitawag tà ka.” Mao kana ang hinungdan nga ako naghulat.

Kay, ania karon, ang adlaw moabot na, nga nagasunog daw hudno; oo, ang tanang mga palabilabihon, . . . ug ang tanang nanagbuhat sa kadautan, mangahimong tuod sa mga balili: . . .

Mao gyud kana ang mahitabo. Unsa'y mahitabo kung ang usa ka daku . . . pipila kaninyong mga mag-uuma; sa dihang ang usa ka grabe nga sunog moigo sa usa ka umahan sa trigo, sa dihang usa na lamang siya ka tuod sa balili? Pagaugdawon niini ang uma, nga abo na lamang ang mahibilin. Mao gyud kana ang mahitabo, kung kana, kung mahitabo na kana.

. . . ang adlaw nga moabot na nga magasunog kanila, nagaingon ang GINOO sa mga panon, nga kini dili magpabilin kanila bisan sa gamut o sanga.

Wala gyu'y mahibilin kanila.

Apan kaninyo nga may kahadlok sa akong ngalan ang Adlaw sa pagkamatarung magasubang nga adunay kaluwasan sa iyang mga pako; . . . kamo manggula, ug managlumpat sa kalipay sama sa mga nating vaca diha sa toril. (Ang Milenyum kana.)

Ug inyong pagatamakan ang mga dautan; kay sila mahimong abo sa ilalum sa mga lapa-lapa sa inyong mga tiil sa adlaw nga Akong pagahimoon kini, nagaingon ang GINOO sa mga panon.

Mahitabo kana, sa Milenyum. "Ang mga abo sa mga dautan."

Hinumdumi . . . ang kasugoan ni Moises nga akong alagad, nga akong gisugo . . . kaniya didto sa Horeb alang sa tibuok nga Israel, bisan ang kabalaoran ug ang tulumanon.

Bueno, paminaw kamo pag-ayo karon.

Ania karon, akong ipadala nganha kaninyo si Elias ang propeta sa dili pa ang moabot kanang daku ug makalilisang nga adlaw sa GINOO:

²⁴³ Karon, dili mahimong si Juan kana. Dili mahimo, tungod kay ang kalibutan nagun-ob na man nianang panahona. Pero dinhi ang ingon Niya, sa Mateo 3, Siya'y magpadala og usa ka mensahero sa atubangan Niya. Ug ang ingon ni Jesus, "Mao kana ang Elias nga ginapaabot moabot, nga magaandam sa dalan sa atubangan Kanako."

"Apan sa dili pa mobuto kining makagun-ob nga bomba atomika, Akong ipadala nganha kaninyo si Elias ang propeta."

Ug iyang pabalikon ang mga kasingkasing sa mga amahan ngadto sa mga bata, ug ang mga kasingkasing sa mga bata ngadto sa mga amahan, tingali unya ako moanhi ug samaran ko ang yuta pinaagi sa usa ka panghimaraut.

²⁴⁴ Propesiya, para niining adlawa.

Apan karon moingon ka, "Oh, kana nga Elias, si Juan man kana." Ang mensahero sa pakigsaad mao man si Juan, tinuod. Eksakto gyud kana. Gisulti kana mismo ni Jesus, ug

gipamatud-an kini dinhi mismo, “Kana mao ang usa nga akong giingon.” Apan, nakita n’yo, dili siya kanang Elias nga moabot pa lang. Kita n’yo? Dili kana mahimo. Tungod kay, nakita n’yo, kung ingon niana man, nan sayup diay ang propesiya; kay ang kalibutan wala man nagun-ob kaniadto. Kita n’yo? “Apan sa dili pa moabot kanang daku ug makalilisang nga adlaw sa Ginoo, Akong ipadala nganha kaninyo si Elias. Ug iyang pabalikon,” matikdi ang iyang unang pag-abot, “ang mga kasingkasing sa mga amahan ngadto sa mga bata.” Mao kana ang iyang gibuhat, una, gihatud ang mensahe sa bag-ong dispensasyon, ang pag-abot ni Cristo niadtong panahona, nga ginabira ang karaang orthodox nga mga amahan palayo gikan niadtong orthodox nga pagtoo, ngadto sa usa ka bag-ong pagtoo nga bag-o lang nahimugso kaniadto.

Dayon sa pag-abot niya sa ikaduhang higayon, “Ug ang mga kasingkasing sa mga bata ngadto sa pentecostes nga mga amahan, pabalik sa orihinal nga Mensahe.”

²⁴⁵ Karon ablihi dinhi sa Pinadayag 3, ug inyong makita ang samang butang nga gihisgotan dinha pag-usab. Busa, kini gipanagna na. Ania na kita sa katapusan nga panahon, igsoon ko. Husto kana.

²⁴⁶ Sama sa upat ka gatus nga mga propeta batok niadto kang Miqueas, sila moingon usab nga kita . . . Ania na kita nianang katapusang adlaw, nga atong nasayran. Mini nga propeta, nga nagapakita og mini nga mga ilhanan, pagpamiyembro sa mga denominasyon. Sila moingon, “Ari kamo ug magpamiyembro. Mag-uban ta. Ari mo dinhi ug pagpamiyembro mo sa among simbahan. Ibalhin lang dinhi ang imong pagkamiyembro didto. Bukas mi karong buntag para mabalhin nimo ang imong pagpamiyembro gikan *niana* nga iglesia ngadto *niining* usa.” Oh, binuang. Unsay kaayohan nga mahatag kanimo nianang imong pagpamiyembro? Kung wala ka’y panulondon didto sa Langit, kalimti kana. Ang mini nga mga propeta magapakita og mini pud nga mga ilhanan.

²⁴⁷ Apan, tan-awa, ang tinuod nga mga propeta, magapabilin gayud sila sa Pulong sa Dios. Ang tinuod nga mga ilhanan magadala og tinuod nga Pulong sa Dios ngadto sa tinuod nga Iglesia, ug pagadawaton sa tinuod nga Iglesia ang Pulong ug magmaya alang Niini. Dihay gamay’ng panon, nga igahatag sa katapusang mga adlaw, nga mao ang mga nahibilin sa mga Gentil, nga mao’y mga pagadalhon patabok.

²⁴⁸ Niadtong mianhi si Jesus, adunay—adunay pipila lang gyud ang mitoo. Ang gamay’ng pundok ni Juan mao kadtong mitoo. Gikuha sila ni Jesus gikan didto, gihimo silang mga tinun-an ug mipadayon. Sa dihang si Elias . . .

²⁴⁹ Sa dihang miabot ang kalaglagan, niadtong miabot ang panahon ni Noe, siya usa ka ilhanan, ug iyang gipasulod ang mga

tawo sa arka. Sa dihang miabot si Elias, iyang gipagawas ang mga tawo gikan sa kalibog nga ilang gikahimutangan kaniadto. Pag-abot ni Juan. . . Ang tanang mga propeta mga ilhanan, ilhanan, mga ilhanan, ilhanan.

Ug nagsaad Siya kanato og usa ka ilhanan sa katapusang adlaw. Sa katapusang mga adlaw magkaaduna'y usa ka ilhanan. Kini ang ilhanan nga wala makita. Wala kini makita sa mga tawo. Ginasayloan lang nila kini, ug ginabalewala lang. Igsoong lalaki, igsoong babaye, ayaw pagpamiyembro sa iglesia. Tugoti ako sa pagsulti niini, alang sa pagtapos karon.

²⁵⁰ Kung ang imong kasinatian usa ra ka emosyon, usa ra ka sensasyon, ayaw pagsalig niana. Ayaw gyud na buhata. Para ninyo. Kamo. . . Nagapakigsulti ako sa mga tawo. Nadungog ko nga gipindot nila ang mga teyp rekorder dinha sa luyo, bag-ohay lang. Nagapakigsulti ako karon sa Iglesia. Kita n'yo? Paminaw kamo, ayaw gayud. . .

²⁵¹ Usahay daghan ko'g mga butang nga masulti, sama niana, aron ang mga taga-dinhi. . . Magpabilin gayud sa Dios. Bantayi ang inyong tinuod nga ilhanan. Makita ninyo kana. Kini anaa lang sa inyong palibot, apan milyon-milyon ang magaagi lamang niini apan dili kini makita.

Sa dihang mianhi si Jesus kaniadto, wala sila nakaila Kaniya.

Wala pud nila naila si Elias. Nasayod ba mo kung unsa'y ilang gisulti niadtong mikayab si Elias? Wala sila mitoo sa maong binuang kono. Miingon sila, "Binuang kana." Ang mismong mga anak sa maong lungsod, diin siya nagpuyo. . . kung hain siya nagpuyo, kung hain siya nagwali, naghimo'g mga ilhanan ug mga katingalahan didto mismo sa maong nasud, niadtong namantala kadtong hitaboa, "Dili na nato mapalgan si Elias; Gisakgaw na siya sa Ginoo sa usa ka alimpulos," gikataw-an lang nila kadtong butanga.

²⁵² Ania nagaabot si Elias. . . Si Eliseo, dala ang mao ra nga ilhanan, usa ka tipo ni Cristo ug sa Iyang Iglesia. Ania nagaabot si Elias, sa- . . . Si Eliseo, nga nakabaton og mao ra nga ilhanan sama kang Elias, miadto didto, nga ginabuhat ang ingon niana, nga bisan ang ilang gagmay'ng mga anak nagsunod-sunod ngadto kaniya ug miingon, "Upaw'ng tigulang, nganong wala man ka mikayab sama kang Elias?" Nakita ba ninyo ang nahitabo niadtong walay pagtahod nga mga bata?

Karong panahona nangatawa sila ug nagabiaybiay. Ayaw kabalaka, igsoon, ang paghukom nagalutaw-lutaw na diha sa kawanangan karon. Nakasulat na kana sa nawong sa matag Amerikano. Husto kana. Ang paghukom nagalutaw na sa kawanangan, ang bug-os nga kapungot sa Makagagahum nga Dios.

253 [Blangko nga bahin sa teyp—Ed.] “Mga tigbiaybiay niadtong mga maayo; nga nagabaton og dagway sa pagka-diosnon, apan nanagdumili sa gahum niini: gikan sa mga ingon niini palayo kamo.”

254 Ayaw ninyo saligi ang sensasyon. Ayaw ninyo saligi ang emosyon. Ayaw ninyo saligi ang bisan unsang butang hangtud nga inyong mahimamat ang Dios, nawong sa nawong, ug tugoti ang Espiritu sa Dios nga mosulod kaninyo. Pagapun-on Niya ang imong kasingkasing ug kalag sa gahum ug gugma, ug dilaab.

255 Dios, tabangi ko nga makaplagan ko ang akong dapit didto, kung asa man kini sa sunod nga mga adlaw, nga didto magapabilin ako hangtud mahibaloan ko kung asa na pud ko magapamuhat.

256 Dugay na kami nagahulat. Dugay na ko naghulat. Nahinudmud ko niadtong nagahabas ko sa akong tugkaran kaniadto. Niadtong gitukod nako kining balaya dinhi, ang Ginoo nagtawag kanako. Mihilak ang akong asawa kay dili niya gustong biyaan ang iyang inahan. Miingon, “Basin dili na siya maatimanan.”

Ug sa akong hunahuna, “Naa pud baya ko’y tigulang na nga inahan, oo.”

257 Atua ako didto, usa ka adlaw, nagahabas og mga sagbot. Milingkod ko. Sa ingon ka klaro, usa ka Tingog ang miabot, miingon, “Ihimulag ang imong kaugalingon, dayon panalanginan Ko ikaw.”

Miingon ko, “Ginoong Dios, lipaya ako dinhi. Imong nakita kung unsa ang akong ginaatubang.”

258 Ang tanan niadtong mga butang nahuman na karon. Si Nanay Broy atua na sa Himaya; Si Nanay Branham, pud.

“Hain na man pud ang akong sunod nga buluhaton, Ginoo?”

259 Ang paghukom mohampak niining nasura, usa niining mga adlaw. Adunay ubang mga nasud nga wala pa makadungog sa Maayong Balita. Aduna pa’y mga dapit.

260 Bisan unsa man ang inyong buhaton, ayaw gayud kalimti ang akong mga pulong. Ayaw gayud! Ipaangkla gyud kini, nga ang Dios magkuha og dagang nga puthaw ug ikulit kini sa inyong kasingkasing, aron dili gyud ninyo kini makalimtan. Ayaw kini kalimti! MAO KINI ANG GINAINGON SA GINOO: Balik kamo sa Dios, sa tibuk ninyong kasingkasing, balik na kamo. Ayaw saligi ang emosyon, sensasyon, o bisan unsa. Pangitaa ang Dios uban sa tanan-tanan nga anaa kaninyo, hangtud nga adunay butang nga mahitabo kaninyo, nga tinguhaon na ninyo nga mahimong tul-id, nga tinguhaon na ninyo nga mahimong diosnon, nga magmahadlok na kamo sa Dios, nga inyong—inyo nang tinguhaon ang pagkinabuhi og matarung, buhata kana. Ayaw kini kalimti, tungod kay ania na kita sa katapusan nga

panahon. Karon, hinumdumi, ania na kita sa katapusan nga panahon.

²⁶¹ Ug hinumdumi kini, ingon nga tapuson ko na, sa pag-ampo, sa makadiyut, ayaw kalimti, patalinghugi ko ninyo, tabernakulo! Ug kung ginarekord gihapon kini sa teyp, patalinghugi ko ninyo, kalibutan, o kung asa man kini makaabot: Adunay usa ka ilhanan nga motungha, usa ka tinuod nga ilhanan; mahimong mitungha na kini apan nasayloan lang, usa ka tinuod nga ilhanan nga gihatag na sa Dios, nga wala panumbalinga.

Mag-ampo kita.

²⁶² Jesus nga taga-Nazaret, sa diha nga misulti didto kadtong halangdong Tingog niadtong adlaw, pipila na ka semana ang milabay, samtang nagatindog ako sa usa ka kilid, sa akong pagtabok niadtong troso duol sa kahoy, ug kadtong Espiritu nga mikunsad ibabaw sa mga kahoy ug miingon, “Si Jesus sa Bag-ong Tugon mao si Jehova sa Daan.” Oh Diyos, ibabaw niini nga Bato ako nagabarug. Ang tanang uban pang mga sukaranan balas nga nagakaunlod. Ang tanang uban pang mga tunubanan balas nga nagakaunlod.

²⁶³ Sulod sa mga traynta ka tuig, Ginoo, gimantala ko, sa tibuok niining walog dinhi, kanang Mensahe, wala gyud ako moirog bisan usa ka pulgada gikan Niini, sukad ako nagsugod, mao ra gihapon nga Mensahe, mao ra nga butang; nga ginatawag ang mga tawo pabalik, dili ngadto sa usa ka sensasyon, kondili ngadto sa usa ka kasinatian sa pagkighimamat sa Dios ug sa pagkahimugso sa Iyang Espiritu. Oh, unsa pa ma’y mahibilin kondili usa na lang ka paghukom? Sila nga nagasalikway niana nga Mensahe, Ginoo, wala na gyu’y nahibilin.

²⁶⁴ Imong bug-os nang gituman ang Imong Pulong, aron ipadayag ang pang-katapusang adlaw nga mga ilhanan, ug walay-pagkasayup nga ginapamatud-an kini, nga Ikaw mao ang Dios, ug nga kami ania na niining panahona. Bisan nga madungog namo ang bantugang mga ebanghelistas sa nagkalainlaing mga dapit karon, nga tanan sila nanagsinggit. Ug ang atong kaulohan sa nasud, ug mao usab sa ubang mga nasud, ug—ug nagaabot ang pagkahadlok. Ug sa dihang madungog namo kining bantugan nga mga tawo, bisan didto sa Pransya, nga nagtagna nga ang unang bomba mahulog kono sa Louisville, Kentucky, nga gatusan ka milya ang gilapdon sa yuta ang magun-ob. Oh Dios, nagkaaduna na sila og higayon sa pagpatalinghug, apan ayaw nilang mamati.

²⁶⁵ Ang mga mantalaan, publikasyon sa simbahan, telebisyon, ug radyo nagmantala na niini. Maong wala na gyu’y puedeng ipasangil pa. Dayon, Ginoo, Ikaw miingon, “Ang tanan nga gihatag Kanako sa Amahan magaari, ug walay tawo ang makaduol gawas kon ang Amahan magadani kaniya.”

²⁶⁶ Karon, Amahan, giampo ko kini nga pag-ampo alang sa akong kaugalingon. Ania ako, nga nagakatigulang na karon, ug wala ko nasayod kung pila na lang ka adlaw ang nahabilin kanamo, Ginoo. Basin kutob na lang kami karong adlaw. Apan bisan unsa ang nahabilin, Ginoo, ug kung unsa man ang nahabilin sa akong kinabuhi, Oh Dios, posible ba nga Imong gamiton kini ug igahin kini sa usa ka katuyoan, alang sa Imong kahimayaan?

²⁶⁷ Nagaampo una ako alang sa akong kaugalingon, Ginoo, nga Imong igahatag kanako ang Imong kabubut-on. Matuman unta ang Imong kabubut-on, Ginoo, bisan unsa man kini. Gitinguha ko nianang adlaw sa dihang moatubang na ako Kanimo nga igasulti Mo kini, “Maayong pagkabuhat.” Dako man, o gamay, unsa man ang anaa sa Imong halangdong kasingkasing alang sa akong kinabuhi, Ginoo, ania ako.

²⁶⁸ Magpadala Ka og usa ka Manolunda nga dala ang nagbaga nga uling ug limpyohi ang among mga ngabil ug balaana kami, Ginoo, alang sa katapusang dakung butang nga gitakdang moabot sa kalibutan. Himoa kaming tingog nga nagasinggit didto sa kamingawan sa sala, “Pangandam mo alang sa pagtagbo sa Dios.”

²⁶⁹ Kining gamay’ng iglesia, kining mga tawo nga nanabong, adlaw-adlaw, ug nagamaneho og gatusan ka milya, Oh Eternal ug mahigugmaon, ug dili nagakalimot sa buhat, ang Dios ni Abraham, Isaac, ug ni Jacob, Nga mao’y nagbanhaw kang Jesus gikan sa mga patay, ug karon Siya nagalingkod sa tuong kamot sa Halangdon sa Kahitas-an, ang Dios nga nagpuyo sa unod, panalangini kining mga tawo nga akong gipanalanginan sa Imong Ngalan. Hinaut nga kanunay nilang hinumduman ug ilhon nga adunay ilhanan, ilhanan sa katapusan. Nagaampo ako nga Imong ihatag kanila, ug himoon silang mga mananaug alang sa uban: diha sa ilang ginatrabahoan, bisan asa man sila, diha sa mga kanto sa kadalanan, sa mga gasolinahan, o asa man kini, nga nagapamatuod diha sa merkado, bisan ngadto sa tigbaligya og gatas. Bisan unsa man kini, Ginoo, kung adunay magpahamatngon diha sa ilang kasingkasing, hinaut nga mahimo silang saksi. Hinaut nga magkinabuhi sila og diosnon ug balaan nga pagkinabuhi hangtud nga sila mamahimong sinulat nga basahon nga pagabasahon sa tanang mga tawo.

²⁷⁰ Dios, panalangini ang among mga kababayen-an. Oh Dios, nagaampo ako nga Imong tugotan sila nga maghugas sa ilang mga nawong, kadtong wala pa, tangtanga ang . . . kanang make-up ni Jezebel gikan kanila. Hatagi sila og kaisog nga iya sa mga Cristohanon, ug nga maanaa sa ila ang Espiritu sa Dios, igo nga, mahibaloan nila nga dili sila angay magsul-ob niadtong mahugaw nga mga bisti nga ilang ginasul-ob. Patuboon ang ilang buhok, sama sa mga gining. Kay nahisulat

man sa Biblia, “Bililhon sa panan-aw sa Ginoo kanang gamay’ng sanga nga makaikyas niining tanang mga butang nga motungha sa katapusang adlaw. Mamahimo kining mahimayaon sa panan-aw sa Dios,” ingon nga gisulti na daan kini sa propeta. Dios, itugot kana.

²⁷¹ Wala na ko’y mahimo pa. Nasinggit na nako ang akong tingog, sulod sa mga daghang katuigan, Ginoo. Ug gawas kon molihok Ka karon, wala na ko’y laing mahimo pa. Ako nagaampo, nga Imong buhaton. Ug nasayod ako nga buhaton gyud Nimo kini, tungod kay gisaad Mo kini sa Imong Pulong. Ug dinha ako nagabarug. Ang akong mahimo mao ang pagpamatuod lamang, Ginoo. Ug walay tawo ang makaduol gawas kon Ikaw magadani kaniya; ug ang tanan nga gihatag sa Amahan moari. Aduna ko niana nga kasiguradohan, nga ang Imong Pulong matuman gayud. Panalangini kami, Ginoo.

²⁷² Ug kung aduna ma’y mga anaa dinhi nga nagsalig lamang sa sensasyon, tingali nakasinggit sila, sila, tingali nakabaton sila sa Espiritu Santo, o . . . Wala namo kana ginahatagan og bili, Ginoo, tungod kay nakakita na mi og mga tawo diha sa mga dula sa baseball, nga nanagsinggit pud. Nakakita na kami’g mga tawo diha sa kalibutanong mga kalingawan, nga nanagsinggit. Nakakita na kami og mga tawong nakahilak tungod sa sobrang kalipay, nga atua sa sayawan, nanagsayaw, ug tanan nang ingon niana nga mga butang. Dili man kana Ikaw, Dios.

²⁷³ Apan ang mahimamat Ka ug maistorya Ka, ug nagatubag Ka kanamo, mao kana ang among gitinguha, Ginoo. Oh, nangamuyo ako Kanimo, Dios, niining mismong minuto, nga Imong ipadala ang Balaang Espiritu dinhi niining lawak, niining gamay, yano nga dapit. Wala gayu’y dapit nga takus nga mahimo Niyang adtoan. Apan nagaampo ako, Dios, nga, sa Imong kaugalingong paagi, Imo Siyang ipadala karon mismo sa lawak. Mang-awhag og mga kalag.

²⁷⁴ Sa gikaingon ko na kaganina, Ginoo, nagbutang Ka tingali og babag sa dalan sa usa ka tawo, mahitungod niining mga pagtawag paadto sa altar, nga nagahangyo ug nagaawhag sa mga tawo nga moduol. Ug sa pagbalik namo sunod tuig, amo silang makaplagan nga nahimo pa hinoon og duha ka pilo nga anak sa impiyerno kay sa una. Unsaon nila pagduol gawas kon Imo silang awhagon ug paamgohon sa ilang sala, ang halandong Balaang Espiritu?

²⁷⁵ Ug nangamuyo ako Kanimo, Ginoong Dios, kung kanang makasasala nga lalaki o babaye, batan-ong lalaki o batan-ong babaye, ania dinhi sa bilding karong buntaga, moabot unta ang Espiritu Santo uban ang gahum sa pagpaamgo og sala hangtud motulo ang mga luha sa ilang mga aping ug motuhop sa ilang kalag, Ginoo, nga gikan sa kahiladman sa ilang kasingkasing ilang pagatoohan ug pagadawaton si Cristo. Itugot kini, Ginoo.

Wala sila magkinahanglan og altar. Kay ang ilang kalag mao kana'y ilang altar. Itugot kini, Ginoo. Dayon kinasingkasing nga moduol sila Kanimo, ug moingon, "Gusto kong magpabautismo karon sa Ngalan ni Jesus Cristo alang sa kapasayloan sa akong mga sala nga akong gihinulsolan." Itugot kini, Ginoo. Pun-a sila sa Espiritu Santo.

²⁷⁶ Hatagi kami og mga ebanghelista sa kalibutan karon, dili kadtong nagaaghat ug nagapugos sa mga tawo, ug himoon sila nga anak sa denominasyon. Dios, magpatungha Ka og Imong Kaugalingong mga anak. Paampo, Ginoo, ang mga tawo. Ginapamalandong ko ang panimalay ni Cornelio kaniadto. Wala pa kini sukad mahitabo sa usa ka Gentil, apan sila nanagpuasa ug nanag-ampo. Ug sa diha nga ang alagad sa Dios, kadtong propeta, mitindog didto, "Ug samtang nagsulti siya niining mga pulonga, ang Balaang Espiritu mikunsad kanila nga nakadungog sa Pulong." Dios, ihatag kana nga matang sa panagtigum. "Samtang si Pedro nagsulti niining mga pulonga." Oh Dios, andam gyud sila kaniadto. Nagpuasa sila. Naghulat sila. Sinsero sila. Wala sila nga "nagahulat" lang, kondili sila "nagahulat hangtud."

²⁷⁷ Kadtong mga apostoles nanaghulat hangtud nga ang Dios mikunsad taliwala kanila, ug ila mismo Siyang makita ug makapakigsulti Kaniya. Nanagsangyaw sila nga may mga kasingkasing nga nagpadilaab sa kalibutan. Maisugon sila, ug mibarug didto mismo sa mga lugar diin puede silang pamutlan sa ilang mga ulo. Miingon sila, "Husto ba alang kanamo nga maminaw kaninyo, o sa inyong mga organisasyon, o kaninyo nga maki-denominasyong mga lalaki? O, angay ba kaming mamati sa Dios? Kamo ang maghukom." Ug dihadiha dayon, nga gipangbuhian sila, diretso silang migawas ug giwali pag-usab ang Ngalan ni Jesus Cristo. Oh Dios, ihatag kanamo—ihatag kana kanamo, Ginoo.

²⁷⁸ Patindoga kining usa nga Imong ginasulti diha sa mga Kasulatan, kanamo. Dihogi siya, Ginoo. Ginatawag ko siya. Ipadala siya, Ginoo. Oh Dios, nagatuaw ang among mga gutom nga kasingkasing. Ipadala siya, Ginoo, aron ipahibalik ang mga tawo ngadto sa Pagtoo nga iya sa mga ginikanan pag-usab, nga mao'y magpawas kanila gikan niining mga denominasyon nga mga pahoy, ngadto sa tinuod nga kasinatian nga iya sa Dios, sama sa ilang gibuhay sa Pentecostes kaniadto, usa ka tinuod nga iglesia pag-usab, nga nagadilaab, nga dala ang mao ra nga Mensahe, mao ra nga Pagtoo, mao ra nga Doktrina, mao ra nga Biblia, mao ra nga Dios nga may mao rang ilhanan. Patindoga ang usa ka propeta sa among taliwala, Ginoo.

²⁷⁹ Ayoha ang mga masakiton sa among taliwala karon, Ginoo. Adunay mga tawo dinhi nga nanginahanglan. Ako nagaampo alang kanila, Amahan. Taas-taas na ang akong, paglangay karong buntaga, ug aduna pa'y daghang naglingkod dinhi.

Usa ka gabii kaniadto, samtang nagwali si apostol Pablo sa tibuok gabii, usa ka batan-ong lalaki ang nahulog gikan sa bilding ug napatay niya iyang kaugalingon. Nakatulog man gud ang maong lalaki. Wala niya tuyoa, pero siya—siya nakatulog. Ug siya nahulog, ug nawad-an siya'g kinabuhi. Ug ang apostol nag-ampo, ug ang kinabuhi sa maong lalaki mibalik pag-usab.

²⁸⁰ Oh Ginoong Dios, daghan dinhi ang nangahulog sa balatian. Ug bisan tuod nagdugay mi nga lapas na sa naandang oras sa pagpapauli sa mga nagasimba, aduna gihapo'y nagpabilin nga mga masakiton. Oh Dios, tugoti kana nga gahum, kana—kanang Balaang Espiritu nga personal nga nagakunsad ingon nga Haligi nga Kalayo Nga nagapahayag sa Iyang Kaugalingon ug nagapaila sa Iyang Kaugalingon kung Kinsa Siya, ug kami nagatoo Kaniya, tugoti nga Siya molangkob sa matag indibidwal nga ania dinhi karon. Ayoha ang mga masakiton. Pun-a sila sa Espiritu. Maghatag Ka og kaluwasan sa matag sitwasyon, Ginoo, nga among gikinahanglan. Pun-a ang among mga kasingkasing og pagtoo, Dios, sa pagtoo nga dili gayud mamatay, lakip ang pagtoo nga dili mokompromiso ingon nga aduna kami og MAO KINI ANG GINAINGON SA GINOO. Itugot kini, Ginoo.

²⁸¹ Imo kining katawhan, Imong Mensahe, Imong Pulong, Imong mga alagad. Ug ang yawa wala'y kontrol kanamo. Dili gani siya makahimo sa paglalag kanamo bisan kining tabernakulo matunas na. “Kay kon kining yutan-ong tabernakulo matun-as na, kita adunay usa nga nagahulat.” Wala siya'y mahimo nga makadaut kanamo, kay ang tanan nga among kaaway Imong kaaway, kay kami Imo man. Gipalit na kami sa usa ka bili, sa bililhong Dugo ni Jesus.

Busa, kamong mga yawa nga naggapos niining mga tawo pinaagi sa balatian, Ginamandoan ko kamo, sa Ngalan ni Jesus Cristo, nga mogula gikan sa matag usa kanila. Ingon nga alagad sa Dios, nga nag-angkon nga kini nga Pulong mao ang Kamatuoran, biyai sila. Wala ka'y katungod. Ang tanan nga imong giangkon nga aduna ka, giwagtang na didto sa Kalbaryo. Ug dili na nimo sila mahawiran pag-usab.

²⁸² Karon, Dios, hatagi ang matag lalaki ug babaye, batan-ong lalaki o batan-ong babaye dinhi, og pagtoo aron toohan kana. Gipahayag na ang Pulong. “Kung moingon ka niining bukid, ‘Ikaw mabalhin,’ ug dili magduhaduha sa imong kasingkasing.” “Ang pag-ampo nga inubana'g pagtoo nagaluwas sa masakiton.” “Maangkon nimo ang imong ginapangayo.” Nasayod kami niana. Aduna kami og ingon niana nga pagsalig sa Dios. Kung kami aduna gayu'y pagtoo, kung ang Dios anaa nagapuyo sulod kanamo, pagatoohan gyud namo kana. Ug nasayod ako nga ingon niana gyud kini, Ginoo. Busa, itugot kini, karon, alang sa balatian ug kaluwasan. O, unta akong giingon, o unta angay nakong giingon, kaluwasan una ug dayon kaayohan sa balatian.

Itugot kini, Ginoo, tungod kay ang kalag mas bililhon pa kay sa lawas.

²⁸³ Apan alang kanila nga, usahay, ang ilang kalag luwas na, ug kining daan nga lawas nagpabilin gihapon nga iya ni Satanas, ug nasayod siya nga iyang ipapadayon kini hangtud sa katapusang panahon. Dugmokon niya kini ug dugtaon hangtud nga ang mga insekto sa yuta mokamang niini ug ut-uton kini. Apan dili gayud niya matandog ang maong kalag, kay kini ang bililhong bahandi sa Dios. Ug kana nga kinabuhi, sama sa usa ka dahon, nagabalik kini ngadto sa Dios nga Mao'y naghatag niini; motungha kini pag-usab sa sunod nga panahon, nga aduna na'y bag-ong lawas nga dili na gayud matandog ni Satanas. Bisan ang pagtigulang o unsa pa mang butang dili na makatandog niini. Kini mamahimong usa ka gihimaya nga lawas. Mao kana ang among ginapaabot, Ginoo. Panalangini ang Imong katawhan karon. Kay Imo man sila. Ug ginatugyan ko sila sa Imong kamot. Ako kining ginapangamuyo sa Ngalan ni Jesus.

[Nagahatag og pahamatngon si Igsoong Neville—Ed.]
Himaya! Dalaygon. . . [Nagahatag og pahamatngon ang usa pa ka igsoong lalaki.]

²⁸⁴ Dili kana akong pulong. Pulong kana sa Dios. Oh, mao kanay atong gikinahanglan, niining taknaa—niining taknaa nga atong ginapuy-an! Wala ba kamo nakasabot, mga higala, nga ang Dios wala nagaadto sa bantugan nga mga tawo? Nagapuyo Siya taliwala sa mga mapaubsanon, kabus, talamayong mga butang. Tingali wala n'yo maamgo kung unsa ang nagakahitabo karon, kung unsa ang nagalihok taliwala niini nga bilding, kung unsa ang nagalihok taliwala niining mga tawo karon.

²⁸⁵ Nganong ang Espiritu miingon man, ganina, “Sa wala pa Ako'y buhaton og unsa man kanila,” pinaagi ni Igsoong Higginbotham, “bantayi kini nga Mensahe, kay gihatud Ko na Kini,” *usa ka butang* nga sama niana, “aron pasidan-an kamo niining butanga nga umaabot”? Tan-awa unsay nahitabo.

²⁸⁶ Adunay pipila, sa mga Kasulatan nga akong gilista dinhi, ang nasayloan nako, ug wala ko Sila nahisgotan. Gitultolan ko dinha sa Balaang Espiritu. Kita n'yo? Ang uban sa maong mga Kasulatan, wala gyud nako matandog. Bug-os akong mipaingon, sa lahing hilisgotan. Matag karon ug unya, aduna ko'y madungog nga nagaabot, molingi ko ug susihon kung asa kini dapit. Ang Espiritu nagapakigsulti gikan sa tanang direksyon karon.

²⁸⁷ Oh, mga tawo, pagmatinud-anon kamo, pagmatinuuron kamo. Ayaw pagsalig sa. . . Kita n'yo, nagtutok kamo—kamo sa usa ka butang nga bantugan ug nagasidlak.

Samtang, ang tanang mga propeta, bisan si David miingon, “Sa Pag-abot sa Ginoo, kanang, matag bukid pagahimoon nga ubos, ug ang—ug ang patag nga mga dapit pagahimong taas.” Miingon, “Ang kabukiran molukso sama sa gagmay'ng mga

laking-karnero, ug ang tanang dahon mopakpak sa ilang mga kamot.” Bueno, unsa kaha’y dahum sa mga tawo nga mahitabo kaniadto, sa dihang. . . miabot si Jesus?

Unsa man gyu’y nahitabo? Usa ra diay ka kabus nga magwawali, nga walay edukasyon. Sa edad nga siyam ka tuig, miadto sa kamingawan, dili aron mabansay sa tawo, kondili aron—aron mabansay sa Dios. Mitungha, ug atua siya nga nagsul-ob ra og panit sa karnero, nga may bangas sa tibuok niyang nawong, balhiboon ang tibuok lawas, ug nagdunghay iyang buhok kutob sa iyang liog. Didto siya sa kamingawan nagapuyo, nga mga dulon ang ginakaon, mga apan-apan kana, mga dulon sa kalasangan ug dugos, niadtong nagpuyo siya didto sa kamingawan. Ug miabot, nagtindog sa lapok sa mga baybayon, ug gimantala ang pag-abot sa Mesias. Ug ang Mesias miduol didto, nga usa ka ordinaryo ra nga Tawo taliwala sa tawo didto, ug gibautismohan. Ug gipahayag kadto sa tanang mga propeta ingon nga usa sa pinakadaku nga butang nga nahitabo sukad, ug mao gayud. Kita n’yo?

²⁸⁸ Nagpaabot sila og usa ka butang nga bantugan, nagasidlak nga butang, nga mahitabo. Kita n’yo? Ang Balaang Espiritu wala nagasidlak. Nagadan-ag kini. Ang pagsidlak iya sa kalibutan. Apan ang nagadan-ag iya sa Dios.

Dan-agi ako, Ginoo, mao’y akong gipangamuyo. Himoa akong mapainubsanon. Kuhaa ako, umula ako ug bag-oha ako. Espiritu sa buhi nga Dios, lihok pag-usab nganhi kanako. Umula ako, Bag-oha ako. Himoa ako nga Imo, Ginoo. Dawata ako.

²⁸⁹ Ako nahibalo gayud nga ang Espiritu ni Cristo nagapanglihok tibuok niining bilding karong buntaga. Ang Dios nga mohukom niini nga kalibutan ania karon, ingon ka sigurado nga ako nagatindog karon niini nga pulpito. Aduna na’y usa, duha, tulo ka mga pagkumpirma niini, niining Pulong, eksakto sa kung unsa ang giingon diha sa Biblia. Nadungog ba ninyo nga mihunong kini nianang higayona, pagkahuman niana? Usa, duha, tulo, ang tanan naa sa espirituhanong pagkahan-ay, ang tanan nakasubay sa Kasulatan. Oh, ablihi ang inyong mga kasingkasing ug sabta. Oh, pagkamahinungdanon nga takna, pagkatalagsaon ang puedeng mahitabo niining taknaa!

²⁹⁰ Atua sila didto sa usa ka lawak sa itaas, nga ang tanan nagkahiusa, nagahulat. “Kay sila nga nagahulat sa Ginoo magabag-o sa ilang kusog. Sila manlupad pinaagi sa mga paku ingon sa agila.”

²⁹¹ Dili nga moadto lang didto ug moingon, “Ginoo, pasayloa ko sa akong mga sala. Karon ginadawat ko pinaagi sa pagtoo nabatonan na nako ang Balaang Espiritu,” dayon mobiya na.

“Sila nga nagahulat sa Ginoo,” sulod sa pila ka semana, pila ka mga adlaw, hangtud kanus-a man kana, “magabag-o sila sa ilang kusog. Sila manlupad pinaagi sa mga paku ingon

sa agila. Sila modagan ug dili maluya. Kon sila molakaw, dili sila kapoyon. Tudloi ako, Ginoo, tudloi ako, Ginoo, sa paghulat.” Maghulat sa Ginoo.

²⁹² Adlaw ug gabii, sa walay hunong, si Anna wala gayud mobiya sa templo, kanunay nga nagaampo, adlaw ug gabii. Niadtong ilang gidala didto si Jesus, si Anna, nga buta, sa tibuok bilding, naglibot-libot siya. Usa siya ka buta nga babaye nga mipandong sa iyang mga kamot diha kang Jesus ug gihimaya ang Dios. Bisan pa og, siya buta sa pisikal, sa iyang espiritu, gigiyahan siya sa Espiritu, hangtud sa kung asa si Jesus.

²⁹³ Didto pud, si Simeon, nga nagahulat kang Jesus, didto sa lawak-ampoanan, nasayod nga gisaaran siya, sa Espiritu Santo, nga dili siya mamatay; usa ka tigulang na nga lalaki, otsenta, hapit na mag-nubenta anyos. Ug siya’y . . . dayag nga gisultihan ang mga tawo, “Dili ako makakita og kamatayon hangtud nga makita ko ang Mesias.” Ug niadto mismong minuto, usa ka gamay’ng Bata . . .

Unsa man Siya? Dili Siya usa ka bantugan nga tawo, nga ang tanang mga guwardiya manindog og alerto sa dihang gidala na nila sa sulod ang Mesias, nga giputos gyud sa matahum ug maanindot nga paagi, maanyag ug gidayandayan, ug gipahumotan sama sa gagmay’ng mga bata nga igahalad. Apan usa ra ka kabus nga inahan nga gisultihan og dili maayo, giingnan, “Nagkaaduna siya’g Anak, nga dili man siya minyo.” Giputos sa mga lampin, panapton nga gikan sa yugo, yugo sa baka ang giputos Kaniya, nga nagalakaw sulod sa bilding, ug ang tanang tawo nagahipalayo Kaniya.

Apan ania ang gamay nga pundok, kadtong gamay nga grupo. Si Anna, ang usa. Si Simeon, ang usa pa, nga nagalakaw subay niadtong pila, nga wala hisayri kung kanus-a niya makitan Kini. Ug giisa niya ang iyang mga kamot ug miingon, “Ginoo, itugot nga ang Imong sulugoon mobiya na diha sa kalinaw karon, sumala sa Imong Pulong, kay nakita na sa akong mga mata ang Imong kaluwasan.” Hum. Kita n’yo? Walay bisan unsa man nga pagawal, kasidlak. Kondili usa ra ka kahayag; ug bisan tuod gisultian kadto og dili maayo, usa kadto ka ilhanan.

²⁹⁴ Ug, karon, ginasultihan og dautan ang maong ilhanan. Walay nagapakitimbayayong Niini. Kini—Kini. . . Ginapasipalahan Kini, ug ginabansagan og bisan unsa na lang. Apan usa kini ka ilhanan nga wala makita, usa ka ilhanan nga ginapasipalahan. Ang Biblia nagaingon niana, “Usa ka ilhanan, nga ginapasipad-an.”

²⁹⁵ Atong hinumduman kini sa diha nga kita mopauli na sa atong mga panimalay. Ayaw gayud itugot nga kini nga Mensahe mamatay sa inyong mga kasingkasing. Bisag unsa pa’y inyong buhaton, ayaw kini itugot. Pamalandungi Kini, adlaw ug gabii. Ug pag-ampo, adlaw ug gabii, nga ipatungha na sa Dios ang

Iyang saksi karon. Andam na kita, kay nagatoo ako, nga haduol na, wala na'y panahon pa. Paingon na ta. . .

²⁹⁶ “Sa unsang paagi, kanus-a man kini mahitabo, Igsoong Branham?” Wala ko kabalo. Basin karong adlaw. Basin ugma. Kung dili man karon, magpaabot ko niini ugma. Ug tingali karong tuiga, sunod tuig, napulo ka tuig gikan karon. Tingali traynta pa ka tuig, wala ko masayod kung kanus-a gyud kini. Apan ako nagaingon, gikan karon, kinahanglan nga andam kamo matag minuto.

²⁹⁷ Ug ayaw pagdawat og usa ka butang sa ingon ka sayon lang. Ayaw kana buhata. Ayaw paghunong, adlaw ug gabii, hangtud nga maistorya ninyo ang Dios. Ilayo ang inyong kaugalingon sa panatistismo. Ayaw mo pagpadala sa emosyon. Ayaw kana buhata. Mao kana ang nagadala og daghang mga pagka-radikal ug maghinungdan nga kahadlokang kini sa mga tawo, kita n'yo, tungod sa radikal nga pagkapanatistismo. Ayaw gyud mo pagdawat niana; ayaw gayud. Pagpabilin mo dinha hangtud nga maistorya ninyo ang Dios. Total, inyoha man kanang kalag, ug kamo man ang magapuyo didto sa Eternidad. Ug siguroha nga dili kamo kutob lang sa pagpakiglamano ug kutob lang sa paglitok og kredo, o—o nagadawat og butang pinaagi og pagtoo. Ayaw gyud ninyo buhata kana. Pakigsulti kamo sa Dios. Tugoti ang Dios nga makigsulti kaninyo, ug tan-awa kung unsa ang mahitabo kaninyo. Susiha ang inyong mga tinguha ug kung unsa'y nagakahitabo, nan inyong mailhan kung nagpakigsulti gyud kamo sa Dios o wala.

²⁹⁸ Kaninyo nga mitoo Kaniya karong buntaga. Kaninyo, ug akong—akong nahisgotan ang mahitungod sa mga pagtawag paadto sa altar. Nasayod ba kamo kung giunsa nila pagpahigayon niini sa Biblia? “Ang matag usa nga nagtoo sa Ginoo, ang matag usa nga nagtoo sa Ginoo gibautismohan sa Ngalan ni Jesus Cristo alang sa kapasayloan sa ilang mga sala.” Kung wala pa mo. . . Wala man mi nagpahigayon og pagtawag paadto sa altar. Wala gyud sila kaniadto nanagpaduol sa mga tawo. Kung buhaton mo man gud kana, tanan na'y mabatonan mo. Dihay usa ka lalaki nga miduol sa altar, nga mora'g garboso tan-awon, ug miluhod, tungod aduna man gu'y nagpugos kaniya. Mamahimong doble ang kalisud para ninyo—ninyo—ninyo nga ipaduol siya pag-usab. Kita n'yo? Ug unsa ma'y inyong buhaton? Tanan na lang mabatonan n'yo. Ug si Jesus miingon, “Ang tanan nga gihatag sa Amahan Kanako moari Kanako.” Magpabilin lang nianang Pulong. Ang Dios na ang bahala sa tanang uban pa niini. Husto kana. Husto kana. Ang Dios na ang bahala sa tanang uban pa niini.

²⁹⁹ Panalanginan kamo sa Dios. Nanghinaut ko nga magkita ta pag-usab unyang gabii, unta, kadtong makatambong pa. Nasayod ko na daghan sa inyo ang dili na makatambong, pa. Moari ko, unyang gabii, aron maminaw sa akong igsoon, kung

kabubut-on sa Dios. Dili ko buot ilogon ang duha niya mismong pagmensahe.

³⁰⁰ Ug—ug si Igsoong Neville usa ka buotan kaayo nga alagad sa Dios. Ug nasayod ko, nasayod gyud ko kung kinsa... Pagnagapaminaw ako kaniya nga nagawali, nasayod ko nga direkta kining nagagikan sa iyang kasingkasing. Nasayod gyud ko niana. Ug si Igsoong Neville, sama sa iyang nahisgotan niadtong miaging gabii, kadtong iyang gisaysay, nga nag-ingon ko kaniadto, “Moabot ang adlaw nga pagabautismohan ko siya sa Ngalan ni Jesus.” Ug nabuhat gyud nako kana. Ngano man? Tungod kay nakita nako sa iya ang pagkasinsero ug ang pagkamatinud-anon. Nasayod ko nga kon siya...aduna ma’y ihatag kaniya, ug nakita niya nga...ug kung iyang—kung iya Kining makita, nga maablihan ang iyang mga mata, dawaton gyud niya Kini. Naghulat ko kaniadto, ug gisultihan nako ang iglesia, “Ayaw mo’g kabalaka, moari ra kadugayan kanang Methodist nga magwawali.” Ug ania siya karon, nga pastor na sa tabernakulo, nga ingon ka solido sa buluhaton, ug sa Mensahe. Nagatoo siya sa Dios. Ug nasayod gyud ko, pag aduna ko’y madungog gikan kang Igsoong Neville, nasayod ko nga tinuod kining, nagagikan sa Dios, tungod kay ingon niana man siya nga matang sa pagkatawo.

³⁰¹ Ako nang gipandong ang akong mga kamot sa ibabaw niining mga panyo dinhi nga naiampo na. Nagasalig, nga ang matag usa kaninyo nakadawat og panalangin gikan sa Diyos. Nagasalig nga ang Dios anaa sa inyong kasingkasing.

³⁰² Wala kita—wala kita moari dinhi aron—aron nga makadawat og panalangin gikan sa Dios, nga mao lang kana, ang gianhi nato. Tungod kay sa kada adlaw nga kita nagginghawa, nakadawat na ta og panalangin gikan sa Dios. Ang atong gianhi aron buhaton, mao ang pagpatul-id, ang pagtangtang, ang pagcirkunsidar sa atong mga kasingkasing, ug ang pag-atubang sa Dios, ug ang pagtoo sa Dios sa tibuk natong kasingkasing.

³⁰³ Hinumdumi ang Pulong sa Ginoo. Ug ayaw kalimti, ug ayaw pakyasa, ang pag-ila sa usa ka tinuod nga ilhanan nga gipadala gikan sa Dios.

Ug ako nang igatugyan ang panerbisyo ngadto kang Igsoong Neville, aron masulti pa niya ang iyang gustong isulti.

[Nagaingon si Igsoong Neville, “Sigurado ko, grabe, sultihan ko kamo, nasayod ko nga gikumpirma gyud sa Dios ang butang nga gipaabot nato sa unang bahin pa lang sa buluhaton. Samtang akong gilantaw ang daghang mga nawong, karong buntaga, nasayod ko nga maayo gayud nga nakaanhi kamo, ug maayo kaayo pud alang kanako nga nakaanhi karon, ug angay ra gyud nga nakaanhi ako, ug angay ra gyud nga nakaanhi kamo usab. Natuman gyud sa husto ang inyong misyon kung mao ma’y inyong pagtan-aw niini. Kung unsa ang inyong nabatonan

karong buntaga, nabatonan ninyo tungod kay nadawat ninyo kini gikan sa Dios.]

[“Ug sa walay paglangan magpahigayon kita og panerbisto sa bautismo, pagkahuman niini. Ug si Igsoong Willard Collins ang magdumala sa maong panerbisyo sa bautismo, ug kita adunay duha o sobra pa nga mga desidido nga magpabautismo. Ug gusto natong makakita og usa ka gatus ka mga desidido magpabaustismo sa Ngalan ni Jesus Cristo, niining buntaga.”]

Amen!

[“Paningkamoti ninyo nga ipakita ang inyong pagtoo sa dayag nga paagi. Ang pagtoo dili gayud buhat. Ang pagtoo, nga kutob lang sa pagsulti, walay pulos. Apan ang pagtoo, nga ginapadayag, mao’y matang nga iya sa Biblia.”]

Amen! Husto kana.

[“Pinaagi sa pagkamasinugtanon, maipadayag ang maong pagtoo. Hinaut nga itugot sa Dios kang bisan kinsa, karong buntag, nga ania dinhi, nga mibati og andam sa pagbuhat niini, mangduol unta kamo. Kung kini’y, kung kini medyo wala nahiuyon sa inyong giplano, o basin aduna mo’y iskedyul nga kinahanglan na buhaton dayon, o kung unsa man, kung mahimo n’yo nga ipaunya sa kana, ug buhaton kining buhat sa pagkamasinugtanon, ako nagatoo ingon nga inyong kabus nga igsoon diha kang Cristo, ug ingon nga usa ka kauban sa buluhaton sa propeta sa Dios, nagatoo ko nga kini—kini mao ang inyong pinakamaayong desisyon, nga mahimo ninyo karon.”]

Itugot unta sa Dios!

[“Ug nanghinaut ako nga mogaduol kamo, ug moapil sa uban niining mga pagabautismohan, aron kamo mamahimong kabahin sa pundok, nga naglangkob niining gamay’ng panon. Oh, pagkamaanindot niini, dili ba? nga mamahimong usa sa mga Iyaha, ug magkinabuhi sumala sa Iyang Pulong. Manindog kitang tanan, samtang nangandam kita sa atong pagpamauli.]

[“Sa sunod Dominggo, si Igsoong Branham mobalik kanato dinhi pag-usab. Atong timan-an kana nga pahibalo. Miingon siya nga moanhi siya unyang gabii, apan wala siya moingon nga siya’y mowali. Apan, ang akong tinguha mao, nga kanunay unta, siya ang magawali. Ug dili siya kinahanglan mabalaka sa akong baruganan mahitungod niana. Sigurado gayud ako sa akong gitinguha, sa pagkahibalo nga ang Mensahe ug ang—ang pagtawag, ang katungdanan nga iyang ginahuptan, mao’y labing gikinahanglan niining katapusang adlaw. Andam kong ihatag ang pulpito, bisan unsang orasa.]

[“Isulti ko kini sa atubangan sa mga tawo ug sa atubangan niya: Ako, malipayong mohatag sa pulpito, bisan unsang orasa, sa bisan unsang buluhaton, alang niining importante nga Mensahe nga akong ginatooan, tungod kay ang Dios nakigsulti

kanamong duha, karong buntaga, nga nagapaila sa ilhanan bahin niini. Ug malipayon ako nga nagkaaduna ko'g pribilihiyo nga mamahimong mao'y nagahatag og pulpito kaniya.]

[“Ug gusto ko, unyang gabii, malipay gyud ko, kung ang atong igsoon, ug alagad ug propeta sa Dios, kung gusto niyang buhaton kini, ikalipay ko gayud nga ihatag sa iya ang pulpito. Basta mosulti lang siya, kung unsa man ang iyang gibati. Apan, nagsulti na siya, ug itugyan na lang nato ang konklusyon sa maong tibuok butang sa mga kamot sa Makagagahum nga Dios.”—Ed.]

³⁰⁴ Wala na ka'y hangyoon nga mas matam-is pang madungog kay niana, gikan sa usa ka tinuod nga igsoon, dili ba? Ang rason nga ako. . . Kita n'yo, mga higala, nasayod ko—ko nga gihigugma ko ninyo. Gihigugma pud ninyo si Igsoong Neville. Gihigugma ninyo ang tanang pinili sa Dios. Gihigugma nato ang usa'g usa. Kung aduna ma'y panahon nga kita kinahanglan nga maghigugmaay sa usa'g usa, karon kini. Kinahanglan nga mahimong suod kaayo ta, igsoon, nga kita. . . Labaw pa sa tinuod nga mga igsoong lalaki ug igsoong babaye sa dugo. Mao kana ang gugma nga kinahanglan anaa sa atong mga kasingkasing alang sa usa'g usa, hataas nga pagtamud, ug pagtahud. Ug ganahan ko niana. Ganahan ko anang tinuod nga paghigugma.

³⁰⁵ Ug ania, si Igsoong Neville, ug si Igsoong Higginbotham, si Igsoong lalaki. . . Nagatoo ko nga si Igsoong Funk kado, mora gani og dili siya, kadtong naghatag sa maong mensahe ganina. Gikan kado. . . gikan kini sa Dios, kining mga mensahe, higala, tinuod gayud. Ang si kinsa man nga adunay espirituhanong pagpang-ila nahibalo niana.

³⁰⁶ Apan ania kung unsa kini. Sa moabot nga, ganahan kaayo ko—ko kang Igsoong Neville nga nahunahunaan nako kini, nakita n'yo. Dili ko—ko ganahan mamulong og unsa man gawas kung aduna gyud ko'y butang gikan sa Dios nga igasulti kaninyo. Kita n'yo? Ug miabot kini—kini sa akong kasingkasing, mga duha o tulo ka adlaw na ang milabay, ug wala ra kaayo ko nagtagad niini hangtud kagabii, sa dihang giablitan ko ang pipila ka mga Kasulatan. Mao ni ang rason nganong gipamulong ko kini. Wala na kini sa akong mga kamot karon. Nakita n'yo? Kung unsa man ang inyong buhaton niini, naa kana, anaa na kana, sa inyo, nakita n'yo. Apan wala na kini sa akong kamot.


³⁰⁷ Apan, si Igsoong Neville ug ako, ingon niana ra gyud mi. Pag-nagaanhi ko dinhi, aron—aron mamulong sa ubang higayon, ug mora'g ingon niana, ug si Igsoong Neville adunay mensahe gikan sa Dios, nan molingkod lang ko. Oo, tinuod gayud. Akong hatagan og kahigayonan ang mensahe sa Dios, kanunay. Kita n'yo? Ingon niana ang ginabuhat namo alang sa usa'g usa. Ug kana ang hinungdan nga maingon nako nga akong. . . Kung—kung ang Dios walay ihatag kanako og unsa

man, nga, mahimong, akong igapamulong, ug kung adunay gihatag ang Dios kang Igsoong Neville, ug samtang ania ko sa pulpito, Domingo sa buntag, Domingo ba sa gabii, o kanusa man kini, si Igsoong Neville, ingon niana gayud ka maayong igsoon, moduol siya kanako, moingon, “Igsoong Branham, giila ko ikaw nga alagad sa Dios, apan ang Ginoo naghatag kanako og mensahe.” Buhaton gyud nimo kana, dili ba? [Nagaingon si Igsoong Neville, “Amen.”—Ed.] Oo, sir.

³⁰⁸ Ingon niana usab ang akong buhaton kaniya, pag siya unta ang mamulong. Moingon ko, “Igsoong Neville, makahatag ba ka og higayon alang kanako? Ang Dios naghatag kanako og mensahe. Kinahanglan nakong ipamulong kini sa mga tawo, karon mismo.” Ug siya, si Igsoong Neville, mopadaplin mismo; bisan kinsa man hinoon kanamo, alang sa usa’g usa. Kita n’yo? Ingon niana ang among ginabuhar. Ug dayon kung kami, kung wala ko’y partikular nga butang, nan akong . . .

³⁰⁹ Ganahan kaayo kong madungog siya nga nagawali. Naminaw ko kaniya. Pila man ang nakadungog sa iya, niadtong Domingo sa gabii? Pagkanindot nga mensahe, sultihan ko kamo. Tukma gyud kadto, sa mga gipamulong niadtong buntaga.

Ug, mga tawo, sultihan ko kamo, anaa na sa inyo ang igong Pulong sa Dios nga siguradong magpakinabuhi kaninyo nga matarung ug mahimong matarung.

Panalanginan ka sa Dios karon, Igsoong Neville. 

61-1112 Usa Ka Tinuod Nga Ilhanan Nga Wala Makita
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org